



V. 00 2

(A. M. 577)

1) Heidenreich, E.

m. 3 andere Handschriften

O. VII. 101.

Nabal.

Son des ver=
truncken Nabals läben
vnd tod/zähen kurzpredigen/vf
dem 25. Capitel des ersten büchs
Samuels/durch Ludwig Lauater
diener der kirchen zu Zü-
rych gerhon.

Belgen ds aber zu einer trüwen war
nun an alle die so dem erschrockenlich
laster der Trunckenheit ergäben sind:
Desglichen zum trost deren eerenw-
beren/so von iren mannen übel gehalten
weidend / vnd von inen vil widerdruesses
lyden müßend, beschriben.

Getruckt zu Zürych by Christoffel
Froschouer/M. D. LXX XIII.

[Faint, illegible text, likely bleed-through from the reverse side of the page.]



Dem frommen/eerenue=
sten/sürchtigen / eersamen vnd
wysen / Walthis Walthar / des
rahts der statt Bern/minem son=
ders günstigen lieben
Herren.



Kommer eerenue=
ster/2c. Din fründt=
lich willig dienst / vñ
gruß / sye üch yeder
zyt beuor. Demnach
fügen ich üch zuuer=
nehmen. Als ich in minen ordenlichen
predigen/die bücher des H. Prophe=
ten Samuels vnd der Künigen/
nach minem geringen vermögen/
hie zum grossen münster Zürich vß=
gelegt vnd erklärt/vnd an dise histo=
ry oder gschicht vom Tlabal Kommen
bin/hab ich die selb diewyl sy voll leer
vnd trosts ist / ouch vnseren zyten
gar wol dienet / ettwas wytlouffi=
* ij

Vorred.

ger gehandelt / vnnnd in zähen predi-
gen vßgeteilt. Ich hab ouch volgæds
min verstand vnnnd meinung / Kurtz
vffzeichner vnd in gschriffte verfasstet/
das ich sy durch den truck kôndre las-
sen vßgon/vnnnd yedermann gemein
machen.

Nit das ich mine büchlin so gern
sähe vff den büchlâden ligen/ sonder
das ettwan ein voller Tabal/der di-
se hystori list/ oder daruon hört / in
sich selbs gange/vñ von dem grüwen-
lichen laster der trunckenheit / ouch
Gottlosem läben vñ wäsen / abstan-
de/vnd sich bessere. Das ouch frome
eerliche vnnnd hußliche wyber / deren
männentag vnd nacht voll/vnd so sy
heim kômend / gegen inen vnd iren
gfind überal / gar vngschickt sind/
durch das exempel dises herrlichen
wybs der Abigael getröst werdind.
Sennach führen ich ouch andere
mancherley stück yn/die der text mit-
bringt/ vñ zü besserung ouch vnder-
richtung

Vorred.

richtung vnser lābēs dienstlich sind.

Wiewol aber deß bücherschrybens so vil ist/das es einem erleiden möchte/sol man doch betrachten den grossen vndercheid zwüschē dem selben. Dann ettliche nit zu rettung Göttlicher waarheit vnd pflanzung der waaren gsunden leer / sonder zu vndertruckung der selben/ zu zangē vnvrüwen dienend / welche man billich hasset. Andere aber dienend zur rächter vßlegung der H. Göttlichen Geschrifft/ vnd erbirwung der gläubigen / welche man billich läset vnd hoch halten sol. Dann es müß das H. Euangelium deß rychs/ wie vnser Herr Christus by dem H. Euangelisten Mattheo züget / geprediget werden in der gantzen wält/ zu einer zügnuß allen völkereu / vnd denn wirt das end kommen. Es sol aber nit nun mundtlich / sonder ouch gschriftlich geprediget werden / darumb dann Gott one zwysel in denen

Vorred.

letsten zyten/die edel Kunst der büch-
truckerey hat lassen erfundē werdē.

Sise mine predigen aber/hab ich
eerender lieber herr/nach altem lobli-
chem bruch/vnder iwerem eerlichen
namen im truck wöllē vßgon lassen.
Eins teils die alt fründtschafft vund
liebe so wir beyd von der zyt an/als jr
hie zü Zürich by minē fründtlichen lie-
ben schwager Carly von Negery sälis
gē gwäsen/gar nach in die 40.jar/zü-
samē gehebt/dardurch züernüwerē.

Anders teils/das ich ein anlaß
hette/ich ernstlich züermanen/das
wie jr bißhär dem truncken vund
voruß dem verrüchten Gottlosen lä-
ben/wie es Nabal gfürt/allwäg ab-
hold gsyn/jr also fürfarind. Vñ die-
wylüch Gott in solchen hohen stand
gesetzt/ouch vil ansähens gebē/jr all-
wäg darob vnd daran syn wöllind/
samt anderen iweren mittberren/
das nit nun alle vnmaas vnd trun-
ckenheit abgestellt/sonder ouch an-
dere zuchtordnungen die ein lobliche
statt

Vorred.

Statt Bern mit dem H. Euangelio
angenommen/geschirmt vnd erhal-
ten werdind.

Zu disen Kompt ouch ein andere
ursach/dan̄ alls yetz verschines Wey-
ens ein eerliche gsellshaft von Zü-
rych vngfaar in die vierthalb hun-
dert gen Bern geritten / alte Eyd-
gnössische trüw liebe vñ früntschafft
zu ernirweren / ist den selben mit nun
gmeinlich von einem eersamen wysen
rath / vnn̄d ganzer burgerschafft zu
Bern/vil früntschafft sucht vnd eer
bewisen/das sy das selb nit gnüg ver-
rūmen kōnnend / sonder es habend
ouch by üch besonderbare eeren per-
sonen / vil vß den wirtzhüseren in ire
eigne hüser gefürt / vnd inen vil güts
erzeigt. Wie ouch jr günstiger lieber
herr / gegen minen lieben brüderē vñ
anderen iren mittburgeren gethon /
ouch mir insondheit flyssig nachgfra-
get / darū ich üch früntliche danckē.

Über das bin ich guter hoffnung
dise mine predigen / werdind by üch /

Vorred.

Von denen/ die iüwerē fromen eerlichē wandel/dē jr von jugend vff gefürt/ vmb welcheſſe willen jr ouch an eeren ämpter vnd in racht gefürderet worden ſind/deſter lieber gläſen werden/ diewyl ſy ſich zügeſchriben vnd in iüwerem nammen vßgangen ſind.

Ich bitten deßhalb jr wöllind diſe mine ſchlechte meinung/ in güte von mir verſton / vnd in alter liebe vnd fründſchaft wie bißhär / gegen mir verharren. Hiemit ſind ſampt den iüweren in den ſchirm Gottes trüwlich beuolhen. Ser ſich in iüwerem alter mit ſinem heiligen Geiſt ſtercken/ vñ biß in iüwer end gnädiglich vnd vätterlich erhalten wölle. Grüßend mir mine günſtige herren vnd güte fründ / iüweren liben ſon Türingen vnd Hansen Wyerman/ſampt anderen die mir nachfragend. Datum zü Zürych im Höwmonat / von Chriſti geburt gezelt 1584. jar.

Iüwer alter vñ güter fründ Ludwig La
uater diener der kirchen zü Zürych.

Die gantz historia / vß dem er-
sten büch Samuels am 25. Cap. wie
Nabal den Souden erzürnt / vñnd Abigael
Nabals wyb in züfriden gstellt / das er Naba-
bals huß nit verderbt / ouch wie Nabal ges-
storben / vñnd Soud Abigael zum
wyb genommen hab.

VS was ein man zü Maon / desse besit-
zung oder vñch was zü Carmel: vñnd
der man was vast groß / vñnd hat drey
tufend schaaß / vñnd tufend geiffen. Vñ
es begab sich das er sine schaaß beschar zü Car-
mel / vñnd der man hieß Nabal / vñnd sin wyb Abi-
gael / vñnd was ein verstendig vñnd schön wyb. Der
man aber was hart / vñnd böser sitten / von dem
geschlächte Caleb. Vñnd Soud hat ghört in der
wüste / das Nabal sine schaaß beschar. Er sandt
vß zähen iüngling vñnd sagt zü inen: GOND hinuff
gen Carmel / vñnd wenn jr zum Nabal komend / so
grüßend in in minem namen fründlich vñ sprä-
chend: Glück zü / frid sye mit dir vñnd dinem huß /
vñnd mit allem dem das du hast. Sich ich hab ge-
hört das du die schaaß schärer habist. Nun sind
die hirten die du hast / by vñß gsyn / wir habend sy
nit gesetzmacht / vñnd es hat inen nichts gefelt an
der zal / so lang sy zü Carmel gewäsen sind. Frag

*
b

dine jüingling dorum / sy werdend dir sagen. Da
rumb laß dise jüingling gnad finden vor dinen ou-
gen. Dan wir sind vff einen guten tag komen. Lie-
ber gib dinen knechten vñ dinem sun Dauid was
3 din hand finde. Vnd als die jüingling Dauids
komen waren / habend sy alle dise wort mit Na-
bal von Dauids wägen gredt / vñ habend gschwö-
gen. Vnd Nabal gab antwort den knechten Da-
uids vnd sprach. Wār ist der Dauid / vnd der son
Isai? Es werdend yetz der knechte vil die sich von
iren herren ruffend. Solt ich min brot / wasser vñ
fleisch nāmen / das ich für mine schärer gekochet
oder gemekget hab / vnd solte es luten gāben da ich
nit weiß wohar sy sind? Do kartend sich die jün-
gling Dauids widerumb vff iren wāg / vñnd als
sy widerum kamend / erzalted sy im alle dise wort.
4 Do sprach Dauid zū sinen mannen: Gürt
ein yetlicher sin schwert vmb sich. Vñnd Dauid
gurt sin schwert ouch vmb sich: vnd sy zugend im
nach hinuff by vierhundert mannen / aber zwey
5 hundert man blibend by dem troß. Der Abi-
gael aber Nabals wyb hat einer der jüinglingen
anzeigt vnd gesprochen: Sihe Dauid hat botten
gsendt vñ der wüste vnseren herren zū grüssen / er
aber hat sy angeschnerkt / vnd sy sind vns seer güt
lüt gsin / vnd habend vns nit geschmecht / es hat
vns ouch nichts gfält so lang wir mit inen gwan-
dlet habend / do wir vff dem fald waren. Sy sind
vnserer mur gsin tag vñnd nacht / so lang wir den
schaffen

schaaffen by inen gehütet habend. So wils nun
vñ syhe was du thün wöllst: dan es ist erfüllt das
böß wider vnseren herren/vnnd wider sin ganges
huß. Vnnd er ist ein man Belial dem niemants
etwas sagen darff. Do ylet Abigael vnd nam
zweyhundert brot/vnd zween schlüch oder legelen
mit wyn vnd fünff gekochete schaaff/vnnd fünff
maß grösts mås/vñ hundert stuck rosin oder wyn
bere/vnd zweyhundert stuck figen/vnd hat die esel
mit geladen. Vñ sprach zu iren iünglingē: GOND
vor mir hin/sich ich wil iuch nachkomē: irem man
aber dem Nabal hat sy es nit angezeigt. Als sy vff
den esel saß/ist sy durch ein verborgnen wäg den
berg abtomen / vnd sich David vnd sine man ka
men hinab iren entgegen / vnd sy begänet inen.
David aber hat gesprochen / Ich hab vmb sunst
behütet alles das er in der wüste hat / dz da nichts
gemanglet hat/an allem was er hat / vnd; er be
zalt vnnd vergiltet mir güts mit bösem. Gott
ehue diß vnd nach mehr den fyenden Davids/w
ich dise in bis an morgen laß überbliben einen der
an die wand brunket vß allem dz er hat. Do nun
Abigael den Daviden sach/ steig sy ylends vom
esel/vnd fiel für David vff ir angesicht/vnd neigt
sich zu der erden. Vnd sy fiel zu sinen füßen vñ
sprach: Ach min herr min sye dise mißthat / vnnd
laß din magdt reden vor dinen oren/vnnd hör die
wort diner magdt. Min herr sehe nit sin herß wi
der disen man Belial/wider den Nabal. Dan er
ist wie sin nam heiße. Sin nam ist Nabal/thor

6

7

Vnd thoreheit ist by jnt. Ich aber din magt hab die
Jüngling mines herren nit gesehen / die du gsendt
hast. Nun aber min herr / so waar der Herr läbt /
vnd so waar din seel läbt / der Herr hat dich ver-
hinderet / das du nit kämst in das blüt / vnd hat
din hand erhalten. So müßend nun werden wie
Nabal dine fiend / vnd die minem herren libel
wellend. Das ist die gaab die din magt minem
herren har gebracht hat / die nim hin / vnd gib sy
den Jünglingen / die byn füßen mines herren wan-
dlend. Vergib diner magt die überträttung. Dañ
der Herr wirt minem herren ein sicher huß ma-
chen. Der da führt die krieg des Herren / vnd kein
böses ist an dir gefunden din läben lang. Es hat
sich einer erhebt dich zuuervolgen / vnd stelt dir
nach diner seel / aber es wirt die seel mines herren
angebunden im bündelin der läbendigen by dem
Herren dinem Gott. Die seel aber diner fienden
wirt geschlingget werden in mitten des lätsches
der schlingen / weñ der Herr alles das güt minē
herren thun wirt / das er dir versprochen hat / vnd
gebieten / das du sin Herzog syest über Jsrael / so
wirt es dem herren mines herren nit ein anstöß
nach sal sin / dz du nit blüt vergoffē hast on vrsach
vnd dir selber ghulffen / so wirt der Herr minem
herren wolchün / vnd wirst an dia magt geden-
cken. Do sprach David zu Abigael: Gelobet
sye der Herr der Gott Jsraels / der dich hütt des
tags mir entgegen gsandt hat / vnd gelobt sye dir
geberd / vnd gelobt syest du / das du mir hütt er-
weert

weert hast / das ich nit wider blüt komen bin / vnd
mich mit eigener hand errettet hab. Waarlich so
waar der Gott Israels läbt der mich verhinderet
hat / das ich nit übel an dir thet / wärst du mir nit
ylenz begegnet / so wäre dem Nabal vff disen mor
gen nit einer überbliben der an die wand brünket.
Also nam David von irer hand was sy gebracht
hat / vnd sprach zu iren: Züch mit Friden hinuff in
din huß: Siehe ich hab diner stin genolget / vnd
din angficht angenommen / oder dich diner bitt ge
wäret. Do aber Abigael zum Nabal kam / siehe
da hat er ein maal in sinem huß wie ein künigs
maal / vnd sin hers was frölich in im. Vnd er was
gar truncken. Sy aber sagt im nichts / weder
kleins nach grosses / biß an den morgen. Do es a
ber tag was / vnd Nabal den royn vertouwet hat
sagt im sin wyb dise wort oder sachen. Do er
starb sin hers in sinem lyb / das er ward wie ein
stein / vnd über zähen tag schlug in der Herr das
er starb. Do David hort das Nabal tod was
sprach er / Lobt sye der Herr / der min schmach ge
rochen hat an dem Nabal / vnd sinen knecht erhal
ten hat vor dem übel / vnd der Herr hat dem Na
bal das übel vff sinen kopff vergulden. Vnd Da
uid sandt hin vnd ließ mit Abigael reden / das er
sy zum wyb neme. Vnd do die diener Davids zu
Abigael kamend gen Carmel / redtend sy mit iren
vñ sprachend. David hat vns zu dir gesandt / das
er dich zum wyb nâme. Sy stünd vff vnd neigte
sich mit irem angficht zur erden vñ sprach: Siehe

9

10

hie ist din magt/das sy diene den knechten mines
herren/vnd ire fuß wäsche. Vnd Abigael ylet vñ
macht sich vff vnd reit vff einem esel vñnd fünff
mägt die by iren füßen warend/vnd zoch den bot
ten Davids nach/vnd ward sin wyb. Auch nam
David Achinoam von Jesrael vnd warend beeo
de sine wyber. Saul aber gab Michol sin
tochter Davids wyb dem Phalti
dem son Laiz von Gallim.

Sun

Sum vnd inhalt diser zehen Predigen.

- I. War vnd wie Nabal gsyn sye.
- II. Wie David sine botten zum Nabal gsandt etid hilff von im zu begären.
- III. Wie Nabal sich gägen den botten Davids vno früntlich erbeigt/ vnd iuen ein abschlegige antwort ges gäben habe.
- IIII. Wie David zornig worden / vnnnd den Nabal mit der hand hab wellen straaffen.
- V. Wie der knechten einer/ siner frouwē der Abigael erzellt/ was sich zwüschend den botten Davids vñ dem Nabal verlossen/ ouch wie er sy gewarnet habe.
- VI. Wie Abigael dem Dauiden entgegen gritten mit einer eerlichen schäncke vñ im zu füßen gfallen sye.
- VII. Wie Abigael den Dauiden mit einer schönen red/ von sinem bösen fürnemmen ab zústan/ ermant habe.
- VIII. Wie David Gott den Herren vnd ouch die Abigael gelobt/ vnd iuen die schencke abgenommen.
- IX. Wie Abigael irem Nabal erzellt habe / in was gfaar er gsyn / wie er vnlang darnach gstorben sye/ vnd wie Danid Gott gelobt habe.
- X. Wie David nach der Abigael gworben/ vñ sy ius die ee zu gesagt vnd versprochen habe.

Einige wenige
belegte

1. Einige wenige
belegte
2. Einige wenige
belegte
3. Einige wenige
belegte
4. Einige wenige
belegte
5. Einige wenige
belegte
6. Einige wenige
belegte
7. Einige wenige
belegte
8. Einige wenige
belegte
9. Einige wenige
belegte
10. Einige wenige
belegte
11. Einige wenige
belegte
12. Einige wenige
belegte
13. Einige wenige
belegte
14. Einige wenige
belegte
15. Einige wenige
belegte
16. Einige wenige
belegte
17. Einige wenige
belegte
18. Einige wenige
belegte
19. Einige wenige
belegte
20. Einige wenige
belegte
21. Einige wenige
belegte
22. Einige wenige
belegte
23. Einige wenige
belegte
24. Einige wenige
belegte
25. Einige wenige
belegte
26. Einige wenige
belegte
27. Einige wenige
belegte
28. Einige wenige
belegte
29. Einige wenige
belegte
30. Einige wenige
belegte
31. Einige wenige
belegte
32. Einige wenige
belegte
33. Einige wenige
belegte
34. Einige wenige
belegte
35. Einige wenige
belegte
36. Einige wenige
belegte
37. Einige wenige
belegte
38. Einige wenige
belegte
39. Einige wenige
belegte
40. Einige wenige
belegte
41. Einige wenige
belegte
42. Einige wenige
belegte
43. Einige wenige
belegte
44. Einige wenige
belegte
45. Einige wenige
belegte
46. Einige wenige
belegte
47. Einige wenige
belegte
48. Einige wenige
belegte
49. Einige wenige
belegte
50. Einige wenige
belegte



F

Von des verurtheilten
Nabals leben vnd tod / zehen
kurtzer Predigen / vß dem 25.
Cap. des 1. Buchs Samuels.

Die erst predig.

Wär vnd wie Nabal gsyn sye.

ES was ein man zu Maon / desse
besitzung oder vych was zu Car-
mel: vnd der mann was vast groß /
vnd hat dry tusent schaaff / vnd tu-
send geissen. Vnd es begab sich daß
er sine schaaff beschar zu Carmel / vñ
der mann hieß Nabal / vnd sin wyb
Abigail / vnd was ein verständig vñ
schön wyb. Ser man aber was hart /
vnd böser sitten von dem geschlächte
Caleb / 2c.

Dieses gägenwirtig Capitel be-
gryfft zwen fürnem teil: Im ersten
wirt kurtz beschriben / wie der heilig
Prophet Samuel mit tod abgans

Abstellung
dieses cap.
A

Von dem Nabal

gen / vnnnd zur erden eerlich bestattet sye /
ouch wie das volck Israel in beweinet / oder
leid vmb in getragen / als das wol gewüßt /
wie er sich alle zyt seines läbens / gar eerlich
vnnnd wol in sinem stand getragen / menckli-
chen gedienet / vnnnd sy deßhalben übel an im
verloren hattend.

*Frucht die-
ser history.* Im anderen teil wirt wytlöuffig vnd der
länge nach erzelt / wie es dem Dauiden mit
dem Nabal vnd der Abigail ergangen. Wel-
che hystoria voll leer vnnnd trosts ist. Dann
darinn wirt vns fürgestellt (daß ich allein ettli-
che stuck in gemein melde) wie from gläubig
lüt nit allweg alles das habind / das sy gern
hettind / sonder sich oft vnder dem crütz tru-
cken müßind vnd lyden. Dauid ein mensch
nach dem willē Gottes (wiewol er sine fäler
ouch gehebt) was lybs vnd läbens vor sine
schwäher dem König Saul niemen sicher /
müßt vß einer wilde / vß einer Bachtalen in
die ander entrüñen / daß er im nit in die händ
käme. Darzū müßend er vnd sine kriegslüt /
deren in die 600. by im warend / grossen hun-
ger vnd mangellyden / vnd erst über das von
dem Nabal übel geschulten werden. Die Abi-
gail ein herrlich eerlich wyb / müßt by disem
Nabal tag vnd nacht syn / von dem sy weder
hilff noch trost / lieb noch racht hat / welche es
ouch lieber hette besser ghebt. Wir werdend
ouch sehē / wie die fründ Gottes etwan selbs
inen

Sie erst Predig.

2

inen entgond/mit zorn/reachgyrige/vnd anders
deren/ wie hie Dauid auch / wie Gott die si-
nen hinder sich halte. Item wie truncken vnd
gytig lüt/nichts rächts rhügind / sonder eins
vngschickters dan das ander ansehind. Wir
habend in diser gschicht auch ein exempel ei-
nes ellenden hußuatters:einer redlichen huß
müter: vñ eines trüwen knächts/rc. auch wie
Gott die/so seiner gnaden erwarten mögend/
ires leids/etwan auch hie in zyt/ergetze/vnd
anders derglychen/rc.

Dise history hat der teilen oder stucken vil ^{Ordnung}
darinn sy vmb Bessers verstands willen mag ^{diser histo-}
abgeteilt werden. Wir wöllend eins nach de ^{ry.}
anderen/mit der hilff Gottes für vns neme-
men/vnd by einem yeden hören/was zu vn-
derrichtung vnd Besserung vnsers läbens/
auch meerung vnd sterckung vnsers glou-
bens vñ vnser gedult/(daruff die vßlegung
der heiligen gschufft überal sol gerichtet wer-
den) vns vom H. Geist fürgehalten werde.

Erstlich wirt beschriben/wär vñ wie diser Nabals
Nabal gsyn sye. Es werdend ettliche ding ^{Nabals}
von im gemeldet / deren wir eigentlich gwa- ^{nammen}
ren müßend. So vil sin namen antrifft / so
heißt Nabal ein thoz. Eigentlich zuredē heiße
Nabale ein stürckel oder stock / in de kein tucht
krafft noch safft ist / deßhalb wed herfür sproß-
sen oder schiessen vnd wachsen kan vnd mag.
Wirt demnach zogen vff die menschē in des.

Von dem Nabal

nen kein Gottsforcht/ vernunfft/ Bescheidenheit noch verstand ist. Hernach da Abigail den Dauiden bittet/ das er jm schonē wolle/ sagt sy/ er heisse Nabal vñ sye ein Nabal/ das ist ein thoz. Es geschicht offft/ daß die namen vñ menschen/ sich irem thun vñ lassen glychend/ im guten vnd bösen. Die H. Gschufft aber/ nennt thorechtig lüt oder narren/ die glych wälte wyß sind vnd gfiert/ aber in denen kein Gottsforcht ist. Dann was ist thorechter weder wen̄ einer seiner seelen heil kein rächnung hatt/ sond̄ läbt wie das vnuernünfftig vich? Wenn einer nit gloubt daß ein Gott sye/ der das gut belonē/ vñ das böß straffen werde?

Wo Nabal sesshaft gsyn.

Diser ist sesshaft gsyn zu Maon / welche statt im stamen Juda gelägen was / wie wir Josue am 15. cap. findend. Deshalb so sind Dauid vnd Nabal vß einem stamen bürtig gsyn. Welchs jm das hertz solt angewunnen haben/ dz er gedacht hette/ er ist vß dinē stamen vnd geschläch/ darumb ist es billich/ das du jm etwas lassist erschiesen. Dann die natur leert/ das wir denen die vnser lands od̄ stands sind/ mer zu züchind dan̄ anderen. Dauid was ein haupt in disem stamen / vnd hat disem stamen in friegen vñ stryten offft großer yngelegt/ welchs alles by disem mensche vil gebracht hett/ wen̄ etwas guts in jm gsyn wäre. Siewyl er aber über dises/ so vnfrüntlich vnd vngeschickts dings ist / so kan vñd mag

Sie erst Predig.

3

mag er nit entschuldiget werden.

Sin gward/bsitzung oder vych/ist zu Car Nabal ist
mel gsyn/vnd mit namen hat er 3000. schaaff ^{hordrich}
vnd 1000. geissen ghebt/ von grossen vych ^{gyn.}
stadt nichs. On zweyfel hat er ein grosse wyte
innghebt/ vil güter/ weiden/matten/ Berg/
Bübel vnd tåler/ darinnen er sin vich erhalten.
Wo so vil vchs ist/ da muß man ouch vil
gsinds knächt vnd mägt haben. So Dauid
vmb die Abigael warb/ kam sy mit fünff mäg
ten zu jm. Ob es aber Nabals dingete dienst
oder lybeigne gwasen syend/ wirt nit gemel
det. Die altē habend ein teil jres güts an lyb
eignē lüten ghebt. Da Abrahams knächt dem
Isaac vmb Rebeccam werben solt/ sprach er
zu jrem vatter Laban. Der Herr hatt minen
herren rychlich berachten/vnd ist groß wor
den/ vnd hat jm silber vnd gold schacff vnd
ochsen/knächt vnd mägt/kameel vnd esel ge
ben/2c. Gen. 30. Jacob ward über die maass
rych/das er vil schaaff/megdt/ vnd knächt/ka
meel vnd esel hat. Es hat Gott disen Nabal
rychlich mit zytlichem zut begabet.

Der vch gwerb ist gar herrlich vnd nutz ^{vychges}
lich. Die frommen alten vätter sind meerteils ^{werb.}
vechlüt oder hirtē gsyn/habend jre senten ge
hept. Wie Joseph sine Brüderen für den Kün
ig Pharao firt/vnd er sy fraget/was jr han
del vnd begangenschafft wäre? saggend sy/
wie sy Joseph vorhin vnderwisen hat/ Dine

2 ij

Von dem Tabal

Knächt sind vychirten/ wir vñ vnser vätter.
Beschamptēd sich desse nit / wiewol sy wuß-
tend / daß die Egyptier ein abschühen vñnd
grüwel ab allen vychirtē hattend. Gen. 46.
47. Wir erfarend in vnserem land / das meer
teils ein vchland ist / was grossen gälts vñd
güts das ertregt / wenn einer nun ein senten
von zwentzig küyen sommer vñd winter er-
halten mag. Dañ das fleisch / milch / schmaltz /
käß / ziger / vñ anders / so man ouch in andere
land fertiget / giltet vil / yetz wil ich vom vñ-
wachs deß jungen vchs nichts sagen.

Carmel.

Carmel ist ein Berg gsyn im stāmen Isa-
schar / an welchem der H. Prophet Helias de
opfferkampff mit den Baalspfaffen gehal-
ten / vñnd durch ein wunderwerck erhalten
hat / daß sin glauben der rächt waar glauben
sye. Aber Carmel darnon hie stadt / ist ein geg-
ne gsyn im stāmen Juda. Im büch Josue
werdend Naon / Carmel vñd Ziph zusamen
gsetzt. Dann sy zünächst by ein anderen wer-
dend glāgen syn. Sonst heist Carmel ein
fruchtbar vñd lieblich lustig ort. Isa. am 42.
wirt wyßgesagt / die wüstin oder thür äger-
ren werde zū Carmel / das ist / einem fruchtba-
ren vāld werden. Er ist zū Naon gßassen / o-
der hußhablich gsyn / hat aber sine güter in
diser gegne gehebt / wie noch ryche burger in
stetten sitzend / aber ire güter vñnd sitz oder
meyerhöf / anderschwo habend.

Es

Sie erst Predig.

4

Es wirdt auch gemeldet / er sye gar groß ^{Nabal ist} gsyn. Da nit gredt wirt von dem / das er ein ^{groß gsyn} schwerer grosser feister mann von lyb gsyn (welchs doch der sach auch nit vnglych sicht / die wyl er jm hat lassen wol syn / vnd sich täglich gemestet) sonder das er ein grossen namen ghebt / in grosser achtung vnd gwaltig gsyn sye. Dann die wält hat den bruch / das sy von wolhabenden lüten vil sagt / sich zu jnen geliebet / als derē sy erwan wol gniessen mag / haltet sy für hoch vnd herrlich / gibt jnen grosse titel / zücht sy herfür / vnd trybt grosse glychßnery. Wen aber die kü den kübel vmb schlecht / wie man sagt / vnd sy vmb das jren kommend / so halt sy nichts mer von jnen / sonder es gadt nach dem sprüchwort / Nit mer gält / nit mer gsell.

Etlich verstand einfaltig / er sye groß / das ist / grosses vermögens vñ hablich gsyn. Also stadt Gene. am 26. vom Isaac / Der mann wuchs vnd nam ye länger yemer zu / bis er fast groß ward / bis er vil güts hat an schaafsen vnd rinderen / vnd ein groß gsyn / do nydetend in die Philister / &c.

Sifer hat ein wyß verständig vnd schön ^{Nabals} wyb gehebt / die hieß Abigael / sy hat im ^{ee gemahel} Hebreischen den namen Dabar / das sy jrē vatter erfröuwt. Ein söllich wyb habē ist ein grosse gaab Gottes. Solomō spricht Prou. 12. Ein redlich wyb ist ein tron jres manns / aber ein

Von dem Nabal

schandliche/ist ein eiter in sinem gebein. Ein
verständig wyb/die sich der hußhaltung ver
stadt/die haben vñ lassen kan / wie man sagt/
mag ein mann By eeren behalten / ein vnuer
nünfftig vnwüßend wyb / mag ein man gar
verwilde vñ zü nichte mache. Mancher hette
eerlich huß/vñ thäte recht/wen sin wyb rächt
g schaffen wäre. Wen sy aber vnfrüntlich mit
im ist/kein liebe zü im hatt / im kein güt wort
gibt/so wirt er vßfünd/gadt zü gütē gsellen/
By denen er fröud vnd kurtzwoyl sücht/das er
sins jamers vñ ellends vergässe/gwonet des
liederlichen läbens / Das er hernach kein güt
mer thüt / vnd wenn dan ein wyb glych gern
rächt thun/vnd sich wol mit im halten wölte/
so ist es merreil zü spaat. Es wirt gmeldet/sy
sye schön von angficht gsyn / welches einem
wyb ouch gegen irem mann ein grossen wil
len machet:sonder wen sy ouch schöne gebär
den vnd tugenden an iren hat. Dan wen eine
schön ist von lyb/vnd aber nit schöne gebärde
an iren hat/ ouch sonst sich nit wol haltet / so
stadt es gar übel. Von der schöne / wie man
nichts druff setzen/wirt vil ouch von den Bei
den geschribē/hie nit nodtwendig zü melden.

Nabals
sitten.

Wie ist diser Nabal geardet gsyn? Er ist
ein harwer rucher man gsyn / dz bschynnt sich
by dem/das syn knecht hernach sagt/er lasse
nutt/auch warnungs wyß/mit im reden: itē
Das er die botten Davids on allen anlaß / so
ruch

Sie erst Predig. 5

ruch anfert/vñ sy vßsilzet daß sin hñßfrow
der zyt faaren müß/damit sy auch fruchtbar-
lich mit jm reden / jm sin vngschickts wäsen
für halten/ vñnd inn warnen möge / vß daß
er hernach dester bhütsammer sye.

Demnach stadt / er sye bößhastig gsyn in
sinem thün / dann er dorfft reden vñnd thün
was jm nun in sinn kam. Er trost sich seines
güts vñd hartkommens/was jm nichts zvil/
er fraget weder Gott nach der wält nach / zu
dem ward er jemerdar voll/über das was er
gytig vñd vñdanckbar. Wo aber dise haupt-
laster überhand nemmend/ da ist vñnützlich
daß nit ein vngschickters volge dann das an-
ander. Dise laster sind als vil als brunnades
ren viler bösen dingen / wie man täglich ers-
sart. Wenn einer durch den zaum der gebots-
ten Gottes/sich nit hinder sich haltet/so hängt
er sinen bösen anfächtungen nach/vñd ist da
kein nachlassen nach vßhören niemen. Im 14.
Psalmen sagt David: Der Nabal oder toz-
recht spricht in sinem bertzē: Es ist kein Gott.
Sy sind verderbt / vñd nemmend inen grü-
liche ding für. Es ist keiner der güts thüye.
Lyß den den 53. Psalm.

Er ist vom gschlächte Caleb gsyn. Diser Ca-
leb ist ein fromer eerlicher man/vß dem stam-
men Juda gsyn. Dann vnder denen späche-
ren die Moses in das land Chanaan sandt/
was er vñ Josue allein vßrecht. Dañ sy mach

Nabals
geschlächte
vñd hart-
kommens

Von dem Nabal

tend das volck nit verzagt / wie die anderen /
sunder sagtend / sy soltind mannlich vnd tro-
stlich syn / Gott wurde jnen das land ingabē /
das er jnen verheysen hat / daruñ auch Gott
sy beyd allein in das land kommen ließ / die an-
deren müstend all in der wüste sterben. In
erobierung der stetten / vñ des lands / hat sich
diser Caleb gar eerlich vñd wol gehalten.
Dorum hernach / wie man dz land vñteyle / in
ein gütter theyl zü getheylt ward. Von dis-
sem Caleb hat Nabal syn habkommen. Wol
er im feins wägs nachschlug / wie nach vil
beschicht / daß fromme eerliche elteren böse
kind vnd nachkömnen habend. Welches Gott
vilicht darumb beschähen laßt / daß menck-
lich sehe / daß güte vñd verstendige kinder /
sin gaab vnd schäncke syend. Dan weñ from-
me wyse lüt / allwägen kind hettind / die jren
füß stapffen noch folgetind / so wurde man
vermeinen / es wäre ein natürlich ding / es le-
ge im geblüt / da aber Gott wil / daß man sin
werck vnd güthät erkenne / vñd im darumb
lob vnd danck sage. Dann daß einer glöübig
ist vnd recht thüt / das hat er von Gott allein
vnd nit von natur.

Frommen
eltern sol
man nach
schlagen.

Vñ dem aber / daß Nabal dem Caleb so
unglych ist in allen dingen / lernend die so
von herrlichen fromen elteren erbozen synd /
daß sy den selbigen in allem gütten nachschla-
hind. Sonderlich aber soltend die / so sich des
adels

Sie erst Predig.

6

adels rühmend / vnd eines alten namens vnd
stammens / in verstand vnd rühwürdigem
thaten vnd tugenden jren elteren glych sin/
Darinnen der rächt adel Stadt. Dan was nütze
den Nabal / daß er eines güten herkommens
was / vnd aber vß der ardt schlägt: Also weñ
einer glych elteren ghept / die eerlich gehan-
dlet / vnd sich wol ghalten / fürsten / sterren vñ
landen wolgedienet habend / er aber tag vnd
nacht voll ist / tübel schweret / spilt / ein hüren
jeger ist / Gottes wort nichts nachfraget / sun-
der alles thut was in nun gelustet vnd gelan-
get / so nützet es in nichts / ja stat im vilmeer
züerwissen / daß er fromme vernampre eltes-
ren ghept hat / vnd er jnen so vnglych ist.

Su sichst auch daß Gott on vnderscheid
yetz güten dann bösen laßt zytlich gütt zü-
fliessen / so steckt er auch beyde die güten vnd
die bösen / zun zyten in grosse tieffe armüt.
Der Nabal wußt also zü redē / fines güts kein
end: Dargegen waß David sampt den sinen
vff diß mal bättel arm. Wenn yemands dar-
uß hette wöllen schliessen (wie gemeinlich
bschicht) Gott hat den Nabal lieb ghept / dan
er hatt im groß gütt gäben / dem David vnd
den sinen ist er syend gsyn / dann sy habend
sich des Bettels nit mögen erweeren / so hette
er vnrecht ghept. Dann mann by denen din-
gen nit ab nämen kan oder sol / ob einer Gott
Bfalle oder nit. Dann vnser H. Jesus sagt

Güt vnd
böß wer-
dend rich
vnd arm.

Von dem Nabal

Luce am 12. capitel/ Des menschen leben glück
vnd heyl stande nit in rychtumb / also stat es
in anderen zytlichen dingen auch nit: als daß
einer von eerlichem gschlächte erbozen / das
er gwaltig vnd in grosser achtung ist / vnd
erst über das ein schön verstendig wyb hat/
etc. Nabal hatt dise ding alle / Diuyl im
aber an Gottsforcht/waarem glauben vnd
wyßheyt manglet/ so ist er auch hie in zyt ar-
beitsfelig gsyn/vnd habend in die ding übero-
al nichts gnützt/ja habend im meer / wie an-
derē vnglößubigen/zü sinē verderben greicht.
Solomon sagt Proverb. 17. w3 nützt es den
narren daß er rych ist / Diuyl er wyßheit nit
kauffen kan?

Dise vnd ander beschrybungen glößubiger
vñ vnglößubiger lüten/söllend wir eigentlich
Behalten/vnd wo wir sähend das es ander
lüten gefält(wie wir es dann am anderen ee-
sähend/dan an vnß selbs) so sollend wir das
selbig mit der hilff Gottes auch an vnß ver-
besseren: sähend wir das ander eerlich vnd
wol gehandelt habēd/ sollend wir irem exem-
pel in guttem nachschlachen/ vnd Gott ernst-
lich anruffen vñ bitten/ daß er vnß syn gnad
vnd h. Geist verlyche/vff das wir mit ein an-
deren nach sinem heyligen willen im in
waarem glauben vnd vnschuld
des läbens dienen vnd gfal-
len mögind.

Von

Sie ander Predig.

7

Von des vertruncknen
Nabals läben vnnnd
10d/2c.

Die ander Predig.

Wie David sine botten zum Nabal
gsandt/ ein hilff von im zübegären

Vnd David hat ghört in dwüste/
d3 Nabal sine schaaßbeschar/sandt
vß zähen jüngling vnd sagt zü jnen:
Gond hinauf gen Carmel vnd weñ
ir zum Nabal komend / so grüßend
in in minem namen fründtlich vnnnd
sprächend: Glück zü/ Frid sye mit dir
vnd mit dinem huß / vnd mit allem
dem das du hast. Sich ich hab ge-
hört d3 du die schaaßschärer habist.
Nun sind die hirten die du hast / by
vnß gsyn / wir habend sy nit ge-
schmächt / vnd es hat jnen nichts ge-
felt an der zal so lang sy zü Carmel
gwäsen sind. Frag dine jüngling da-
rum/sy werdends dir sagen. Darum

Von dem Nabal

laß dise jünglig gnad finden vor dinen ougen. Dann wir sind vff einen gütten tag kōmen. Lieber gib dinen knechten vnd dinem son David was din hand findt.

As and stück diser history begryfft/ wie David sin treffliche botschafft zum Nabal gesandt habe/ in vmb ein hilff vnd stür in sinem namen fründlichen zebätten.

Ab welche ort die boten kōmen.

Erstlich wirt angezeigt/ von wañen David sine botten gsendt habe. Vß der wüste/ namlich Phara/ welche in Arabia Petrea/ nit wyt vom stammen Juda sol glägen syn. In diser was weder zū byssen noch zū brächen. Desselhalb trang in die not/ etwas vom Nabal zū begären. Do er das ort nun hort nemmen/ ab dem sy kamend/ solt er gedacht haben/ die not wirt verhanden syn. Er kondt nit gedäncken warumb koufft er nit was im notwendig? Dann wäre er glych mit gält wol verfaßt gsyn/ so hette er nichts an dem ort funden zū fauffen.

Wenn sy kommen.

David faaret der glägenheit der zyt / dan als er hort daß Nabal sine schaaff beschar/ da schickt er sin eerliche bottschaft zū im. Es ligt gar vil an dem/ daß einer ein ding zū rächter kommlicher zyt zū handen nemme/sonderlich

Sie ander Predig.

8

derlich wenn einer etwas von dem anderen
begären wil. Dann wie man gemeinlich sagt
ein stund bringt das hundert nit bringend.
Solom. sagt Eccles. am 3. cap. alle ding ha-
bend sin zyt vnd zyl. Man sol schnyden dies
wil die ernd/herpsten diewyl der herpst wä-
ret. Es was der bruch/wenn man die schaaff
beschar/dz die rychen kostliche maal liessend
zurüsten/vnd lüdend etwan ire güten fründ
zü den selben. Wie by vnß gemein ist/das mā
nach der ernd den frey oder schnithanen gibt/
erlich nemends die sichellegi: weñ der herbst
vberhin ist/gibt man den trottknechten vnd
anderen arbeiteren ein güt maal / das man
den trunten nent : wenn man vß tröschē
hat/die pflegellegi. Es ist ouch keiner so karg
der nit vff dise tag ässen vnd trincken rych-
lich darstelle: also ist es der bruch by den altē
gewäsen/wenn sy die schaaff beschoren. Wel-
ches man sieht vß der history im 2. Sam. 13.
cap. Da gmäldet wirt/dz Amnon sin schwö-
ster vatter halb/die Thamar genozoget/wel-
ches jr brüd von vatter vñ mütter/d Absolon
an im zü rächen vnderstünd/thet aber nit der
glychē/darum lüd er nach zwey jarē sinē vat-
ter den künig David/sampt sinē kinden zü dē
gastmaal das er hat lassen rüstē / wie er sine
schaaff beschorē. So im d vatter abschlug/bat
er in/dz er zü wenigistē sine kind kōmen ließ/
welchs beschach. Amnō d sich keins argen zü

Schaaff
beschoren;

Von dem Nabal

sinem Brüder versach/erscheyn ouch vñ ward
mitten im maal/Da er ein güttten trunck hatt/
vnd frölich was/von Absolons Dieneren/Die
Darzū Bestelt warend/vnuerfähenlich vñnd
yemerlich erstochen.

Wie vil
der böttten
syn.

Als nun der Nabal ein Kostlich maal hal-
ten wolt sinen schaaffschärreren/sandt David
zähen jünglig (hernach nendt ers knächt od
Diener) zu im. Darumb aber schickt er jren
so vil/ Das vnß dester meer ansähens hette/
weder wenn er nun einen oder zwen zu im ab
gefertiget hette. Dann oft beschicht / Das ei-
ner sich ee ergibt/wenn deren vil sind / Die jñ
vmb ein Ding bättend/weder wenn jren we-
nig sind. Et schickt junge lüt / Dann wir ofte
vmb der selben willen mee thünd/dann grad
vmb der alten willen / gedencend die alten
stärbind bald ab / Könnend vns wenig mee
nütz oder schad syn. Die jungen aber gedens-
ckend daran. Wenn einer jñe nit willfaarete
so müßte er oder die sinen desselben deß nech-
sten tags vbel engälten. Durch dise böttten
ließ David den Nabal fründtlich bätten/Das
er im vnd sinen hungerigen Friegs lüten/vff
disen tag etwas wölte mittheylen.

Was sy
mit Nabal
gredt.

Er gibt jnen ein instruction / Das ist/ein
vnderwifung oder befälch / was sy in sinem
namen/reden/handlen/vnd fürtragē söllind
vnd laßt deren Dingen keins dahinnen / Die
disen harwen menschen hetten mögen Bewes-
gen

Sie ander Predig.

9

gen / im fründschafft zu bewysen. Erstlich sagt er sy sollind in in sinem namen fründtlichen grützen vnd sagen: Frid sye mit dir vñ dinem huß / vnd mit allem das du hast. Durch den friden verstond die Hebreer den wolstand / vñnd ist das die meinung / Gott welle dich / ding sind vnd vich schirmen vnd erhalten. Vß dē aber dz die heiligen diener Gottes ander lüten von Gott wünschend / das er sy / die iren vnd ir haab vnd güt schirmen vñnd erhalten welle / sähend wir / wie vnser ding so nichts ist. Das alles wz wir güts habend / allein von Gott kompt / wir in im läbend vnd sträbend / wenn er sin hand von vns abzücht / es vmb vns beschähen ist. Dann wenn wir dise ding von vns selbs hettind / so dörffend wir die selben weder ander lütē nach vns vō Gott zu begären vñ zu wünschen. Nun wünschend aber die gloübigen anderschwo vßtricklich alles güts ander lüten von Gott / so kōmēd sy ie allein von im / wie Jacobi am 1. capitel ouch stadt.

Demnach spürend wir im Dauiden vñ anderen heyligen nit ein nydigen geyst / wie by etlichen / denen es leid ist / wenn es ander lütē wol gadt / sy wünschend inen vnd den iren nit / das sy an zytlichem güt vnd anderem zu nāmēnd / sunder stündend inen lieber für die sunnen. Es beduret sy weñ ander das habend desse sy manglen müßend / oder daß sy glych

B

Von dem Nabal

von Gott rychlich empfangen habend / Da sy vil meer Gottes gnad die er anderen Bewyßt / soltend prysen / vnd von hertzen Begären / das es iren nächsten ye länger ye baß vnd glücklicher ergienge / daß sy ouch yemerdar mōch und an allem gūten zunānimen.

Daruff Befilcht David sinen botten / daß sy kurtz erzellind / wie er vernommen / daß er sine schaaff beschāre / nun habind er vnd sine knecht / sinen schaaff vnd geyß hirten / nie kein leid gethon / so lang sy in diser wūste oder gāgne glāgen (das Hebraisch wort vermag sy habind sy mit schamrot gmacher) sy habind ouch nie nichts von ire herde verlore. Wenn die hirten yetz etlicher schaaffen dann etlicher ge essen gmanglet / vnd nit hettind können rāchenschaffe gāben / wo sy hin kommen / so wārend sy vor iren herren mit schanden bstandē. Dann wann einer sagen sol / wo hin ein ding kōmen / vnd er kans vnd weißts nit / so wirt er schamrot. Gen. 31. cap. verwyßt Jacob sinem schwāher Laban was die thier zerrissen habe er im müssen bezalen / vñ w3 im von der herd tags oder nachts verstolen sye / hab er im auch angeforderet. Daruff mā sicht wie wol David den hirten kōmen sye. Er sagt darby er sölle sine diener selbs fragen / sagend sy anderst / so wölle er des selben engelten. Welchs ein grosses waß / daß er lyden mocht / des Nabals diener selbs wurdind verhörit / daß sy
Der

Sie ander Predig.

10

Der waarheit kundschafft gebund. Herhach
sagt seiner dieneren einer der Abigacl gleichs
vnd so vil mee/sy syend tag vnd nacht/als vil
als ire muren vnd vorweere gsyn / Das inen
kein schaden von bösen lüten oder wildē thie
ren begägnete. Dann in disen landen gfaar
gsyn der löuwen vñ Bären/ouch anderer fräs
siger vñnd schädlicher thieren halb / wie wir
wüßend dz ouch Dauid als er nach ein schaf
hirt was mit löuwen vnd Bären hat müssen
stryten/wenn er acht sin herd schirmen wolt.
Der heilig patriarch Jacob forcht nit vmb
sunst sin lieber son Joseph were in der wil
de als er sine Brüder sücht/vñ den wildē thie
re frässen. Es dorffted ouch die Syrer Ara
ber/Amelchiter vñ and die gern roubetend/
kein ynfal thun. Ober das wärend Dauid vñ
die sine darvor/dz sunst kein dieb/dz klein o
d groß vñch möchte hinwäg trybē. Welches
nit ein kleine güthar was/dann die schaaffir
rend vnd vergond sich offit/vñd werdend deß
halb den frässigen thieren /vñnd bößhaften
lüten zütheil/wie nach geschicht. Wie si öuwe
es einen doch so wol/wenn er güte nachpau
ren hat/die im vor schaden sind / vnd zu dem
sinen sorg habend? Themistocles ein wyßer
man/ließ nit vergäbens / als er ein gürt/hof/
oder huß feil rüfft/vñder anderem anzeygen
er hetre einē güten lieben nachpürē/vermeint
es wurde vester fßuffiger syn.

B 4

Von dem Nabal

Wie Dauid vñ sine
Kriegslüt
sich in der
wüste er-
halten?

Wie habend aber/möcht einer fragen / so vil Kriegslüt sich in der wüste mögen erhalten/wenn sy nichts geraubet? Antwort / Die jren werdend jnen zugschick haben/so vil sy vermögen. Demnach sind sy vff die bütt zoge aber wider die heyden/ die Philister/Syrer/Araber/Amelechiter vnd andere / welche als vil als ire abgesagte syend warend / vnd vorlangist von Gott jnen zü schedigen erloubt. So denn ist nit yederman gsyn wie diser Nabal/sunder es ist wol zü vermütten / Das vil eerlicher lüten im land hin vnd her / fry willig jnen die hand heimlich gebotten/vnd tägliche hilff geth̄/etliche ouch villicht vß forcht Das sy nit von jnen geplaget wurdind. Die wyl aber unlougenbar was / Das sich Dauid vnd sine knecht/wol an des Nabals knechten gehalten hatend/solt er jnen joch etwas mitgetheilt haben. Dann ouch die heyden denen güts thünd/die jnen güts thünd.

Bitt.

Daruf thüt Dauid durch dise Botten sin bitt/laß die jüngling gnad finden vor din̄ ougē. Das ist gewär vnß vnser bitt/halt dich fründlich gägen vns/vand laß vns etwas volgen vnd werden. Dann wir sind vff einen güttentag kommē. Wen es einer recht trifft/er kompt vff ein zyt, wenn man mit spyß vnd tranck wol verfaßt ist / so versagt man einem dester minder sin bitt / man sagt er sye mund sällig: etwan ist man vnwillig / wann kein vorradt vorhan

Sie ander Predig.

11

vorhanden / vnd man erst das beschicken das man begär / oder selbs mangel haben muß. Demnach wenn man frölich ist / ein güten mütt mit ein anderen hat / so ist man gemeinlich ouch anderen / die etwas begärend / dester gneigter. Man sagt / lassend den mit vns frölich sin / es ist hütt ein jars tag / ein fröudentag / ic. Herodi wirt nit vmbillich vßgelegt / das er vß sinen geburts tag / an dem er ein kösilich pancket sinen haupt vnd dienstlütten hat lassen halten / den h. Joansen den töuffer in der gfängknus enthaupten ließ / vnd inn nit desse ließ gniessen / das er vß den selben tag geboren / vnd deshalb mit sinen dieneren ein frölichen mütt hat. Also solt Nabal vß diesen tag / dise Botten munder enteeret habē / das zu anderen zyten. Gib dinen knechten vnd dinem son David / was din hand findt. Sy nennend Davids Kriegsküt / Des Nabals knecht vnd diener / iren herren sinen son / frylich von des wägen / das Nabal der elter was. Dann das ist gemein in der geschrifft / das die jungen alte betagte man / ire vätter nennend / alte betagte wyber ire müteren.

Sy meldend ire Bitt widerumb / vñ schrybend inn nit für / was oder wie vil er jnen gäben solle / sy stellend siner bscheidenheit beim sagend er solle jnen mittheilen was sin hand finde / das ist / was in sinem vermögen / vñnd sin güter will sye. Begärend sömliche mit

B ij

Von dem Nabal

fründtlichen Worten / weñ sy vnwirs mit jn
gryn / vnd in wellen müssen / so wäre sich nit
zuerwunderen / wenn er sy abgwissen. Aber
sy demütigend sich / nennend sich wie gmäl-
det / sine knecht / iren herren / den Dauid sinen
son. Nun sol aber einen an sine knecht vn kind
nichts rüwen. Wo man mit vernünftigen lü-
ten zu handeln hat / so bringt das vil by jnen /
wenn einer mit fründtlichen Worten der hilf
vnd gnade begärt / sich demütiget / selten laßt
man solich lüt ungeeeret hin gan.

Sise ire bitt was zimlich vnd rächt: dan es
was ir meinung nit / das er jnen so vil gaben
solte / das er mit den sinen müste mangell-
den / so begärend sy nichts das vneerlich / od
dem Nabal vnmüglich / oder in einigen wäg
nachteilig od beschwerlich wäre. Wenn einer
vom anderen etwas vnbillichs oder vneer-
lichs begärt / so sol er in seiner bitt nit gewä-
ren. Oder ist das nit ein gut herrlich werck /
weñ einer de der hungers not liden / die hand
bietet: Nabal solt von jm selbs / vngedärten /
dem Dauidem der sin herr was / vnd den si-
nen / ein erliche schäncke gethan haben. 2.
Samuelis am 17. cap. So Dauid gen Ma-
henaim kã / brachtẽ Sobi / Mahir / Barsilai /
Betrwand / becki / jrdine gschir / weizen / ger-
sten / mäl / sengelforn / bonen / linse / kysel / ho-
nig / ancken / schaff / vnd gemästere rinder zu
Dauid: dan sy gedachtend (wie der text mäl
det

Sie ander Predig.

12

der Das volck wir hungeren/müd vnd Durstig sin in der wüste.

Vß disem fürtrag aber der Botten Davids lernend vnd sähend wir/volgende stuck. Erstlich das Gott erwan sine fründ vnd diener in grossen hunger / ouch ander crütz vnnnd liden steckt. David was ein frommer Gottesfürchtiger man/ vnd vmb vnschuld von dem sinen vertriben/sind dann glich vnder denen 600. kriegslütē erlich heilöß lüt gsyn / so sind on zwyfel vil frommer luten auch vnder inē gsyn/noch lydend sy den gälligen hunger. Es sagt wol David im 37. Psalmē/ Ich bin jung gsyn/vnd bin alt worden / vñ hab nit gsehen das der grächt verlassen sye/vñ das sine kind syend vmb Brot gangen: So sagt sin son/der wyß Solomon in sprüchwörteren am 10. capitel/der herr gstatte nit / das der frommen seel/ das ist/ ein frommer gläubiger mensch hunger lyde/ da müßend wir aber darby verston/es sye dan das Gottes eer vnd des menschen heil ein anders erfordere. Dann es wil Gott erwan frommer lüten glouben / gedule vnd ghor:same anderen fürstellen/die ee hunger vnd mangel lyden wellend/ dann von erkanner waarheit abfallen/oder anders thun/das wider jr pflicht ist. Demnach wil er daß sy erkennind / das er vns spyse vnnnd erhalte. David hat vorhin ouch / als er zum obersten puester kam/vnd die schouwbrot begärt/hun

Die gläubigen lyden etwas grossen mangel

B iij

Von dem Nabal

ger glitten. Die h. Apostel rupftend ärin ab/
als sy durch die saat giengend / vñ assend die
kernli daruß / von hungers wägen. S. Paulus
schrybt von im selbs in der ersten vnd an
deren zun Corinth. er habe hunger / durst /
vnd blöße erlitten / das ist / er sye nit allwägē
wol Bekleider gsyn / vnd deßhalb übel erfro-
zen. Vil h. martyrer hat man in gfencknuß
hungers / dursts / frosts lassen stürben vnd
verderben. Christus vnser herr hat selbs etli-
che mal hunger erlitten. Ob aber gleich Gott
das sinen widerfaren laßt / gibet er inen doch
waaren glauben / liebe / gedult. Mit disen ex-
emplen aber söllend wir vns in hungers not
vnd in allem anderen lyden trösten vnd ge-
dencken / dise sind ouch Gott lieb vnd sine kin-
der gsyn / nach habend sy nit allwäg alle völle
ghept: Darumb wilt des rüffels yngäben nit
loßen / der da sagt / Wärest Gott lieb / er ließ
dir nit hunger / er weyßt nichts von dir / oder
er haßet dich. Der böß syend hat den Son
Gotts selbs / als in anfieng hungeren / nit vn-
uersücht glassen / ic.

Wie wir
vns in hun-
gers not
halten söll-
ind.

Semnach lernend wir ouch by Davids
vñ seiner friegslüiten exempel / wie wir vns in
hungers not söllind halten. Er nimpt disem
Nabal das sin nit mit gwalt / er sagt nitt / ich
wil mit im theilen / solt er so vil schaaff vnd
geyßen haben vnd wir eerlichen friegslüt
sölted den gelligē hunger lidē? solt er ein tag
vnd

vnd alle tag voll syn / vñ wir weder zübyssen
 noch zü Bräcken haben? Dann die grächtig-
 keit ist ein söllliche tugend / die ein yeden by
 dem sinen schirmp. S. Paulus leert zü den
 Ephes. am 6. Wär gstolen hat / stäle nit mer /
 sonder arbeite mit sinen händen / Das er zü
 ässen habe / vñnd ouch anderen möge zü hilff
 kommen. Wie gemein ist aber das zü vnseren
 zyten / wenn einer hunger lydt / das er einem
 anderē das sin heimlich oder offentlich nimt /
 oder anders trybt / das wider Gott ist / vñnd
 dann sich mit dem schönen wil / das er sagt /
 Ich hab nichts zü ässen ghebt / der hunger hat
 mich darzū getriben? der hunger ist wol ein
 böser radtgäb. Darumb der wyßmann Pro-
 uerb. am 30. Gott gebätten hat / das er jm nit
 zgroß güt gebe / in ouch nit in grosse armüt
 stecke / sond jm sin nodturfft lasse werden /c.
 Es sol aber ein Chrusten mensch dem bösen
 radtgäben nit volgen / nit alles böses enfahē /
 sonder gedencē / was du nit wilt / das thū
 einem anderen ouch nit. Er sol vff Gottes
 beradt warten / nit stälen / nit mit vnerlichen
 mittlen sich vß hungersnodt vnderston zü
 entschütten. Es ist wol mer mittlyden mit eis-
 nem zü haben / der vß hungersnodt ein an-
 griff thūt / weder mit einem anderen / den die
 nodt nicht trybt / doch ist rächt rächt / vñnd sol
 einer dem anderen das sin ligen lassen.

Wyter sichst / was grossen vnderscheid is

B v

Von dem Tabal

Kriegslüt
zu vnseren
zeiten.

zwüschend Dauids Kriegslüten / vnd denen
zu vnseren zyten. Dann sol man grad von de
nen sagen / die anderē zu hilff kōmen / vnd ire
fründ sin soltend / so ist vor jnen nichts sicher:
vil so in den Besatzungen der stetten zu schirm
einer Burgerschaft ligend / plagend die armē
Burger mer / dan ire abgsagte syend. Wohin
sy zühend / sind vor jnen nit nun hūner genß
vnd enten nit sicher / sonder ouch vch vnd
anders / man dörfft alles vor jnen zu flöchnē /
wie vor den Heiden od Zigineren / das wōls
lend sy alles mit d armūt verantworte: Frem
es sye der Bruch in kriegen. Was wil man a
ber von Kriegslütē sagen / da man weißt / das
ouch die so vñ das heilig allmūsen gond / vff
den einzigen hōfen etwan die wyber zwins
gend / daß sy jnen gebē müßend / was sy nun
begārend / oder trduwend sy wōllind jnē ein
roten hanen vff das huß setzen / vnd dermas
sen mit jnen handeln / daß sy beyd hānd ob dē
houpt müßind zusamē schlagen. Ja mancher
vatter hat kinder / die jm By nacht vnd näbel
das sin vstragend / vnd das selbig mit lieder
lichen lüten üppigliche verthünd. Dise kōns
nend nit wie hie David / mit der warheit sas
gen / es manglet dir nichts / sonder yetz ist er
vmb diß / denn vmb yenes kōmen. Sy wōls
lends mit dem verantworten / sy syend irer els
teren rächte vnd natürliche erben / vnd hand
lend aber dermassen / das ire fromen elteren
offt

offt selbs müßend armüt vnd hunger lyden. Thetend sy es vß hungers noht / so wäre es aber vmb etwas lydenlicher.

Ferner habend wir ouch im Dauiden ein Ein byspil der bescheidenheit. exempel der Bescheidenheit vñ demüt. Da er vil hette mögē anzühen / wie er offt in stürmē vñ stryten sin läben ritterlich gewagt / da diser Nabal wol als bald darzwischen im dampff gessen: Itē wie er nit nun dem stamen Juda (vß welchem diser Nabal ouch bürtig was) sond der gantzen kron Israell eer ynglegt / dz er Sauls tochterman / vnd ob er glych yetz in vngnaden wäre / deß nächsten tags by im widerumb möchte zügnadē kōmen / item wie er an sin statt zü König gesalbet / mittlerzyt im möchte nütz vnd schad syn / vñ anders derglychen / ic. So erzelt er schlicht oben anhin vnd kurz / das zum handel in sondheit dienstlich was. Er neñt sine kriegslüt / sine / deß Nabals knächt oder diener / sich sinē son / erkent in für ein vatter. Wäre Dauid hoffertig gsyn / er hette sich nit wöllen dermassen demütigen / sond hette sich übel geschämt / weñ er von einē anderen Nabals son wäre gneñt worden / er hette in gnüßet diß oder yenes im zügeben: hette gsagt / wir wöllend sähen welcher der stercker sye. Darumb söllend wir vns mit im lernen demütigen / sonderlich vor Gott dē Herren. Dann die hoffertigen hasset er / den demütigen gibet er sin gnad vnd sägen.

Von dem Nabal
Von des vertruncnen
Nabals läben vnd
tod/te.

Die dritt predig.

Wie Nabal sich gegen den boten Sauids vnsründelich erzeigt/vnd jnen ein abschlegige antwort geben habe.

Vnnd als die jüngling Sauids kommen warend / haben sy alle dise wort mit Nabal von Sauids wägen gredt / vnnd habend gschwigen. Vñ Nabal gab antwort den knechten Sauids vnd sprach. Wär ist der Sauid / vnd der son Jsaie? Es werdend yetz der Knächten vil die sich von jren Herren ryssend. Solt ich mein brot wasser vnd fleisch nemmen das ich für mine schärer Kochet oder gemetzget hab vñ solte es lütē gābē da ich nit weiß wo hār sy sind? So karend sich die jüngling Sauids widerumb vff jren wäg / vnd als sy widerumb

Sie dritt Predig. 15

derumb kamend erzaltend sy im alle
dise wort.

Wie Dauid sine Boten zum Nabal
abgefertiget / vnd fründlich von im
begärt habe / das er im etwas pro-
uiant / was sin güter will wäre / wöl-
le mitteilen / angsehen das er vnd sine kriegs-
lüt / sinen knächte in vil wäg wärind beholf-
fen gsyn / ic. habend wir in der vorigē predig
gehört: Jetzt volget was sy für Bescheid by
im funden / vnd was er jnen für ein antwort
geben. Doch wirt vorhin angezeigt / die Boten
Dauids syend zum Nabal kommen / vnd wie
sy in jres Herren nammen / jren fürtrag ge-
thon / vñ alles das mit im geredt / das er jnen
empfolhen / habind sy geschwigen / oder ge-
rürwet / vnd vff ein fründliche willfarige ant-
wort gewartet.

Sie habend wir ein exempel trüwer Bot-
ten / die ein sach mit floyß vßrichtend: sy habēd
nichts dahindē gelassen deren dingen / die sy
in beuelch gehebt. In wysen sprüchen Solo-
mons stadt am 25. Cap. Wie die kelte des
schnees zur zyt der ernd / also ist ein trüwer
Bott denen die in sendend / vnd er bringet die
seel eines Herren zu rüwen. Am 13. cap. ein
gottloser Bott wirt in das böß fallen / ein
waarhaffter Bott aber / ist wie die gsundheit.
Die zähen späher die Moses vßschickt / mach

Die Boten
sollēd trüwe
syn.

Von dem Nabäl

leñd das volck verzagt / Die zwen aber / Die
trüw warend / habends tröst / ic.

*Dauid woz
wöl erkant.* Daruf volget Nabals antwort / welche
gar vnfründlich vnd vnbescheiden ist. Dann
er fare sy rüch an / vnd spricht / Wär ist der Da
uid? Dauid ist nit so vnbeant gewäsen / daß
er nichts habe von im gehört: es wußt doch
das kind vff der gassen von im zusagen.
Dann als er im Philister krieg ein kampff
mit dem Goliath gethon vnd in vmbriacht /
süngend die töchteren vnd wyber in den stet
ten hin vnd här / in iren reyen / von diser rit
terlichen thadt. Demnach was vßgebrochen
wie er vom H. Prophetē Samuel an Sauls
statt zum künig wäre gsalbet. Dann Jonath
an vnd der künig Saul selbs / sagtend er
wurde an sin statt künig werden. Abigail
bekant glychs ouch. Wie vil krieg hat er sid
här glücklich vßgeführt / daruon man wyt vnd
breit gesagt hat: Es zwyflet mir nit / er habe
sich vorhin offt grämt / daß einer vß sinem
stamen so grosse rühwürdighe thaten gethon.
Wie dan sonderlich die im bruch habend / die
sich übel haltend / daß sy sich gern irer altfor
deren / oder anderen die jnen etlicher gstat
verwandt sind / vñ eerlich handlend / rühmend
vnd von jnen vil sagend. Darumb geschicht
dise frag war dann der Dauid sye / vß luter
verachtung: Wie der künig Pharas zum
Moyses vnd Aaron den dieneren Gottes sagt /
wär

wär der Jehoua sye/ dem er solte volgen? Zu
 vnseren zyten/ da man vß H. Göttlicher Ge-
 schufft/ vñnd sonderlich vß den Epistlen des
 H. Apostels Pauli/ falsche leerē von vnserem
 verdienst vñnd von anderen stucken / wider-
 sochten vñnd gwaltig gestürtz/ habend ouch
 vil gfragt/ wär ist dann der Paulus? Da sy
 wohin wol von jm ghdit / ja jm ouch Gött-
 liche eer habend wöllen bewysen. Das aber
 ist jr meinung/ was fragēd wir Paulo nach?
 wir wöllend ein ding machen wie es vns
 gefalt.

Wär ist der son Isai? Der Saul nandte den Isai
 Dauid ein son Isai/ vß verachtung/ villiche
 darumb daß sin vatter Isai oder Jesse ein
 frommer schlächter landman was/ vñnd diez
 wyl er der sönen vil hat / nit überig ryck syn
 kondt/ vñ vil pracht tryben/ Das aber was jm
 kein vneer. Wenn man im grund daruon re-
 den sol / so hat Dauid herrlichere elteren ge-
 hebt/ dann der Saul. Darumb hette er desse
 nit bedörffen / daß er so verachtlich von jm
 redt / es was nit so gar lang daß Saul ouch
 ein purenknab gsyn was / vñnd seines vatters
 esel gsücht hat/ &c. So hette in Nabal ouch
 wol lassen blyben/ sy beyd Dauid vñnd er/ wa-
 rend vß einem stammen/ aber wie die stamē
 der gschlächten vil hattend / so was Dauids
 gschlächte das aller herrlichist / von des wä-
 gen daß vß dem selben der Messias nach

Von dem Nabal

menschlicher art vnnnd natur/von einer heiligen jungt frouwen solt geboren werden.

Also findest noch hüt by tag lüt die sich ires härkommens rümennd/vnd näbend jnen oft andere verachtend / die aber vil fürträffenlicher sind dann sy/gschlächts vnd anderer dingen halb.

Nabal laßt es darby nit glyben / sonder schmächt über das deß Sauiden friegslüt auch/vnd sagt/Es werdend heß der knächten vil die sich von iren herren rüffend/ das ist/ Es wil deren züwil werden/ es wil kein end mit denē syn/es loufft deren das land voll die sich von iren fürsten/ Herren vñ oberen abwerffend/ die jnen schuldige pflicht vnnnd ghorsame nit wöllend leisten/man nennt söliche gemeinlich

Sie vnder
thonen söls
lend irer os
berkeit ges
horfamen.

rebellen. Das ist ein schwar laster wenn die vnderthonen sich gegen iren herren/ in zimlichen billichē sachen / vngehorsam erzeigend. Dann die H. Gschrifft leert/das ein yetlicher sinen herren vnnnd oberen ghorfame leisten/ vnd jnen alles das gütwillig bezalen sölle/ so er jnen schuldig ist/ als da sind/tribut/schatzung/zoll/gleit/vmbgält/ vnd anders. Die ort der H. Gschrifft darumb anzüzüchen ist nit nodtwendig.

Die lybeig
nen iren
hals herrz.

Demnach sol auch ein yeder knächte oder lybeigner mann/sinem halsherren ghorfamsyn / nit von im louffen/vnnnd sich mit gwalt wöllend in die fryheit setzē. So aber ein Herr
in der

Sie dritt Predig.

17

In der Knächtschafft gütwillig erlaßt / so sol
vnd mag er die selb fründschafft wol annem-
men. Corinth. 7. cap. Sonst aber den Kopff
vß der halstere wollen zühen / wie man sagt /
das ist vnrecht / vñ von Gott verbotten. Das
rumb diß nit ein kleins ist / daß diser Nabal
vom Dauiden vñnd sinen kütten vßgibt / sy
syend irem natürlichen herren dem Saul vn-
gehorsam / oder widerigind sich ouch sonst an-
deren iren herren ghorssamme zü leisten. Dañ
er mocht wol wüssen / wie es dem Dauiden
gieng / wie er vnschuldlich von dem künig
sinem schwäher dem Saul / veruolget ward:
daß keiner dem Saul trüwer gsyn / welchs er
mer dann ein mal mit der thadt bewisen hat.
Demnach das vil vnder denen die sich zü im
geschlagen / allein von des wägen nit sicher
warend / da sy dem Dauiden gefründt / oder
sonst güts guntend / vñ ein groß mißfallen
hattend ab dem müwillen vñnd der grossen
tyranney des künigs Sauls. Wustet es
dann nit / so solt er vorhin gfraget / vñnd der
sach baß nachgründet haben / ehe er die bösen
schandtlichen wort hette vßgossen. Warend
gleich etlich vnder Dauids Knächten die vil-
licht ire mengel hattend / so solt er doch den
vnschuldigen des schuldigen nit haben lassen
entgelten / sy hattend jm doch kein leid / sons-
der vil güts bewisen. Es mag einer / sagend
wir / ouch an einem mörder ein mord begon.

C

Von dem Nabal

Mit armen
lütten sol
man nit vn
willig syn.

So du zün zyten ouch vn willig wirst/ ar-
men lütten din allmüsen mitzuteilen / so ges-
denck an disen Nabal/ vff daß du dich nit etz
wan an einem armen menschen/ wie diser am
fromen Dauiden/ versundigist. Nabal sagt/
es louffe das land voll deren knächten/ die
an iren herren vntrüw syend. Vns thüt vil
nöhter zü klagen/ dann das ganz land louffe
vollen starcker Bättleren vnd stirmenstößlen.
Vor zyten hat man sich deß Bättels iibel Be-
schämpt/ yetz schämpt sich nieman deß selbē/
sonder es stond yemer dar nütwe Bättel ordnen
vff. Etlich zühend im land umbhin vnd gä-
bend sich für handtwerckslüt vß/ klaged sich
sy findind kein arbeit/ so man sy aber anstel-
len wil/ so machend sy sich hinweg. Etlich sas-
gend sy syend schryber vñ süchind dienst. Vil
gebend sich für studenten vß/ lernend einen
in Latin vmb ein zeerpfennig ansprächen/
vnd so man wyter mit inen Latin reden wil/
so wüßend sy nichts. Andere gond mit ander-
em betrug vmb. Es sind mertheils lüt die nit
arbeiten mögend/ vñ was sy mit Bättlen vff-
bringend / vnnütziglich mit prassen/ spilen/
üppigen wyberen verthünd. Dise all solt ein
ersame oberkeit zur arbeit wysen / vnd ire
vnderthonen wider sy schirmen. Wo aber sö-
lich nit beschicht/ so ist es wäger / einer der
es vermag / gebe zähen büben / dann das er
ein fromen / an dem es wol anlegt/ abwyse.
Man

Sie dritt Predig. 18

Man sol die frommen / deren Büben die im
Land umbhin louffend / nit lassen entgälren.

Über das sagt er: Solt ich min brot / wasser /
vnd fleisch / das ich für mine schärer grüßter hab /
nemmen / vnd es lüten gäben da ich nit weiß wo
här sy sind? Das wil er sagen / wäre ein grosse
vnbilligkeit / wenn ich denen sölte mangel las-
sen / die mir gearbeitet vnd übel zyt gehebt /
vnd sölte das min anderen lüten anhängen
die ich nit kennen: wie dörsend jr mir das
nun zümüten? Er nennt Brot / demnach was-
ser / verstadt durch allerley tranck / als da ist /
wijn / Bier / hochbaumer / &c. wol darby zü wüß
sen ist / das in denen heissen vnd dürren lan-
den wie Palestina / grosser mangel an gutem
Brunnen wasser gsyn ist / man hat es etwan
ein ferren wäg müssen holen. Wie ouch an
etlichen orten in vnseren landen im heissen
sommer / anno 1540. beschähen ist / welches
sonst vil güter küler / gsunder Brunnen vnd
wasserflüssen allenthalben hat. Darumb ist
das ouch ein güthat gsyn / wenn man einem
ein güten küler tranck wasser gebotten hat:
Durch sin köcht / verstadt er allerley spyß /
Brot vßgenommen / welches er hie insönder-
heit benamset. Er nennt sin Brot / wasser vnd
fleisch. Wenn man aber im grund darvon re-
den sol / so habend wir nichts eigens / sonder
was wir habend / ist Gottes gab. Dann offe
zwen glychlich arbeitend / aber einem glückts

In palestina
ist man
gel an gü-
tem wasser

Von dem Nabal

Gott / Dem anderen nit / 20.

Wenn wolt er gedacht haben / wenn dise
Friegslüt nit trüw an mir gewäsen wärind / so
hette ich mine schaaff bald beschoren : aber sy
habend sy geschirmpt / Darumb solich jren nit
weniger ein rächnung haben / dann der schä-
reren. Das aber hat jm niemand zügemüet /
Das er das yänig so er anderen zügrüestet / als
les den Friegslüten solte geben / sonder hat-
tend nit mer von jm begärt / dan was sin gü-
ter will wäre / desse er wol möchte manglen :
hattend jm gar nichts wöllen fürschriben.
Ja hattend deß tags gfaaret / vff den er spyß
vñ tranck rychlich hat zühin gethon. Er was
hordrych / vermocht wol das er sinen knäch-
ten vnd ouch anderen zü ässen gebe / dann her-
nach / do die Abigael / jm vnwüßend / dem
Dauidē ein schäncke bracht / deren er gar wol
züfriden / hat er / der Nabal / vnnd sine knäch-
t / noch mer dan gnüg zü ässen vnd zü trincken.
Dan er ward als voll / als d gesten keiner / vn
stadt / das er ein künigklich mal habe zügrüest.

Nabal gibt
sinen arbei-
teren gnüg
zü ässen.
Darby ist sich züuerwunderē / Das er den-
nocht sinen arbeiteren ein sölich köstlich mal
zügerüestet hat. Dann du findest lüt / die jren
diensten / taglöhneren vnnd arbeiteren / nit ein
güten Bissen gunnend : Sy lassend das fleisch
stinkend werdē / das Brot schimlig / das ops
ful / ehe sy es jnen härfür gebind. Sye der ein
vnmensch gsyn wie er wölle / so hat er den-
nocht

Sie dritt Predig. 19

nocht vff diß mal äßen vnd trincken rychlich
sinen wercklütten fürgstelt. Es habend ouch
die Heiden gleert/ das man den gedingeten
diensten/lybeignen lütten/vnd anderen arbei-
teren/ir gebürende spyß vnd tranck solle las-
sen zülieb werden.

Was ist aber das für ein entschuldigung/
da er sagt/er wüßte nit wohär sy syend? Es
was doch vmb ein fragen zethün / wenn ers
gern gwüßt hette. Er wußt wol/das sy mere-
teils vß sinem stämen warend. Wenn sy aber
glych vß India / oder anderen feeren landen
gsyn wärind/ so solt er nit so vnfründlich ge-
gen inen gsyn syn / sonder ein mittlyden mit
inen ghebr haben / joch vmb deß willen/ das
sy menschen vn hungerstort warend. Er hat
offt ghört/wie Gott sinem volck die frömbde-
ling vnd ander arm lüt so ernstlich empfol-
hen/daruon du villifest.

So habend wir verstandē/ wie sich Nabal
gegen den Gotten Davids gehalten/namlich
das er sy nit nun lār hat gon lassen / sonder
über das wol beschelck/vnd mit bösen woz-
ten überschüttet. Welchs ein grosse schmaach
vn vnbilligkeir gsyn ist/ ouch einem eerlichen
gemüt weethüt. Wie vngübürlich aber diß
gsyn sye/ wirst du noch eigentlicher verston/
wenn du alle vmbständ flyssig erwigst.

Wär ist der gsyn/ so dise abschlegige ant-
wort geben hat? der rych Nabal/dē es nichts



Von dem Nabal

geschadet/wenn er glich vil hette geben.

Wie umbe
David zeit
grad an/
wie vnbilli-
cheden Da-
bals ant-
wort se.

Welchem hat er ein solche antwort geben?
Dem Sauiden der vß sinem stamen/vnd sin
herr was/vnd des Königs tochtermann/der
nit nun vff diß mal dem Nabal vil güts be-
wisen hat/sonder ouch vorhin: vnd sich des
halb güts zü jm versach/vnd jm wol truwet.

Er hat dise antwort geben Sauids gesan-
ten Botten / da die natur leert / das man die
Botten wol vn̄ eerlich/nit schmechlich / halten
sol. Dann vß dem selben offft schwäre Krieg
erwachsen sind.

Er hat dise antwort geben den anderen
Kriegslüten / die arm vnd hungerig warend /
vnd im ellend umbhin zugend. Da man all-
wägen mit armen vertribnen vn̄ vndertruck-
ten rächtlosen lüten ein mittlyden haben sol.

Wen hat ers gethon? Vff dē tag / an dem
er ein herrlich mal rüstet / zü d̄ zyt da David
vnd sine knächt hungerig vnd der hilffnodt
wendig warend.

Wie hat er jnen geantwortet? Mit grosser
vnbscheidenheit/wie wir ghört habend.

Warumb? Darum̄ das kein Gottsforcht
liebe/noch bscheidenheit in jm was / darumb
das er frömbd lüt hasset.

Nabal solt
von jm selb
Sauiden
etwas ges
ben haben.

Wenn vernunfft vnd verstand in jm gsyn
wäre/so hette er von jm selbs/vngebättē / vff
disen tag jnen etwas lassen werden: er hette
sin rächnung gmacht/sy habend dir güts ge-
thon/

thon/ vnd mögend es wyter thun / du magst
 nit wissen/ wo du jren bedürffen wirst. Dar-
 rumb wilt du jnen das best thun. Gebest jnē
 nichts / so möchtend sy es mit gwalt neimen/
 Dann der hunger ist ein böser radegab/ einem
 hungerstottigen menschen kompt gar wun-
 derbar ding in sinn. Item/ David wirt des
 nechsten tags mit dem König widerum eins
 oder er wirt König / wie müßtest du vnd die
 Dinen/ desse so übel entgelten/ wenn du sy vn-
 geeret lieffst hingon? Jetzt wil ich von dem
 nichts sagē/ das vns Gott notige lüt besilcht
 vnd grosse verheissungen thüt/ wenn wir vn-
 seren nächsten die hand bietend/ ic.

Sette er jnen dan nichts wöllen od fönen
 geben / so solt er sy doch mit güten fründlichē
 wortē abgefertiget haben vñ gsagt: Ich wöls-
 te gern nun best thun/ aber vnder so vil lüten
 mag es nichts beschliessen/ es ist gedlingē an
 mich komen / ich bin yetz zūmal nit nach nod-
 turfft verfaßt/ ein andermal wil ich sähē/ wie
 ich der sach thūye / oder anders derglychen.
 Aber das thüt er nit/ sond howt gut spen ab/
 wie man sagt/ schon niemants. Es beschicht
 gemeinlich weñ einer einen armen beschelet/
 Das er jm hernach etwas gibt / da er jm sonst
 glich nichts gebe/ wil er jm dan nichts gābē/
 so sagt er berade dich od helff dir Gott. Aber
 Nabal brucht alle vnbescheidenheit.

Was lernēd wir vß disem allem? Erstlich

E nū

Von dem Tabal

habend wir ein trost/ wenn lüt/ zu denen wir
vns vil gûts versâhend/ vns fâlend/ wenn sy
vns/ vnser zimlich Bitt abschlahend/ so sollêd
wir gedencfen/ das es Sauten vnd anderen
fromen lüten ouch also ergangen ist/ wir sol-
lend ouch gedencfen/ Gott entzücht vns allen
trost der menschen/ das wir im allein anhan-
gind. Die Samaritani wolten Christum vn-
sine jünger nun nit beherbergen/ Luc. 9. cap.

Wir habend ouch ein exempel deren lüten/
die/ so man sy fründelich Bittet/ erst vnwirsch
werdend. Wir sagend/ Ertlichê wenn man sy
lang Bittet/ grosse d kopff. Doch so mag syn/
das wen sy glych die rûhe gegen im gebucht/
sy doch wenig by im hettind vßgricht.

Eigenschafft
Der gytigen
vnd truncten
mens.

Ferner habend wir ein byspyl/ wie die gytigen vnd truncten lüt geardet syend. Da die gytigen soltend eergeb syn gegen menig-
klichem/ vnd gedencfen/ das sy allein schaff-
ner über jr zytlich gût gsetzt wârind/ da wol-
lend sy sparen/ habend ire vßreden/ sagend/ sy
habind kind vnd kindskind/ denen müßind sy
etwas hinder sich halten / wendend ouch das
alter für/ das vil Bruche/ flagend sich/ wie sy
nichts habind / da sy in grossen gût sitzend:
verwoßend den armen/ warum sy nit in irem
land bybind / warum sy nit gearbeitet ha-
bind/ das sy yetz nit von huß zu huß jr narüg
müßten sûchen? Schâltend etwan die übel
deren thun vnd lassen inen gar unbekant ist.

Das

Das aber gadt daß hin an denen/ die nach
der wält züreden/eigens Besizend/weder an
gemeinen dieneren die vntrüw sind / vnd das
denen die es verdient/ oder armen lüten/ nit
lassend werden/das sy inē zü gäben schuldig/
vnd darzū von iren herren geordnet sind/ 2c.

Die truncken wenn sy glych onch gytig
sind/so rüwt sy doch nit an die praßer/nötis-
gend sy vil zütrincken / vnnnd köntend sy das
faß mit dem wynn in sy stossen / sy wurdend
nit sparen: In d wynnfüchty sagend vñ thünd
sy vil/wie hie der Nabal / das inen hernach
zū grossen vnstatten kompt. Dann der wynn
(wie der wyß man in sinen sprüchwörteren
sagt) macht verspötter. Wie offft beschicht das
die so tag vñ nacht by dem wynn sitzend verz-
rucht werdend/Gott vnnnd die wält verspotz-
tend: Sy mögend güten sachen nur nit nach-
trachten/sunder trachtend allein wo sy güte
gsellen findind/vñ wo man gütt wynn schenck/
sy thünd on alle forcht woz sy glust vñ glangt.
Sind sy dan über das rych vnd gwältig wie
diser Nabal / so gfallend sy inen selbs erst
wol / vnnnd meinend man solle an allem dem
das sy sagend vnnnd thünd (sye glych wie es
welle) ein groß wolgfallen haben vnnnd solle
inen nieman ynreden.

Es wirt vns auch ein exempel einer gros-
sen vndanckbarkeit im Nabal fürgestellt. Ein
yeder verstat von natur/das er sich danckbar

vndanck-
barkeit.

Von dem Nabal

erzeigen sol/gägen denen die im oder den si-
nen güts thünd/kā er nit wyter/so sol er doch
inen dester günstiger syn. Nun hat Dauid/
wie da oben gemäldet / diesem Nabal güts
thon/mit dem das er im sine schaaff vñ geys-
sen hat beschirmt. Jetz wil ich von dem nit
sagen / das er vnläng darvor die Philister/
die in das land gefallen warand/ vñ Ceilan
die statt hattend belägeret/mit sinen kriegs-
lütten vnuersehenlich überfallen/vnd hinder-
sich geschlagen hat/da wol so bald wenn diß
nit beschähen diser Nabal vñ andere von inen
hettend mögen geschediget werden. Ich wil
von anderen krieggen/ die Dauid für das ges-
mein vatterland gefürt/vnnd in denen er sin
lyb vnnd läben ritterlich gewaget hat/nichts
sagen/darfür solt im Nabal danckbarkeit er-
zeigt haben/das thüt er aber nit / versagt im
auch das klein das er von im begärt/vnd wi-
dergiltet im böses für güts / welches er nit
solt gethan haben. Wie ist aber zü vnseren zy-
ten das so gmeyn/das wir vnseren herren vñ
oberen/predigeren/elteren/leermeistern/we-
nig danck vmb ire güthaten bewisend? Wir
könnend allerkennen/das es diesem Nabal ü-
bel angestanden/das er so vnerkant gsyn/Bes-
serend es aber an vns selbs nit/Bruchēd ouch
etwan vnser mul / wider die so vns güts
thünd/vnd erzeigend vns ouch in anderwäg
nitt wie wir söllend/sunder wie hie diser ar-
bentse

benesällig mensch gethan hatt.

Lern ouch/wie es so ein arm Ding ist/wen
einer von dem sinen vertriben wirt/vnnd im
ellend vmbhin zühen muß. Ein yeder darff
jn verachten vnd schmähen / wie es hie dem
David gieng. Wäre er nach bym künig am
hof gsyn/er hette jm nichts Dörffen versagē.

Vber das alles sähend wir/was gläubige
lüt sich zu den Nabalen hüt Des tags zuuer-
sähen habind. Wie diser die Botten Davids
übel enpfacht vñ vshüppet/also gadt es nach
mit den gläubigen/vnd wirt also gan biß zu
end der wält. Es werdend allwägen lüt syn/
vnd hufet sich der selben zal von tag zu tag/
die sy werdend schmähen/sonderlich die die-
ner der kirchē/die vō Gott gsende sind. Dan
also ist es von ye wälten her ergangē. Achab
schalt den frommen yferigen propheten He-
liam/er machte groß vnruw in Isrel/welchs
d prophet dapffer verantwortet/vñ anzeigt/
es bschähe jm vngütlich / der künig vnd sin
gmachel die Iesabel/syēd an allē jamer schul-
dig/2c. Die h. Apostlē/ja vnserē herren Chri-
stum selbs hat man ankagt/ sy syend vfrüerer
Was ist gmeiner dan das man trüwe diener
Gotts vff dē hütigē tag vfrüerer schilt/die ein-
treñung vñ spaltüg machtind/diewyl sy vom
Römischē stül abgfallē: mā gedēckt aber nit
das sy von abgöttery vnnd falscher leer/nit
von dem waaren glauben / vnnd von dem
wort Gottes: Das sy von der roten kilchen

Die botten
Gotts wer-
dend übel
empfangen

Von dem Nabal

vnd nit von der waaren kilchen abgefallen
sind/vnnd das sy des gütt füg vnnd macht
gehept habind. Dann vnser herr Christus
warnet sine gloubigen vnnd spricht /flü-
hend von Babylon. Siemyl aber Dauiden/
ja vnserem herren Christo selbs / das wider-
faren ist/ das man sy verfürer oder trüwlose
geschultē/so soles vns/so vns glychs wider-
fart/desten weniger zuschaffen gäben/söllēd
es dultig vnd willig liden.

Zum beschluß stadt/ das Dauids Diener/
wie sy nichts erlangt / sich widerumb vff die
straß gemacht/vnd irem herren vñ haupt-
man alles ordenlich erzelt habind/was sy vß
gricht. Da vns aber ein byspil trüwer botten
vnd dieneren fürgstelt wirt. Dañ wie sy flyß-
sig vßgricht habend/das inen befolhen was/
also erzellend sy ouch wie sich Nabal gehaltē
hab/vñ lassend nichts dahindē. Wol das dar-
by ouch zmalden ist/das die diener so vō bson-
derbaren personen geschickt werdend/nit all-
wäg schuldig sind/alle wort denen die sy vß
schickend vnd alles was inen begägnen an zū
zeigē. Dañ wañ sy das selbig thetind/so brä-
chte es oft grossen nyd vnnd haß / vil ver-
wissens / todtschleg vnd anders. Darvor ei-
ner wol etwan syn fan vnd mag / wenn einge-
ein ding vmb fridens willen glimpflich dar-
thut/vnd nit zum hitzigisten/ic.

Lern also by disem Nabal / das du dich
vor

Sie vierdt Predig.

23

vor gyt/trunckenheit/ vndanckbarkeit/ lesterung Gottes vnnnd der menschen hütst / mit armen vertribnen Bekümberten vnd Betrübten lüten/ fründtlich syest vnnnd mitlyden habist / so wirst du Gott dem Herren dienen vnd gfallen.

Von des vetruncknen Nabals läben vnnnd tod/zc.

Die vierdt Predig.

Wie David zornig worden / vnnnd dem Nabal mit der hand habe wöllen straaffen.

So sprach David zü sinen mannen: Gürte ein yetlicher sin schwert vmb sich. Vnd ein yetlicher gurt sin schwert vmb sich Vnd David gurt sin schwert auch vmb sich: vnd sy zügend im nach hinuff by vierhundert man / aber zwey hundert man blibend by dem troß. David aber hat gesprochen. Wolanich hab vñ sunst behütet alles das diser hat in der

Von dem Nabal

wüſte/das da nichts gfült hat an al-
lem w3 er hat/vñ er bezalt mir güts
mit bösem. Gott thue diß vnd nach
meer den fiendtn Davids/wo ich di-
sem biß an morgen lassen überbliben
einen der an die wand bruntzet vß al-
lem das er hat.

Wie Nabal die Boten Davids/ die
etw3 hilff vñ handreichung vö im
begärtend/empfangē / ghaltē vñ
glassen/habend wir in der vorge-
den predig ghört vnd verstanden/
nam D3 er sy nit nun lār lassen hingant / sund
über D3 den Davidē / sine Gottē vñ and eerlic-
che kriegslüt mit bösen schandlichen lester
wortē andastet habe. Daruf volget/ wie sich
David als er desse von den sinen Bericht wor-
den/gehalten.

David ist
im harnist.

Er sagt den nechsten zū sinen knechten / sy
söllnd sich rüsten / ire schwerter vñ gürtten/
welchs sy gethan. Dan sy on zwysel ein gürt-
ten lust an in vñ die sinē hattēd. Er gurt auch
von stundan sin gürtt schwert vñ sich/vñ fiend-
gend an wider den Nabal zeziehen/ in mit d
hand zū straffen. 400 zugend hinuf mit dē
David/200. Glibēd bym troß/ damit inē kein
vntriuw widerfüre. Dan in einem krieg kan
man nit gnüg sorg haben. Es stat übel wenn
einer

einer sagen muß/ich hab nit vermeint das es
 also gan solte. In bello non licet bis peccare.
 Nach etlichen versen stat/wz er gsagt/ich hab
 es aber hiebar gsetzt/vmb Bessers verstands
 willen/namlich in Bedurre das er in der wü-
 ste disem Nabal/wid die syend/die vff die Is-
 raeliter on vnderlaß streiffend/ouch wid die
 Diebē vñ wildē thier/sin vych dermassen Bes-
 schirmp habe/dz im nie nichts weder Kleins
 noch grosses gmanglet/ so er im ietz den lon
 gäbe/er hette sich zū im versähen/er hette sich
 fründtlicher gāgen im ghaltē. Er neñt in nie
 mit namen/dañ er hat in nit darfür/wie wir
 ouch thünd weñ wir über einen erzürnt sind.
 Schweert daruf Gott solle sinen syendē dis
 vnd nach meer thün/wo er im das schencken
 welle/es muß nit lenger anstā dan biß mor-
 des/ so welle er in Nabals huß nun keinen d
 an die wand(mit gunst zmalde) Bruntze las-
 sen überbliben/vñ darvon kōmen. Die eids-
 form die er hie Bruch/ist nit gar gsetzt/dz ist
 aber die meinung/Gott thue mir dis vñ das
 so ich minen syenden wünschen möchte/weñ
 ich im dis vertragen/2c. Durch den d an die
 wand Bruntzet verstand etliche/die mans per-
 sonen/die im Bruch habend/weñ sy dz wasser
 wellend abschlaben/dz sy an ein wand stond/
 sagend dz sye sin meinüg/er welle allein den
 wybsbilderē verschonē. Wie dan erwan Bes-
 schicht/dz mā in überfal vñ eroberüg d stettē.

Der an die
 wand beum
 2c.

Von dem Tabal

vñ schlösseren/alle mans personen erschlechte
vnd allein den wybsbildenen verschonet. Daz
aber Dauid die Abigael selbst habe wollen
töden/ist vß der folgenden history offenbar.
Darumb ist das der eigentlich verstand / er
wölle nieman liberal auch den hunden nit ver
schonē. Dañ die hund habend ein Bein vff vñ
bruntzend mit gunst zmalden an die nechst
wand. Dife ard zreden/wirt in den künig Bü
cheren auch gebrecht/ vnd damit anzeiget dz
entlich vßrüten vñ vertilgken. Im 3. Büch der
Künigen am 14. capitel sagt d prophet Abias
zü Jeroboams hußfrouw / die in ires sons
halben fragen wolt/ob er seiner krankheit vff
stan wurd/Jeroboams huß müsse vßgrütet
werdē/ouch der so an die wand bruntze. Im
4. Büch am 9. capitel sagt Gott zum prophe
ten d Jehu vber Israel salbet/ dz er das huß
Achab vßrüte: Ich wil von Achab vßrüten
den der an die wand bruntzt/te. Wenn der
fyend in der Belägerung einer statt erzürnt
wirt vnd sy mit gewalt eroberer muß/schonēt
er ouch den hunden vnd Katzen nit. Wenn
man die statt vfforderet sagt man etwan ergā
bend jr üch nit an vnß / so wellend wir ouch
keinen hund läbē lassen. Fl. Nopiscus schribt
im läben des keisers Aureliani/wie er wider
Zenobiam die künigin/mit aller macht zogen
vndfür die statt Thiana kommen/habind die
Burger die thor vor jm Bschlossen / Desser
sich

Sie vierdt Predig.

25

sich zu jnen nit versähen/ward deshalben erzürnt vnnnd sprach: Ich wil in diser statt kein hund lassen überblyben. Die kriegslüt liefsend sich dapffer anführen/dan sy hofftend ein güte püt daruon zu bringen/wenn die statt eroberet/geplünderet/vnd yederman erschlagen wurde. Als Heraclamon ein rycher burger den erast sach/forcht er siner hut vnnnd seines güts/darumb er sin läben zu fristen dem Keyser die statt verriedt. Wie sy der Keyser ynnam/vnd die kriegslüt alles darin erschlagen woltend/verbot es jnen der Keyser (dan er durch ein wunderbare gsicht oder erschyning Apollonij Thyanæi gwendt was) do schriuwed die kriegslüt es wäre doch vorhin sin meinung gsyn. Er antwortet/ Ich hab gesagt/ich wölle kein hund lassen überblyben/so schlahend die hünd ztod / schonend aber den menschen. Den verrädter ließ er töden. Hernach entschuldiget er sich / das er in nit bym läben (wie er im on zwyfel züg sagt) erhalten hette/mit dem/das er sagt/Siewyl er vntrüw gsyn ist an sinem eignen vatterland/vnnnd das selb verradten hat / wie köndte ich mich zu im versähen / das er mir trüw vnnnd glauben wurde halten?

Es wurde ouch David sinen worten statt gethon haben/ wo in Gott nit hinder sich gehalten hette / vnnnd im die Abigail entgegen gesandt/ daß sy in mit früntlichen worten vn

Q

Von dem Tabal

güten gründen von sinem fürnemmen ab-
wante. Dañ er durch zorn verbländt/nit an-
derist vermeint / Dann er thette nun recht dar-
an/wenn er den vndanckbaren bösen mens-
schen strieffe / so gedächind andere daran.
Du hörst auch nit/das die sinen in abgenom-
men/oder das best darzü gredt habind. Dañ
diewyl sy eben so wol geschmecht warend als
jr herr/so were es inen onzwoyfellich gewä-
ssen / wenn sy sich an jm hettind können oder
sollen rächen.

Es kan niemand loughen / Dann das sy
Tabal groblich verirsachet hat. Dann wolt
er inen nichts gäben/ so solt er sy doch nit an-
iren ceren geschmecht haben. Es thut eerlichen
lüten gar wee/ wenn man sy verachtet vnd
schmecht:wenn man zu inen hüwe vnd steche
so gebe es inen nit so vil züschaffen:nach solt
David der wyser gsyn syn/vnd die sach an-
derst zhanden gnommen haben. Wenn man
einem glich zu bösem grossen anlaß gibt / so
sol er darumb das böß nit thun.

Das aber David sich übel vergangen wie
wol jm etlich rächt gäbend/mag man vß vol-
genden vrsachen verstan / vnd abnähmen.
Erstlich ist er zu gäch vnd gloubt zu bald.
Er hat allein ein theil ghdrt / da solt er ge-
dacht haben / villicht thünd dine Botten zuil-
an die sach/erzellend nit wie es im grund ere-
gangen/ oder sy habend jm erwan böse wort
geben

Geben/ vnd die sach nit vßgricht/ wie du es
 inen Befolgen hast/ oder es ist im sunst etwas
 über den wäg glouffen gsyn. Dann das ist
 ein schädlich Ding / wenn ein richter nun ein
 theil hört/ oder so er gleich Beed hört / dem alz
 lein gloubt/ der zum ersten zu im kommen ist
 vnd im die ohren gfült hat/ vnd nichts by im
 gälten laßt/ das der ander sagt. Man lißt dz
 vff ein zyt einer zum grossen Alexander kom
 men vnd sinen widersächer verklagt/ Da habe
 er das ein ohz verhept / oder sye daruff gläs
 gen / Da diser vermeint er solle im güte au
 dientz gäben / habe er gesprochen/ Das ander
 ohz behalten ich dinem widersächer. Dann
 ich muß lösen / was er darzü sage. Plats
 schrybt/ Wie einer der zwey tücher gägen
 ein anderen besähe/ von stundan den vnder
 scheid funde / also wenn einer Beed parthyen
 gägen ein anderen verhöre / so mercke er von
 stund an / welche rächt oder vnrecht habe.
 Zu vnseren zyten Geschicht vil das grosse
 fürsten vnd herren / vertruwer lüt vmb
 sich habend / diewyl aber die selben inen
 nit allwägen den rächten grund fürgebend/
 sonderlich in sachen des gloubens / so ver
 uolgend sy die gläubigen / wellend sy nit
 nit hören / oder hörend sy die / so ist es gleich
 als vil als hörend sy sy nit / vnn der
 vortrichten wägen / vnd arwönen die.

Hör den
 anderen
 theil.

Von dem Nabal

sy by jnen selbs gfasst habend / vnd vermeinend sy handlind nun rächt vnd wol. Es solt David sin rächung gmacht haben / Diewyl Nabal dine Botten ouch troffen / so sind sy villicht hitziger in jren reden / Dann sy soltend.

Man sol
mit vß korn
handlen.

Wenn es aber glych offenbar gsyn wäre / das Nabal solche vngschickte wort vßgestossen / ja wenn sy David glych selb vß sinem mund hette gehört / so solt er darumb nit in einem grimmigen zorn zü den waaffen griffen / sonder andere mittel an die hand genommen / vñ in ander wäg in gestraafft haben. Dann der zorn ist ein böser radigab: in einē zorn redt vñ thut mancher / das in hernach gerüwt. Wenn einer zornig ist / so strafft er etwan so bald den vnschuldige als den schuldigen / vñnd haltet in der strafft kein maas. Wie der Keyser Theodosius (der sonst ein frommer fürst was) zü Thessalonica in einē zorn die vnschuldigen mit den schuldigen / vmb etwas schmach willen / die sy im Bewisen / töden ließ / welches im hernach in trüwen leid was: ouch vß radt des heiligen Ambrosij ein gesetz vßgon ließ / das wenn er oder ein anderer fürst / in einer sach die sin person antref / vß zorn ein vrtail gäb / das der selben erst in dryssig tagen darnach solte statt beschähen. Damit wenn er vnrecht geurteilt hette / die vrtail möchte in der zyt verbessert werden.

Sie vierdt Predig. 27

werden. Der zorn ist ein band der vernunfft/
welcher sich erzürnt / Der wütet wie ein wild
thier/2c.

Es laßts ouch David nit darby Blyben/
Das er zornig ist / sonder gebüetet sinen knech-
ten / daß sy sich rüstind. Bis har hat er sy hin-
dersich gehalten / Das sy niemant kein leid
oder schaden thätind / yetz reizt er sy selb zum
zorn. Es was an dem zvil / Das er in zorn erz-
bran / Darumb sölte er sine knächte nit ouch wis-
der ander lüt gehezt haben. Das heißt ein
frömbde sünd thun / wenn einer glych ein
ding nit selbs thüt / er reiset aber andere an /
gibt radt vnnnd that darzü / Das ein ding das
vnrächt ist / Beschähe. Also thüt hie David /
also thünd alle die / so nit nun sich selbs / son-
der ouch ander mit gwalt mit wynn füllend /
vnnnd niemant kein rüw lassend / Biß sy mit
jnen zü vnuernünfftigen thiere werdend / 2c.
Was dann die selben in der wynnfüchte vns-
geschickts redend oder thünd / so sind die
daran schuldig / die sy dahin gebracht ha-
bend.

Wytter laßt sich David mercken / Das es
in gruwen / Das er rächt gethon. Er sagt / er
habe dem Nabal das sin vmb sonst vnd ver-
gäbens behütet / Diewyl er im yetz den lon
gäbe / 2c. Es sol aber einen nit grüwen / wenn
er güts gethon / wenn glych kein danck by
der wält ist. Wenn wolt David gesagt ha-

Es ist Das
uiden leid
dß er recht
gethon.

Von dem Nabal

ben / Ist gleich alle arbeit vnd gütthar des
Nabals halben verloren / so ist sy doch Gotz
tes halb nit verloren / sunder wol angelegte
Der wirt mir in and wäg dester meer glücks
vnd sagens verlichen : Das diser Nabal
nit thut / Das er schuldig ist / stadt im ü-
bel an / Darumb wilt du das thun das rächt
ist / du wilt nit handlen wie er.

Dauid
schweert
lychtfing.

Vber das so schwert er nit / wie man
schweeren sol. Der heilig prophet Jeremias
schrybt am vierdten capitel: Du solt schwee-
ren in der warheit / grächtigkeit vnd im
gricht. Der heylig Hieronymus nempt es
Drey comites / gfeeren des eyds. In der
warheit / das du nit der waarheyt vmb-
gangist. Du solt nie ding by dem eyd bezüs-
gen / an denen nichts ist. In der grächtigkeit
das du dich nit zu vngächten dingen mit
dem eid verbinden laßest. Dann die heyligen
alten vätter sprächend rächt / der eyd solle nit
ein band sin der bößheit. Im gricht oder vr-
teil / das ist / nit vnbefintlich vnd fräffenlich.
Einer sol wol bedäncken was es vff im tra-
ge / ein eyd schwereen. Das aber haltet Dauid
hie nit / er schwert vnbefinnet vnd fräffen-
lich. Demnach schwert er / er wölle nit nun
den Nabal / sonder die sinen / das ist / den vn-
schuldigen mit dem schuldigen erschlahen.
Was grosser vngächtigkeyt wäre aber das
gsyn / wenn er sinem schwür wäre nachgan-
gen

Sie vierdt Predig. 28

gen? Wenn er nit nun den Nabal / sonder
sine arme knecht vñ mägt / die nieneruon wuß
tend / dann von übelzyten / hette vnggebracht /
arme vnschuldige kind / so acht erliche in si
nem huß gsyn sind / vnd sonderlich das from
eerlich wyb die Abigael / deren leid was / das
jr eewirt nit anderst handelt? Hatt die gut
frouw nit sunst crütz vnd lydens gnüg /
das sy by einem solchen menschen ire lieben
tag verschliffen müßt / vnd jm darzú vnt
werd vnd sin fuß südel sint? Deuternomij
am vier vnd zwanzigsten sagt der Herr /
Die vätter söllind nit für die sün getödt wer
den / sonder ein yetlicher sölle von siner miß
handlung willen sterben. In bücheren der
Künigen vnd der Chronie wirt der künig
Amasias von des wägen globt / das er die
mörder die iren herren / sinen lieben herren
vatter Joas hattend vndbracht / hat lassen tö
den / aber iren finderen verschonet / vnd wirt
Gotts gesatz daselbst angezogen. Mit Gott
hat es ein andere gstat / der mag jungs vnd
alts / schuldigs vnd vnschuldigs mit einan
deren straaffen. (Wol eigentlich zreden / nie
mand vor jm vnschuldig ist.) Dann wie der
h. Augustinus an einem ort sagt / straff er
glich de son von des vatters wäge hie in zyt
so mag er jm doch dz and läbē mittheilē. Des
halb so hat Dauid übel gsündet / wie er selbs
Bekent / do Abigael jm begägnēt vñ jm sines

Von dem Nabal

fürnemens still stalt / vnd ouch deßhalbens
Gott dancket / das er in vor dem mord bes
hütet hat.

Wir söllēd
nit raachē
gyrig syn.

Wie solt jm aber David gethon haben?
Sprichst / Wenn einer zornig ist / so Bättet er
nit. Er solt gedacht haben an Gottes gebott
Deuteron. 23. Min ist die raach / vnd ich wil
widergelten zu siner zyt / welche wort der hei
lig Apostel zun Römeren am 12. Capitel an
zucht. Demnach wie er vil vom Saul hette
gelitten / wölte derhalbens nit erst yetz vndul
tig werden. Er hat ouch vor jm der heiligen
Patriarchen vnd andrer gläubigen exem
pel / die ouch geschmächt worden sind von vn
danckbaren lüten / aber alles habend vnder
den fuß getruckt. Zu dem wußt er wol / das
kein herrlicher sig nit ist / denn wann einer sich
selbs vnd sine bösen anfächtungen über
windt. Er solt Gott angerüfft haben: oder
wolt er / als ein König von Gott erwelt / die
straaffüren / so solt er doch nit in einem zorn
in vnuerhört straffen / vnd ander mit jm / die
gantz vnd gar vnschuldig warend. Er wußt
wie das dem Saul so übel angstanden was /
das er den Doeg hieß die priester / vnd her
nach ire wyb vnd kind / so all vnschuldig was
rend / töden vnd vmbbringen.

Das söllēd wir vns ouch lassen gsagt syn /
wir sind von natur vnuertragens dings / so
Bald man vns nit vfwütscht / so sind wir im
harnest

Sie vierdt Predig. 29

harnest/wöllend dzy schlahen/ vñ vns selbs
mit der fust rächen. In sprüchen Solomons
am 20. cap. stadt: Sag nit ich wil böses wis-
dergälten/ sonder wart vff den Herren vñnd
er wirt dich erretten. am 24. Sag nit/ wie er
mir gethon hat/ also wil ich jm thun/ ich wil
jm widergälten nach siner that. Liß Matth.
5. 6. 18. wie du dinem nächsten verzyhen sol-
list. Wenn wir nach der raach trachtend / so
kommend wir ye länger ye wyter hinder ein-
anderen: weñ wir aber wyhend vñnd nachlas-
send/ so gwünnend wir vnser feynd / vñnd
schaffend vns selbs vil rüwen. Das groß ge-
schütz wenn es muren vñnd thürn oder ande-
re gebüw trifft/ wirffts die selben nider/ weñ
es aber etwas trifft das lind ist vñ jm wyche/
als mist/ Baumwollen/ oder anders/ so ermü-
det es/ vñnd mag nit mer wercken: Also wenn
wir die Besseren sind / vorgäbend / so lassend
auch die nach/ die sonst häfftig vñnd zänckisch
sind / sy fahend vns an lieben / vñnd vns güts
thün. Mit güte habend vil jre feynd über-
wunden/ &c.

Wir hörend das der zorn den Dauiden/
als er vom Nabal höchlich beleidiget ward/
dermassen verblendet vñnd überwunden hat/
das er meint / er habe füg vñnd rächt/ in vñnd
die sinen vßzerüten: Ja jm hat daran so gar
nit zwoyfelt / das er ein eyd darüber schweert/
hernach aber müßt er selbs bekennen / das er

Von dem Nabal

zūwil an die sach gethon/ vnd übel gfelt harr.
Also beschicht oft/ das ouch andere glöubi-
gen menschen/ durch zorn vnd andere anfeh-
tungen überylt werdend/ daß sy meinend sy
handlind rächt vnd wol/ vnd vß gütem yfer/
nachwertz aber verstond sy / daß sy vnrecht
daran gsyn sind. Da wir glych an anderen
siben künneud was inen übel anstadt/so sind
wir doch so arbeitsälüg / das wir es an vns
selbs nit sähend. Deshalb söllend wir vnser
ren eignen begirden nit von stundan volgen/
wenn wir glych meinend wir thügind ein
ding mit güter gewüßne/ söllend wir der sach
nit bald truwen / sonder vnser ding sol vns
argwönig syn / söllend ouch Gott allwägen
bitten/ das er vns durch sinen geist rächt leis-
ten vnd führen wölle / sonderlich in sachen die
den glauben antreffend.

Warumb
die schwä-
ren sündvñ
laster heil-
ger lüten
beschriben
wordind.

Wie gadt es aber zū/ daß die H. Gschufft
die schwären grossen sünd / der heiligen die-
neren Gottes/ nit verschwygt / sonder sy an-
tag bringtz: alles das David hie/ vnd sonst in
anderwäg/ gsündet hatz: das Moyses vndul-
tige wort wid Gott vßgstossen: das Jonas
Gott vngehorsam gsyn: das Petrus Chris-
tum zum dritten mal verlöugnet / vnd
anders derglychen: Es werdend die ding
nit darumb von inen gemeldet / das wir im
Bösen iren Gyspilen söllind nachuolgen. Dañ
wöbltist sagen / David hat in einem zorn den
Nabal

Sie vierdt Predig. 30

Nabal vnd die sinen wöllen töden / Darumb wil ich vff die so mich Beleidigend / ston vnnnd gon / vnd wil mich an jnen rächen / vnnnd sölte es mich min läben kosten / so wurdet das exempel nit rächt / sonder mißbruchen. Sag vil mer / David wie herrlicher in anderwäg gsyn / so hat er in dem stuck gfälte / Darum wil ich mich darvor hüten / vñ wil mich der herrlichen tugenden Beflyssen / die er sonst an im gebedt.

Seß Dauiden aber vnd anderer heiligen Sieneren Gottes laster / in die sy etwan gfallen sind / werdend darumb Beschriben / das wir / für das erst sähind / daß sy nit durch ire frombkeit / heiligkeit vnnnd verdienst / sonder durch den glauben in Messiam syend sälig worden. Sy sind irer ardt vnd natur halben gsyn wie andere menschen / daß sy aber so ein heilig läben gfürt / eerlich vnnnd rächt ghandlet / habend sy vil der luterer gnad Gottes gehept / der hat sy durch sinen geist gleitet / vnd dargegen sy ouch etwan fallen lassen / daß sy selbs vnd ander sähind / daß sy von natur arme menschen wärind / vnnnd ire schwachheit lernetend erkennen. Demnach das wir vns bester ernstlicher vor sünden vnnnd lasteren hütind / vnnnd Gott anruffind / das er vns nit in versüchnuß füren / sonder vns vom bösen erlösen wölle. Dan ist dises den grossen heiligen widerfarē / daß sy etwan gfallen / wie vil

Von dem Tabal

- mer mag es vns widerfaren / die weder in der erkantnuß Gottes / noch frommen läben yfer vnd andacht / inen niemen züerglychen sind: S. Paulus vermanet vns nit vergessens / 1. Corinth. 10. welcher vermeint er stansde / habe gut sorg das er nit falle / sonderlich in der letzten zyt / welche böß vnd vollen ergernus ist. **3.** Zü dem / so wir vns selbs entgangen wärind / vnd in schwäre laster gfallen / so lernend wir by dem exempel der heiligen lüsten Büß thun / vnd von sünden wideruffton. Dann man sagt / sünden ist menschlich / aber in der sünd wöllen verharren / ist tüfelig. Die heiligen Gottes sind in den sünden nit bliben / sonder durch Gottsgnad widerumb vfgstanden / habend gloubt / das inen Gott durch Christum ire sünd verzigten habe / vnd sich fürter vor sünden / vnd allem dem das sy daryn gebracht / ernstlich gehütet. **4.** Wir lernend ouch / das wir die so gfallen sind / nit gar verwerffen / sonder widerumb vfnämen söllind. Wår nie fiel / stünd nie vf / sagt man gemeinlich: Wår den Dauiden / Petrum vnd andere wölte verworffen haben / vmb irer sünden willen / wåre vnrächt daran gsyn. Luce am 15. cap. sagt vnser Herr Christus / Die engel im himmel / fröuwend sich / wenn sich die menschen besserind vnd bekeerind.

Lern also deß Dauiden exempel zü diner leer vnd zü dinem trost bruchen. Begärst et-
was

Sie fünfft Predig. 31

was von einem dem du wol trawest/ vnnnd er
schlecht dir s ab/ vnnnd thüt es vnbillich / oder
redt dir einer zü/ Berwyßt dir einer ein schalck
heit/ vmb den du Bessers verdienst hast/ so vn-
derstand dich nit selbs zürächen/halt dich hin-
derlich / gib güts vmb böses / empfich din
sach Gott vnd dem rächen.

**Von des vertruncknen
Nabals läben vnnnd
tod/zc.**

Die fünfft Predig.

Wie der Knächten einer / siner frontwen
der Abigael erzelt / was sich zwüschen dem
botten Davids vnd dem Nabal verlossen/
ouch wie er sy gewarnet habe.

Der Abigael aber Nabals wyb
hat einer der jüinglingen anzeigt vñ
gsprochen. Sibe Savid hat botten
gesendt vß der wüste vnseren herren
zü grüssen / er aber hat sy ange-
schnerzt. Vñ sy sind vns seer güt lüt
gsyn/vñ habend vns nit geschmecht/
es hat vns ouch nichts gefält so lang

Von dem Nabal

wir mit jnen gwandlet habend / do
wir vff dem völd warend. Sy sind
vnserer nur gsyn tag vnd nacht / so
lang wir den schaaffen by jnen gebü-
ret habend. So wuß nun vnd sibe
was du thun wöllist: dann es ist er-
füllt das böß wider vnseren herren/
vnd wider sin gantzes huß. Vnd er
ist ein mann Belial dem niemants
etwas sagen darff.

Die Heilig Prophetin Anna / des
heiligen Propheten Samuels mü-
ter sagt in irem lobgsang / i. Sam. 2.
cap. Der Herr behüte die süß seiner
fromen / namlich vor dem verderblichen fal.
Es möchte Gott sinen heiligen trüwen Die-
neren / so vil gnad mitteilen / daß sy gar nit sün-
detind / aber vmb gewüsser vrsach willen / thut
er das selb nit / sonder laßt sy zün zyten ouch
in schwäre grobe laster fallen. Damit sy nam-
lich jr schwachheit vnd arbeitsäligkeit sehind /
desten ynbrünstiger bättind / mit anderen die
da fallend / desten mer mitlydens habind / &c.
Doch gibt er jnen gnad daß sy nit in lasteren
verharrind / sonder sich widerum vffrichtind /
nit sünd vff sünd huffind: oder liged sy glych
zün zyten lang in sünden vnd lasteren / so laßt
er doch

Die fünfte Predig. 52

er doch jren sal jnen nit zü jrem entlichen verderben reichen/sond laßt sy zum rütwen kommen. Sesse habend wir ouch hie im Daviden ein exempel/der sündet übel/vnnd hette noch übler gehandelt/wo jm Gott nit vor kommen wâte. Aber er sandt jm entgegē die Abigael/ die sin mordlich fürnehmen gwendt hat. Anfangs wußt sy von feinen sachen nichts / sy ward aber aller dingen von jren knächten einem bericht/ vnnd gwarner daß sy irer selbs vnd anderē vor schaden wære. Wie sy aber sye bericht vnnd gwarner worden / wöllend wir yetz mit der hilf Gottes kurz hören.

Der heilig geist zeigt also an. Einer der jünglingen oder knächten (dann er on zweyfel vil ghebt hat) ist zur Abigael kommen / vnd hat jren angezeigt was sich verlossen. David habe sine Boten vß der wüste zum Nabal gesendt/in zü sägnen/od in zü grüssen/ das ist/ jm Gottes gnad vn alles güts züwünschen/ (dann hie redt er nit vom zauberischen sagenen / welches wider Gott ist /) item etwas von jm zü begären. Er sagt vß der wüste/ alles wölt er sagen / die nodt hette in getrieben. Nabal aber habe sy angeschnerzt / habe jnen die vßwysung geben / Das Hebraisch wort heißt an einen fallen / wie ein roubuogel / ein gyr / habich / falck / oder wy / vff ein thierle oder andere vögel dabär schüßt Er wil anzeigen / er habe alle vnbscheidenheit

Von dem Nabal

gegen jnen gebucht/ er sye vngestüm gsyn/
habe sy angefallen wie ein wütender hund/
erzellt daruf wie sich David vnd sine knächt
gegen jnen ghalten/ vñ gibt inē die zügnuß/
sy syend jnen güte vñ nütz lüt gsyn / sy habind
sy nit gschmächt oder schamrot gmacht / was
sy nun von jnen begärt habind / syend sy jnen
zu willen worden / es habe inē onch niener an
gmanglet / die gantz zyt die sy by jnen gsyn.
Ja sy syend als vil als ire mur gsyn / so lang
sy des Nabals knächt / by jnen den schaaffen
ghütet habind / das ist / jr vorweere. Also stadt
Prover. am 18. Ein starcker thurn ist der nam
men des Herren / dann dahin flücht der ge
rächt vnd ist sicher. Bald drauf: Das güte des
rychen ist sin starcke statt / vnd ist grad wie ein
hohe mur in sinem sinn. Im Propheten Za
charia am 2. cap. verheißt Gott / er wölle
der sinen fürhin mur syn / das ist / jr schutz
vnd schirm.

Mit disen worten / werdend der David vñ
die sinen von disem knächt trāffenlich globt/
dann er bezüget / das er vnd sine mittknächt
von jnen weder mit worten / noch wercken
syend beleidiget worden : ja daß sy jnen nütz
gsyn / nit nun den tag / sonder onch zünacht.
Dann diewyl David in die 600. starck in di
ser gegne lag / so hater on zweyfel znacht sine
wachten gstellt / damit er nit vnuersāhenlich
vom Saul / oder anderen sinen syenden über
fallen

Sie fünfft Predig.

33

fallen wurde. Wenn man sorgloß ist/so mag bald einem heerläger/sonderlich by nacht/ein vnwiderbringlicher schaden widerfaren/wie man in allen historien vilfaltige exempel findet/man kan in einem Krieg nit gnüg sorg haben. Er sagt ouch/das habend sy nit nun ein tag zwen gethon/sonder alle tag/dieweyl sy in diser gegne syend geläge. Er warnet ouch sin frouwen / das sy sähe / wie sy der sachen thüye/ dann das böß sye wider jren Herren vnd sin ganzes huß erfüllt/ das ist/ wie wir sagend/ es sye jm ein bad über gethon: Das wud werde jm das gwüß nit schencken / das er sich so vnfründtlich gegen jm vnd den sinen gehalten: sin maß sye voll. Wo har wußt aber ers? Er wußt wie die so hunger lydend/vnd über das erst verachtet/vnd vnbillicher wyß geschmächt werdend / so vngern still haltend: versach sich Deßhalb David wurde nit lang vßhlybē/sonder die schmach die jm vnd den sinen begegnet was/mit der hand vnuersähēlich an jm straffen. Zu dem mag wol syn/das er von denen gesandte Dauids selbs verstanden hab was jr meinung sye/vnd wo sy vß wöllind.

Da aber Abigael hette mögen sagen/zeig es dem Herren selbs an / was wilt mir lang daruon sagen? kumpt er jren vor vñ spricht: Es sye nit mit jm züreden/wie mit ander lüeten/dann er sye ein mann Belial/en ein joch/

℞

Von dem Nabal

Ein mann oder er sye kein nütz. Ein man Belial ist/ Der
Belial. sich mit keinen gesatzten laßt binden / sonder
das joch ab im schüttlet / alles das thut das
in gelust vnnnd gelanget/ Der sinen bösen an-
fächungen volgt/weder Gott noch die wält
nützt/sümma ein heyloser mann.

Sprichst/ Ist es aber rächt gsyn / Das ein
dingeter knecht oder lybeigner mann / sinen
Herren übernämmer/ in ein mann Belial/ ein
türfelskopff nennt? Antwort/ er hats nit thon
vß verachtung oder in züuerkleineren / son-
der das es an im selbs also was/ vñ die frow
iren die sach dester trüwlicher ließe angeläs-
gen syn. Sonst nennt er in zum anderen mal
sinen Herren. Das ist an imselbs/ Das keis-
ner den andern übernämmer sol. Mat. 5. Cap.
Bernach nennt in Abigael glycher gstat ein
mann Belial/vñ ein thoren/ıc.

Ein byspil
eins güten
knechts. Sie wirt vns fürgestellt ein exempel eines
trüwen / wysen vnnnd verstendigen knechts.
Das er sinem Herren trüw gsyn / erschynt
vß dem / Das so bald er sieht / Das grosse ge-
faar verhanden ist/da zeigt ers an. Ob glych
sin Herr vnfründtlich mit im vnnnd anderen
was / vnd er on zwysel/ vil böser worten off-
hat müssen schluckē (Dan so er gegen frömb-
den so vnuernünfftig gsyn ist / wie wirdt er
erst gegen den sinen gethon haben?) noch
wolt er im gern vor kumber vnnnd leid syn.
Man hette bald einen funden ghebt/der sich
zum

Sie fünfft Predig.

34

zum Dauiden gschlagen / vnnnd sinen herren
verradtē hette. Wie man by den altē vil exen-
pel findt / daß die knächt offt an iren herren
trüwloß worden: Wol dar gegen findt man
ouch von etlichē knächten / die iren herre trüw
vñ glouben ghalten / ouch erwan sich für sy in
tod geben habend. Sagst / ja diser knächt hat
siner hut gfürchtet / sonst hette er die warnüg
nit gethon: mag man antworten / er hette sich
wol by zyten mögen vß dem stoub hinweg
machen / vnnnd etwas vfrumen / wie es in söls-
chen fälen gadt / wo er nit trüw gsyn wäre.

Ein fürsichtigkeit sieht man by de / das er
der dingē eigentlich gwaret / das er ermässen
kan wohin das lange / daß sin herre frome vn-
schuldige liit / ja botten also geschmächt hat.
Vñ da er wol wußt / das mit sinē herre nichts
zü reden oder vßzürichtē was / da lüff er den
nächsten zur frauwē / welche ein verständig /
fürsichtig wyb was / daß sy zur sach thäte / vñ
das by guter zyt. Er zeigt ouch by zyten an /
dann hette er gwartet nun ein halben tag / so
wäre es versumpt gsyn.

Dz diser knächt ouch der grächtigkeit hold
gsyn syc / sichst darby / das er des Dauiden
knächten ein gut lob verlycht / wie sy dan wol
wärt warend / vñ daß jm leid ist / daß sin herr
die selben so ruch angfaren hat / vnnnd da der
Nabal sy schiltet / schlecht er nit zü / das er dem
herren gfalle / Er lobt ouch sinen herren nit /

¶ ¶

Von dem Tiabal

in dem / da er zu schälten was.

Sie dienst
söllend iren
herren vnd
frouwen
trüw syn.

By disem exempel lernend alle knächte / dieo-
ner vnd mägt / was ir pflicht vnd schuld sye /
namlich daß sy iren herren / meisterē vñ frou-
wen söllend trüw syn / iren nutz vnd fromen
fürderen / iren vnd der iren schaden wenden /
so verr sy vermögend / vñnd ire herren war-
nen / daß sy weder an lyb noch an güte gesche-
diget werdind. Wenn einer glych ein harwen
vnuerständigē herren hat / so soler nichts des-
ster minder sin best thun / vñnd das vmb des
gebotts des Herrē willen. Der vil in Epist-
len des H. Apostels Pauli von dem ampt d.
diensten vnd lybeignen redt. Der H. Petrus
vermanet die husknecht in der 1. Epist. am 2.
cap. sy söllend ouch den vngeschlachten her-
ren ghorfam syn. Dann das selb sye inen vor
Gott vñ den mensche eerlich. Tröste sich ein
yeder der vnder einem halsherrē syn muß /
mit dem exempel dises knächts / der wol einē
harwen bösen herren hat / aber darumb nit
von im zum Dauiden luff / da er glych desse
grossen anlaß ghebt hat.

Sie herren
vñ frouwe
söllend ire
dienst irer
trüw lassen
gniessen.

On zweyffel hat in die Abigael / vñnd grad
Dauid selbs / hernach diser trüwē warnung
lassen geniessen. Dann wen ein herr / meister /
oder frouw / erfarend daß die dienst inē trüw
sind / vnd huslich / so gwünnend sy inen das
hertz an / zühend inen zu / vñ thünd inē güte /
sind ouch desselben schuldig. By den alten ist
offt

Sie fünfft Predig. 35

offt Beschähen / Das wenn die lybeignen lüt/
trüw an jren herren gsyn / daß die selben sy
der knächtschafft habend gütiglich erlassen.
Item ein herr nimpt etwan einen trüwē die-
ner an eines kinds statt an / oder gibt jm sin
tochter zum wyb / vnd setzt jn in groß eer vnd
güt / wie in sprüchē Solom. am 17. cap. stadt:
Ein verständiger knecht wirt herrschen über
einen son / der sinen vatter schamrot machet/
vnd wirt vnder den Brüderē das erb teilen/
Das ist mit jnen zū glychem teil gon.

Das von knächten gsagt wirt / wie sy jrem
herren trüw vnd hold syn söllend / Das mag
ouch vff alle vnderthonē zogen werden / daß
sy glycher gstat gegen jren herren vñ oberen
gsinnet syend.

Wie aber diser knacht sin frouwen gwar-
net hat / also sol ein yeder den anderē warnen/
vnd jm wo er kan vñ mag vor vnfall vnd scha-
den syn / sichst das einem das sin vndergon
wil / daß sine kind od dienst hinder jm vil bö-
ses ansehend / oder daß sich einer nit rächt in
handel schicken wil / so warn jn. Insond sind
die prediger vñ seelsorger schuldig / menglich-
chen zū warnen daß sy jnen selbs vor schaden
syend / vñ sich by zyrē rächt schicken. Gewiß
weñ das von vns gemeinlich beschehe / wie es
billich sölte / so wurde mancher by huß vñnd
heimandt blyben / der sonst muß landrümig
werden / vnd an Bättelstab kommen.

Einer sol
dem anderē
vor schadē
syn

Von dem Nabal

Man sol
trüwe war-
nung mit
verachten.

Es ist ouch an dem nit gnüg/das man die
lüt trüwlich warne/sonder man müß die war-
nung annehmen. Dann wenn einer trüwe war-
nung veracht vnd in lufft schlacht/so ist im
nit zühelffen. Dise Abigael sagt zü jrē knächt
nit/sich was du züschaffen habest/ie. Sonder
als ein wolk dñend / fürsichtig wyb / trachtet
sy den sachen nach/ vnd sicht wie sy das übel/
so vorhandē was/mit sügen abstelle. Biß nit
wie Nabal/der ließ nit mit im reden/hette dis-
ser knächt im glych gsagt was vorhanden/so
hette ers nit gloubt. Sömlich lüt wöllend lie-
ber zügrund gon / dann trüwen warnungen
volgen/sonderlich wenn sy von schlechten per-
sonen beschähend.

Das aber ist das aller böst / das da vns
Gott durch sin wort / vnd in anderwäg / als
durch wunder vnd zeichen vilfaltig warnet/
wir nichts dester weniger fräch vnd sorgloß
sind/vnd vmb keine trüwe warnungē nichts
gebend / ja die übel hassend / die vns gern vor-
zytlichem vnd ewigem jamer werind.

Wir lernend ouch / das man niemand ver-
achten solle. Dann offit ein schlächter armer
gsell/vns warnen mag/vnd güte dienst thun
in grossen gfearen/in wassers/shüers/kriegs-
not / wie dann Gott ouch durch die warnung

Dises armen knächts / sinen herren vnd
sin gantz hußgsind bym läben
erhalten hat.

Von

Sie sächst Predig.

36

Von des vetruncnen
Nabals läben vund
tod/2c.

Die sächst Predig.

Wie Abigael dem Dauiden entgägen
gritten mit einer eerlichen schäncke/ vnd im
dü füßen gfallen sye.

So ylet Abigael vund nam zwey
hundert brot/ vnd zwen schlüch oder
legelen mit wyn / vnd fünff gekochte
schaaff/ vnd fünff maß grösts måls/
vnd hundert stuck rosyn od wynbere/
vnd zwey hundert stuck sygen/ vund
hat die esel mit geladen: Vnd sprach
zü jren jüinglingen: Gond vor mir
hin/ sich ich wil üch nachkōmen. Jren
mann aber dem Nabal hat sy es nit
anzeigt. Als sy vff den esel saß/ ist sy
durch ein verborgnen wäg den berg
abkōmen/ vnd sich Savid vund sine
mann kamend hinab jren entgegen
vñ sy begegnet jnen. Savid aber hat

℥ iij

Von dem Tibal

gesprochen/ Ich hab vmb sonst behütet alles das er in der wüste hat/ das da nichts gmanglet hat / an allem was er hat/ vñ er bezalt vñ er vergilt mir güts mit bösem. Gott thüye diß vnd nach mer den fyenden Sauids/ wo ich disem biß an morgen laß über blyben einē der an die wand bruntzet vß allem das er hat. So nun Abigaelden Sauidē sach/ steig sy ylends vom esel vñnd fiel für Sauid vff jr ansicht vñnd neigt sich zur erden. Vnd fiel jm züfuß.

Der wyß König Solomon spricht in sinen sprüchwörterē am 16. capitel/ der mensch nimpt jm in sinem hertzen ein wäg für/ der Herr aber richtet oder leitet sinen gang. Die menschen habend ire anschleg wöllend dahin oder dort hin reisen/ oder diß vñ yeres vßrichten/ güts oder böses / aber es gadt jnen vil an jren anschlegen ab. Dann Gott wil es oft ein anderen wäg haben. Der Heilig Paulus zoch Actorum am 16. cap. mit Timotheo hin vnd hâr durch die stett / als sy aber durch Phrygiam vnd das land Galatiam zugend/ ward jnen

inen gweert von dem h. geyst/das h. Euang-
gelium in Asia zü predigen. So sy kamend
in Mysiam/vnderstündend sy gen Bithynie
am zü reysen / aber der geist ließ es inen nit
zü. Es wer ein güt werck gsyn/wann sy das
Euangelium hettrind geprediget an denen or-
ten/es wolts aber Gott selbiger zyt nit/sun-
der sy soltend über das meer schiffen/vnnd in
Macedonia Gottes wort verkünden. In
das gägenteil wil einer etwas thun das böß
ist/aber Gott ist darvor. Wie wir hie am Da-
uiden sähend. Der hatt im eigentlich fürge-
nommen den Nabal sampt sinem hußgsind
zü erschlahen/vnd meint er hette güt füg vn
rächt darzü (wie wir oft vnß selbs in vnse-
ren sünden rächt gäbend) aber Gott hatt in
gehinderet durch die Abigael / welche an-
fangs niener von nichts wußt (dann sy vff
den selbē tag vil zü schaffen hat) aber der Knä-
chten einer erzalt iren was sich verlossen/vnd
warnet sy / Das sy by zyten zun sachen thete/
oder Nabal/ sy vn das gantz huß gsind wur-
dind zgrund gan/wie da oben ghört.

Daruff volget wie sy sich gehalten / was
sy gethan/vnd wie sy die sachen angriffen ha-
be. Sy verachtet die trüw warnung nit/sagt
nit/ Wär woltes dir gsagt haben? es ist am
bösten gsyn / Du bist ein vnruwiger gsell/
fürchst dir so legg ein Bantzer an. Dann sy
wußt wol/ das der Nabal ein böß schantlich

Abigael
verachtet
die warnung
nit.

Von dem Nabal

mul hat/das im niemandt zlieb / sonderlich
wenn er wol Bezächt was. Zu dem kont sy
als ein wyß vnd verstendig wyb wol ermäs-
sen/das der hunger ein böser radtgeb/vnnd
das hungerstotten lüten nichts zuil ist/ Deß-
glichen wie es so wee thüt/ wenn man einen
verachtet vnd schmecht: über das was es vff
im tregt/wenn man gesandte Botten schmech-
lich haltet / Darumb laßt sy iren die sach mit
ernst anglegen syn/sy ist nit sorgloß. Dann
in dem sal kan man zuil vn zwenig thun. Dz
ist zuil/wenn man einem yetlichen der dahar
kompt/ vnd alles das gloubt/das man sagt.
Dann man findt etwan lüt / denen wol mit
vnglück ist/wo sy könnend lüt wider ein an-
deren herzen/vnd vnruw machen/so sparend
sys nit. Vor solchen lüten ist sich wol zehüten
man sol iren reden nit bald glauben. Das a-
ber ist zwenig/wenn man nichts gloubt/ alle
warnung in lufft schlecht/ vnnd sorgloß ist.
Dann mit verachten / wirt gfaar nit vermit-
ten. Hette dise Abigail desse red lassen für
oren gan/vnd nichts zun sachen than/ so we-
rend sy alle mit einanderen vmbkōmen. Wie
manche statt oder veste ist eroberet/wie man-
ches kriegs volck gschlagen/dz sorgloß gsyn
vnnd keiner warnung hat wellen glauben?
Es ist ein alt sprüchwort Mater timidi non flet
eines forchtsamen müter weinet nit. Wenn im
einer fürcht/so hat er sorg/grabt gfaar ab wo

cc

er kan/truwt nit meer argwönigen lütē/ dan
er sicht/welcher aber fräch ist/ der hat nit sorg
handlet vnbefinde/vnnd wirt etwan überylt/
schnydet nahen den sinen zü werch/das sy zü
weinen vnd zü klagen habend.

Abigael nimpt nit die flucht an die hand
jr läben zefristen / vnnd laßt jr hußgkind im
schweyß/sy rüfft nit ire fründ vnnd nachbu
ren an/wider den Souden/oder Saul/ der
jren villicht zü seer gßaffen was / sonder wie
ein eersamer vnnd wolgeüpter artzet / wenn
er einen fracknen heilen wil / sicht was die
vrsach/vnd der vrsprung der frackheit sye/
damit er dem selben möge weeren. Kompt
die frackheit vö hitz/so brucht er kalte ding
in der arzny/kompt sy von kelte/so brucht er
hitzige ding: Also thüt Abigael ouch / vnnd
diewyl sy verstünd/ dz David erzürnt was/
erstlich von des wägen/das man im ein wee
nig spyß versagt/dennach das man in an si
nen eeren vnd gütten namen gschmecht vnd
vff vff das höchst verachtet hat/da wyl sy die
zwey ding hinnenemen/ vnnd bringt im er
stlich ein radtliche schencke. Demnach bez
wyßt sy im eer mit dē/dz sy vom esel springt
im den fußsal thüt / vnd fründtlich mit im
redt/im sine gebürendē titel gibt/ıc. Wie wir
zum teil vff dißmal vn̄ zum teil vff ein ande
re zyt / mitt der hilff vnnd gnad Gottes hö
ren werdend.

Von dem Tabal

Abigael
kompt selb
zū Sauid.

Sy schickt nit botten zum Dauiden/richts
auch nit mit einem Brieff vß / sonder macht
sich selbs vff die straß. Dann jr gägenwirtig
keit mocht vil bringen. Es ist ein alt spruch-
wort/Wilt daß dir geling/so lüg selbs zū di-
nem Ding. Præsentia hominis, præsentia leonis.
Hette sy glich ein trüwē knecht gschickt/so het-
te er mit einem einigen vnbesinneten wort/
vil mögen verhöhen.

Abigael
ylt.

Erstlich wirt gemäldet/sy habe geylet. Dan
hette sy die sach/ wie wir sagend/vff den lan-
gen Banck gespilt / so hette es nichts sollen.
Die sachen stündend dermassen / das sy kein
verzug mochtend lyden. Hett sy lang wellen-
radt süchen / so wäre vil versumpt worden.
Die Komlichkeit der zyt/sol man nit fürüber
lassen/etwan ist ylen güt/etwan schädlich.

Demnach hatt sy ire esel gladen mitt aller-
ley essiger spyß / vnd ouch tranck / sy lüd jnen
vf/zweyhundert Brott / fünf schaaff die grü-
stet warēd/2c. zween schlüch mit win. Wir sa-
gend legelen. Dann wie wir in vnserem land
Boumöl in schlüchen fertigend / also habend
sy gemeinlich wyn/wasser vñnd anders dar-
rin gefürt/darvon wir oft in der h. gschrifft
läsend. Dises was ein eerliche schencke / vnd
denen kriegslüten lieber/ weder wenn sy jnē
silber vnd gold hette geschänckt. Dann sy wa-
rend in der wüste/vnd warend hungerig vñ
durstig. Es ligt nit wenig an dem/wen man
einen

Die sächst Predig.

39

einen vereerē wil/dz man im gaabē gābe die
in fröuwind. Die vñständ machend ein gaab
groß/als wer einem etwas schencke/welchē/
was/wenn/wo vnd worumb/2c.

Sarumb gibt sy im aber dise gaab oder
schencke/das er die milch wie wir sagend/ni
der lasse. Dann die gaaben vermogend vil.
Proverb. am 17. Ein stein des gunsts ist die
gaab in den ougen desse/der sy hat/alles das
darzū er sich wendet/wirt er glücklich vñris
chten. Im 18. cap. Die gaab des menschen
machet einem wyte/vnd fñrt in für hohe pers
sonen. Im 21. cap. Ein heimliche gaab stillt
den zorn/vñnd so sy in büsen gschoben wirt/
stillt sy das heffrig wütten. Welchs man äs
ben so wol von gaaben die offentlich gāben
werdend/verstan mag. Wir habend zwey
schöne exempel/die vñß anzeigend/wie ouch
der h. patriarch Jacob die zornigen mit gaas
ben habe vnderstanden zū gwünnen. Gen.
32. vnd 33. cap. So Jacob hort das im sin Brü
der Esau/mit dem er als vil als in fridē stünd
mit 400. mañen engegē zuge/forcht er im/vñ
schickt im von sinem vch ein schöne gaab/
namlich ob den fünffthalb hundert haupten
Klein vnd groß veech. Dann er gedacht wie
im text stadt/Ich wil in versünen mit dem ge
schencck das vor mir har gadt/ Darnach wil
ich in sāhen/villicht wirt er mich annemmen.
Esau empfieng in mit sampt den sinen ganz

Die gaabē
bringend
vil zwāgē.

Von dem Nabal

Zweyerley
gaaben.

fründlich/vñ ersprachet sich mit jm/2c. Dar-
nach Ge.am 43. wie Jac. verstünd dz d herr
in Aegypten/dem sine sün Korn abkouffte hat-
tend(dann er nach nit wußt das es Joseph
was) sine sün ruch angfaren was / den Si-
meon verwaret hat/ biß sy den Beniamin zu
jm Brechtind/hieß er sine sün/ als sy zum and-
deren maal in Aegypten woltend Korn kouf-
fen/dem herren von den Besten fruchten des
lands ein gaab bringen/damit er dester willi-
ger mit jnen wäre. Es sind aber zweyerley
gaaben/ honoraria & corruptoria. Es sind ga-
ben die man vmb eeren willen gibt als da
du einem fründ oder nachbur der dir oft ge-
dienet/ein Baden schencke / letze/ hußstür/ein
güt jar/oder anders gibst / din danckbarkeit
vnd güten willen anzüzeigen / ouch fründt-
schafft züerhalten vnd zü pflanzen. Es sind
Gotts gaaben/da man den Gottsdienst vnd
arme lüt zü erhalten stüret. Demnach sind
verderbliche schädliche gaaben / die man vff
ein böß end hin gibt/als da einer einem rich-
ter ein gaab gibt/dz er jm vß einer fulen sach
ein güte vnderstande zmachē/da einer durch
gaaben sich in gwalt yntringt. Da einer einē
wyb oder tochter/ein gaab oder kram gibt/sy
zü gschenden. Siba bracht dem Dauiden
garnach ein schencke wie Abigael / das er in
wider sinen herren den Mephiboseth / mit
dem Dauid wol zfriden was/ möchte verbit-
teren

teren vnd im sin güt abzühen / wie auch beschach 2. Sam. 16. Solche gaaben solt man weder gäben nach nânnen.

Dauid aber vnnnd die sinen habend dise gaab von der Abigael mit güter gewüßne wol mögen empfaben / eigentlich zü reden / ist es jr verdienter lon gsyn. Man sagt / In muneribus animus est optimus / Das best in den gaaben sye der güt will / Der fröuwe einen Bas / dan etwan die gaab selbst / weñ sy glych kostlich ist.

Abigael heist die knächt der landstraas nach mit dē gaabē voranhin gan / so welle sy bald hernach komē. Also hieß der h. patriarch Jacob / vō dē vor gemeldet / sinē diener auch mit der schencke vor im har zü sinem Bruder Esau ziehen. Abigael wirt auch gedacht haben / weñ Dauid die schencke sähe / so werde dester besser mit im zhandlen sin.

Sy hat irem man dem Nabal nichts daruon g sagt. Dan sy wußt sin gattung / er hette sy nit wellen verfaben lassen mit der schencke / hette also sich selbst vnd die sinen vmb das läben gebracht. Es woz nit mit im zü reden / wie mit einem anderen der vernunfft vnnnd verstand hat : so stadt daruff / er sye schon im dampff gßassen / da hette sy schlächten bscheid funden. Wolt sy das etwas rechts ghandlet wurde / so müßt sys selbst thun. Dan vō Nabal hat sy wed trost / hilff noch radt. Sunst sol

Von dem Nabal

ein wyb nit hinder irem eeman etwas wellen
verschäncken / vertuschen / oder verkouffen.
Ja ouch im almüsen gäben / sol sy mitt vort
wüssen ires mans handeln / wol wenn es ir
eigen güte ist / so hat es ein andere rächnung /
yetz redt man von gemeinem güte. Die Abiga
el gab vil hinwäg / aber es müßt sin / damit
das der David hinder sich ghalten wurde.
Es ist ein grosse thorheit / wellen sparen da
man rychlich vß gäben sol vñ müß / man sagt
gemeinlich / das ist ein bößer pfennig der ei
nem ein guldin schadet. Hette Nabal vorhin
mit gütem willen halb so vil dem Dauiden
lassen werden als im sin wyb yetz binget / so
wäre er wol zfriden gsyn. Nabal kondt wed
habē nachlassē / er gab on zwyfel vß da es nit
notwendig was / dargegen was er karg / da
er ein milte frygebe hand solt ghept haben /
wie man der lüten nach vil findt.

Die Abigael saß vff / vnd reidt nit die räs
chte landstraß / sonder ein heimlichen verbor
gnen wäg (dann sy alle glägenheit wußt)
vñ wie sy in das thal kam / da sach sy den Da
uiden mit sinen kriegslüten den Berg abkom
men. Sifen wäg rytet sy / das sy dester ee zü
Dauiden käme / dann er der näher wirt gsyn
syn. Demnach das sy niemant hinder sich wis
se oder vfhielte / ouch darumb das sy by iren
selbs dester baß trachten möchte / wie vñnd
was sy mit dem Dauiden wölte reden. Dan
es

es was nit ein fleins / Das sy mit jm / Der gar
 erzürnt was / in bysyn seiner friegsküten re-
 den solt. Cicero selbs der verrümpft redner
 entsagt sich nit wenig ab dem / da er dem Ma-
 loni sin sach vor radt zu Rom solt darthün /
 als er sach / Das wider den gemeinen Bruch
 gewapnete lüt zugegen warend. Vnd darby
 sichst / Das Abigael ein Dapffer vnd geberzt
 wyb gsyn ist / Das sy in solcher gfaar / reden
 kan vnd darff / was jren von nöten was.

David hat vorhin / vntd villicht yetz wie
 derumb gesagt / er hette vergäbens dem Kla-
 bal das sin beschirmt / wie daoben erzelt
 ist. Dife wort hat Abigael nit mögen hören /
 werdend aber darumb gesetzt / Das wir sã-
 hind wie not es gethon / Das jm diß wyb ist
 entgegen kommen.

So bald sy des Daviden ansichtig wor-
 den / ist sy den nächsten vom esel gesprungen /
 vnd vor dem David vff ir angesicht gefallen /
 Demnach hat sy angfangen mit jm reden. Es
 ist by jnen der gemein Bruch gsyn / Das sich
 wyb vnd mann gegen Künigen vnd andern
 hohen personen der gestalt gehalten / sich vor
 jnen gedemütiget / vnd jnen eer bewisen ha-
 bend. Klabal hette den Daviden nit angese-
 hen / hette jm kein gut wort gäben / Dann er
 mocht wol wüssen das er bym König Saul
 in vngnaden was. Dife aber erniderget sich
 vor jm / thüt jm sin gebürende reuerentz oder
 eerenbietung.

Von dem Nabal

Wer sich
vor dem
spend des
müthiget
groünmüthig
Dz hertz an

Franciscus
Dandulus

Nun habend wir aber gemeinlich die ardt
das wenn sich einer vor vns demüthiget/so ge
wint er vns bald das hertz an. Sye einer
glych so stolz vnd übermüthig als er yemer
welle/so laßt er meerteils nach/weñ in sine
widersächer zfüßen fallend/ vnd sich an in er
gäbend/wie man vß volgender gschicht vere
mercken kan. Antonius Sabellicus schrybt/
Eneade 9.lib.7. Deßgliche Baptista Egnatius
lib 4.cap.5. Dz die Venediger/ die statt Ferrar
yngenommen/welches der Papst Clemens
(der 5. diß namens) so dozmal zu Quinion
in Francrych was/nit lyden lyden wolt/dañ
er hette gern selbs die hand darüber geschla
gen. Ther deßhalben die Venediger in ban/
vnd wiewol sy ire trassenliche Botschafft zu
im sandtend in züuersönen/kömend sy doch
wideruñ vngeschaffter sachē heim. Darnach
santend sy ein anderen/Franciscum Dandu
lum/welcher mancherley versucht/ ob er das
zornmüthig vñ nachgirik gemüt des Papsts
möchte erweichen: aber er ward ertlich mal
abgewissen. Nach langen nam er ein nütwen
wäg zühanden / dann wie der Papst zü ym
byß in sinem palast aß/legt er ein y sine kette
nen an sinen hals/gieng vff allen vieren/wie
ein vnuernünfftig thier/für des Papsts tisch
bat in ernstlich dz er dē Radt zü Venedig ver
zychē/vñ in vß dē Ban thün welte. Dan vor
hin wurde er kein ande wyß od ggestalt an sich
nemen biß das er solichs erworben hette Der

Sie sächst Predig.

42

Bapst verwunderet sich ab im/hieß in vffstan
vñ dem herzog vñ radt zü Venedig in sinem
namen anzeigen/er hette inen verzigē/vnd
welte sy zü gnaden vfnāmen/ ouch fürhin jr
güter fründ sin. Welches dem Rhat so ange
nām was/dz sy disen gsandten vnläng dar
nach zü irem herzogen erwöltend. Er ward
ouch Canis der hund genandt/von des wägē
dz er wie ein hund vor des Bapsts tisch glā
gen w3/1c. Man sagt dz die löuwen die art
habind/wen̄ einer vor inen niderlige/so thū
end sy im nichts meer. Rächte adeliche gemüt
sind nit raach girig/wen̄ sy sähend das einer
Bekentt gfelt haben/vñ sich gāgen inē demü
tiget/lassend sy Bald nach: Wie aber dz wyb
mit dē Dauiden gredt wirt hernach volgen.

Vß disem sähend wir vnserē grosse blinde
heit vñ arbentsäligkeit. Es ist ein einiger ar
mer knecht zur Abigael komē / hat sy gwar
net / solle sähē wie sy dē sachē thūe/ Dauid
d sye gar erzürnt/es sye zü Besorgē/es werde
nit lang anstan / sy werdind erschlagen wer
den/da thūt sy von stundan darzū / vnd siche
dz er gestillet werde. Zü vns komend d diene
ren Gottes täglich vil/vñ vnder denē vil fürs
nemer/gleerter/wolberedter lütē / die zeigē
an wie Gott über vns erzürnt sye vō vnserer
sünden vñ lasteren wägē/wir wüßend ouch
dz Gott von yewelten hat die laster gstraafft
hat/ darzū Beschāhend vil warnungē durch
Grosse wund vñ zeychē / wir selbs gābed die

Don dem Nabal

urteil/vnser wäsen möge in dharr nit also be-
kon/ Gott müsse vns straffen / noch nichts
destoweniger thut niemant darzü/das Gott
widerumb mit vns versünt werde / wir be-
gegnend jm nit mit gaaben vnd ernstlichem
gebätt/das er die straffen abwende/ sonder
sarend leider mütwillig in allem Bösen für.

Semnach lernend wir dise fürsichtigkeit/
Das so wir oder die vnseren andere mit wozu-
ten oder wercken erzürnt hettend/wir darzü
thügind/damit das die so von vns beleidigt
sind / mit vns widerumb zefriden werdind.
Wir söllend darvor syn/ das nit wytere flag
komme /ist es dan in vnserem vermögen /so
söllend wir vnser gmüt gegen jnen mit gaab-
en/ oder anderen güthhaaten erzeigē. Gott
wölle vns sin gnad mitteilen/das wir den sa-
then rächte nachsinnind / vns enderind vnd
besserind / vnd demassen in handel
schickind/damit wir der zytlichen
vnd ewigen straff mö-
gind entrünnen.

Don

Sie vierdt Predig.

43

Wan des vertruncnen
Nabals läben vnnnd
rod/ze.

Die sibendt Predig.

Wie Abigael den Dauiden mit einer
schönen red/von sinem bösen fürnemmen ab
bestau/ermaudt habe.

Vnd sy fiel zū sinen füßen vnnnd
sprach: Ach min herr min sye dise miß
that/vnd laß din magt reden vor di
nen ore/vñ hör die wort diner magt.
Min herr setze nit sin hertz wider di
sen man Belial / wider den Nabal.
Sann er ist wie sin nam heyst. Sin
nam ist Nabal/thor vnd thorheit ist
by jm. Ich aber din magt hab die
jüngling mines herren nit gesehen/
die du gsendt hast. Nun aber min
herr so waar d' herr läbt/vñ so waar
din seel läbt/d' Herr hat dich verhin
deret/das du nit kämist in das blüt/
vnd hat din hand erhalten. So müs

f ij

Von dem Nabal

send nun werden wie Nabal dine sy-
end/vnd die minem herren übel wel-
lend. Das ist die gaab die din magt
minem herren hargebracht hat / die
nim hin vnd gib sy den jüinglingē die
byn füßen mines herren wandlend/
vnd gib diner magt die überträttung.
Sann der Herr wirt minem herren
ein sicher huß machen. Der dafürt
die Krieg des Herren/vnd kein böses
ist an dir gefundē din läbenlang. Es
hat sich einer erhebt dich zuuerfolgen
vnd stelt dir nach diner seel/aber es
wirt die seel mines herrē angebundē
im bündeli vnd läbendigen by dē Her-
ren dinem Gott. Die seel aber diner
syenden wirt geschlingget werden in
mittendes lätsches der schlingen wen
vnd Herr alles das güt minem herren
thun wirt/das er dir versprochen hat/
vnd gebieten/das du sin herzog syest
über Israel/so wirt es dem hertzē mi-
nes herren nit ein anstoß nach fal sin
dz du nit blüt vergossen hast on vr-
sach

sach/vñ dir selber gbulffen/ so wirt d
 Herr minem herren wolt hñ vñnd
 wirst an din magt gedncken.

So bald Abigael vernommen hat/das
 Dauid erzürnt vñ vngedultig/dē Na
 bal vñ all sin hußg sind erschlahē wela
 le/vñnd yetz im anzug sye/hat sy kein
 rüw/sonder sicht das sy es by güter zyr abstel
 le/nimpt die sach wyßlich zū ha nden. Daß sy
 Kompt dem Dauiden selbs engägen / mit mit
 lären händen/sond mit einer schönē schencke.
 So bald sy den Dauidē ersicht/springt sy vō
 irem esel/falt für in nid/als vor irem herren/
 w3 vñd wie sy aber mit im gredt / vñd in vie
 ler dingen erinneret habe/ dz er von sinē bö
 sen vorhaben abstände / wirt in disen woz
 ten gemäldet.

Vß diser red Abigaels ershint wie wyß/be
 redt ouch dapper vñ gherzt sy gsyn. Dañ kein
 wunder gsyn/wen sy vor forcht nichts fōnen
 sond gar bstanden wäre. Dañ sy müßt mit dē
 Dauiden reden/der gar erzürnt was/vor dē
 kriegslütē/es galt jr lyb vñ läbē. Wie mā cher
 dapper redlicher mā erstunet d massen wen er
 nun vor einē eersamē rhat od gemeind reden
 sol/ob es glich in vñ die sinen nichts antrifft/
 dz er nit weißt wo er ist/od w3 er sagt?

Dise red ist nit nun schön vñ wol gsetzt/
 sond ouch gar fruchtbar / wie bald hernach
 wirt volgen. Sy louget nit das sich Nabal



Von dem Nabal

übel gägen jm ghalten hab / dann es lag of-
fentlich an tag: mit lögnen hett sy die sach
erst böß gemacht. So schrimpt sy in nit/dann
das er gethon ließ sich nit verantworten/son-
der begärt allein d' gnaden. Welchs vil bringet
Byverstendigen lüten. Sy redend sölchen lü-
ten das best/sagend diser erkennt das er übel
ghandelt/er begärt der gnaden/er wil es nit
meer thun/sye man jm gnedig.

Sy spricht: Ach min herr/min sye dise miß-
that. Sy stelt sich an jres mans statt/ nimpt
sin mißthat vff sich/laß dir sin/wil sy sagen/
ich habe das gethon / so Nabal gethan hat.
Das aber thut sy der sach z'gütem. Dañ mit
den wybsbilderē hat mā meer erbermbdt vñ
mitlyden/dañ mit den mānen/man übersicht
jnen/wen sy etwas redend oder thünd / das
zuil ist/das man den mannen nit wurde über-
sähen. Sunst beschicht ouch das einer etwan
sagt/er habe ein ding gethan/dz ein anderer
gethan hat/dem er friden schaffen wil. So er
meint man zürne an in nit / sonder habe von
jm wol vergüt/ıc. Allein sagt sy/laß mich vor
dir reden/vnd höz mir zū. Dann grosse hers-
ren habend gemeinlich den bruch/das wenn
sy an ein ding kömend/so muß es syn. Wel-
lend nun nit zühörē. Wie mancher nimpt jm
für/den waarē gloubē zū durechten/ vñ laßt
nit darzū reden/fart für vñ besudlet sich mit
vnschuldigē Christiē blüt/losete er wie David
vnd

Sie sibendt Predig. 45

vnd verstände die sach im grund/ so wurde er die vernolgen die in wider gläubige lüt/ so er für fäzger haltet/ anhezend. Sy nend sich nit nun yetz / sonder ouch hernach / sin magdt/zum sächsten mal/in/ den Dauiden/ sten herren / zum vierzähenden mal. Ist in dem/dem Nabal vnglych/der schneider von im redt/wär ist der Dauid/der son Isai:

Lern darby fürnehmen lüten/vnd insonderheit dinen herren vnd oberen/ir gebürende eer anthün. Wie der H. Paulus zün Römern am 13. cap. leert: Gebend yedermann was ir schuldig sind / die eer / dem die eer gebürt/ıc.

Min herr setze sin hertz nit wider disen mann Belial / den Nabal. Sin nam̄ ist Nabal/ thoz/ vnd thozheit ist by im. Setz es nit rieff zü herzen/ laß es dir nichts züschaffen geben/ frag nichts darnach/ das er also vnbescheidē gsyn ist. Was Belial sye/ist da oben erflärt. Nabal heißt/wie anfangs ghört/ein thoz/ der namen/wil sy sagen/ist nit an im verloren. Ein wyser vnd dapffer mann/nimpt sich nit zü verdriessen an/weñ er glych von einem kind/vnsinnigen oder thozächten menschen geschmächt wirt. Er weißt wol daß sy nit wüßend was sy redend/vnd wohin ire reden langend. Weñ es glych anderlüt hörend/so dienet es im nit zü verkleinerung / man setze nichts daruf. Wenn sich einer vnderstünde

Einer sol sich nit an thozē rybē

Von dem Nabal

an jnen zü rächen/so lachete man sinen/vnnd sagte / ich weiß nit welcher der witziger ist. Da ist kein eer züerjagen. Nun heißt diser der Nabal ein thoz / ist vnd blybt ein Nabal/ ein thorechter arbeitsfälliger mensch an dem nichts zügrünnen ist. Darumb vnderstand dich nit an jm zü rächen. Wir sagend ich wil mich nit an jm verhönen.

Keiner sol
den anderē
übernehmen

Gebürt es sich aber/ daß sy iren mann ein mann Belial vñ einen narren schiltet? Unser Herr spricht im H. Euangelio Matth. am 5. cap. Welcher zum anderen sage du narr/ der sye deß hellschen fhärs schuldig. Antwort/ Diser was ein mann Belial vnd ein narr/ vñ gibet jm sy deßhalb sinen rächte nāmen. Wār vmb sin thān vnd lassen wußt/ hielt jn für ein Nabal. Demnach hat sy jn hiemit nit wöllen verkleinerē/sond bym läben behalten. Sonst sol keiner den anderen übernehmen. Sonderslich sol ein wyb iren man vor ougen vnnd in eeren haben/nit zü jm sagen/ du narr/ du esel/ du stockfisch/ıc. Dann das gebürt iren nit. Es söllend ouch die elterē den kindē weeren/ daß sy ein anderen nit übernehmend / welches vnder jnen gemein ist / vñ wen mans jnen nit weert/so gwonend sy deß selben/ vñ bringēd sich selbs hernach / wen sy zü iren ragen kom- mēd/in groß lydē/vñ schwäre rächtschändel.

Da David dise ynred hett mögen haben/
Wirstest du dan daß din man so vnnernütff
rig vnd

Sie sibendt Predig. 46

eig vnd vnbescheiden was / so soltest du mine
knächt eerlich empfangen haben/2c. Da zeigt
sy an/sy hab von keinen dingē nichts gewüßt/
sonst wölte sy wol daruor gsyn syn/das jnen
die schmach von irem man nit wäre begeg-
net. Si ewyl er so vil wercklüt hat/ vnd ein
groß fäst haben wolt/hat die güet frouw in d
kuche vnd sonst/so vil züschaffen/ das sy nit
allenthalben syn kondt. Es ist zweyerley vn-
wüßheit/ etwan wil einer ein ding mit ge-
walt nit wüßten/ vn̄ ist mit gesähenden ougē
blind/etwā kan einer ein ding nit wüßten/vi-
ler dingen wirdt der den sy anträffend/ zum
letsten innen. Sy zeigt ouch verdacht an/sine
diener syend zum teil selbs schuldig / das es
also ergangen / sy soltend iren nachgefraget
haben/by dē man fand man keine rächten be-
scheid. Sy gibt ouch Dauiden züuerston/wie
vnrächt er handeln wurde / wenn er mit der
raach fürfüre / vnd die todte/ die desse nichts
vermohtend/die von denen sachen nichts ge-
wüßt/denen es in trüwē leid gsyn/nach dem
sy daruon gehört : vnschuldig lüt sol man
schirmen/nit töden.

Daruff schwœert sy/ So waar der Herr lä-
be/vn̄ sin seel läbe/ so habe jm̄ d̄ Herr gweert
oder jn verheteret / das er nit in das blüt
kame / ist ein ard züreden/das er nit vnschul-
dig blüt vergusse / vnd habe jm̄ sin hand
still gehalten. Sy schwœert nicht lychners-
tig (wie vil lüten / ouch wyber / iren mund

Von dem Tatal

Abel gweinnend) sonder daß sy iren mann/
sich selb/vnd die iren Gyn läben behalte.

Unschuld
des blut
vergiessen.

Der Herr zwar hat gweert vñ verbotten/
Das man nit vnschuldig blüt sölle vergiessen.
Dann nach dem sündtfluß wie Noe sampt
sinem vöckly vß der arch gieng / sagt Gott
vnder anderem Gene. am 9. Cap. Wär men-
schen blüt vergüßt / desse blüt sol ouch durch
menschen vergossen werden. Dann Gott hat
den menschen nach seiner Biltuß erschaffen.
Nit daß der nächst zühinlouffen sölle / vñnd
einen vmbbringen / Der einen anderen vmb-
bracht hat / sonder hiemit setzt Gott die ober-
keit yn / gibt iren das schwärdt in die hand/
daß sy vneerlich todschleg vnd andere males-
fizische sache / an lyb vñ läben straffen sölle.
Im gsatz sagt der Herr / mir hört die raach/
ich wil widergälten : In heiligen zähen ges-
botten sagt Gott / du solt nit töden / namlich
vß raachgyrige oder anderer böser anse-
tung / vnd vß mütwillen / sonst nimpt er der
oberkeit nichts vß den händen / deren er an-
derswo ernstlich besilcht / daß sy das böß nit
dulden / sonder straffen vnd vßrüten sölle.

Aber hie redt Abigael vom selben nicht/
sonder habe es David worfür er wölle / so sye
das nit on Gottes ordnung vñnd schiebung
beschähen / daß sy im entgägen gritten / vñnd
yetz mit im rede. Dañ durch das mittel wöl-
le Gott in verhindernen vnd daruor syn / das
er sine

Sie sibendt Predig. 47

er sine händ nit mit vnschuldigem menschen
Blüt beslecke. Dann Gott hat der mittlen vil
vñ mancherley dardurch er einen vom bösen
abzücht/vnd zü gutem reizt vnd trybt.

Wie aber das nit on sondere ordnung Got
tes Beschähen / daß dises wyb den Sautiden
hinder sich gehalten / also beschicht das ouch
vß Gottes ordnung / wenn vns noch erwan
lit entgegen komend / die vns hinder sich zü
hind / das wir böse ding so wir vns fürgee
nommen/nit mit der that vollbringend: Als
da einer erzürnt ist / vñ den anderen schlagen
wil/vnd du sagst/ Warum woltest das thun/
er hat villicht das nit gredt noch gethon (wie
offt beschicht) darumb du yetz erzürnt bist.
Also wenn dich einer heist abston von dinem
gyt/hüry/trunckenheit/hoffart/nyd vnd haß
oder anderem / so gedencf Gott hat dir den
gesandt/vnnd sucht din heil/darumb so volg
im. Sag nit hat dich der tufel här tragē/was
fragst du darnach was ich vor mir habe/oder
thun wölle / du gibst mir doch nichts daran.

Daruf wüntscht Abigael / das die syend
des Sautids/vnnd wölche im übel wöllend/
syend oder werdind wie diser Nabal/das ist/
im nit mer schadens mögind züfügen / dann
habe er sich keiner gfaar zübesorgen. Dann er
richt sin ding allein mit sinem bösen mul vß:
er schalt den Sautiden / gedacht aber hernach
nit mer daran. Wår im das mul hette über

Gott züchte
vns hinder
sich.

Von dem Nabal

sehē/so was kein wytere gfaar: Die aber sind
übel zū entsitzen/die listig sind/die gute wort
einem vnder ougē gābend/hinderwertz aber
trachtend/wie sy in hinderredind/oder gar
vmb lyb vnd läben bringind.

Etlich verstond dise wort also/Ich wolt di
nen syenden nit grössere straaff wünschen/
Dann die über Nabal gon wirt. Thust du im
gleich nichts/so wirt im Gott sin Bosheit nie
schäncken/sond wirt in zū siner zyt wol findē

In dem erst überantwortet sy im die gab/
heißt sy den jüinglingē gāben/die vmb in wa
rend/oder im dienetend. Als wolt sy sagē/er
wäre einer grösseren vnd herrlicheren wārt/
dise wäre zū fleinfüg/noch hette sy im die
selb wöllen bringen/vnd damit jr gut danck
bar gemüt gegen im wöllen anzeigen vnd zū
erkeñen geben/er solte rächt/wie wir sagend
den willen für das werck nemmen.

Daß sy im nit von stundan/die schäncke
überantwortet/sonder erst da sy ein wyl mit
im gredt/vnd jren selbs ein zügang gmacht/
ist ouch der sach zū gutem beschähē. Er hette
sonst die gaab fry mögen verwerffen. Denn
wenn wir wider einen übel erzürnt sind/vnd
er vns etwas gibt/dörfend wir es wol dör
hinuß werffen vnd sagen/wir fragind im
vnd siner schäncke nichts nach/er solle vns
ab den ougen gon.

Die gaab nennt sy vff Hebraische ard/be-
rachah

Sie sibendt Predig. 48

rachah benedictionem / ein sägen / villicht hat **Benedictio:**
bend sy gaaben darumb also genehnt / daß sy
könnend erkennen / daß sy vß Gottes sägen ir
güt gehet: item daß sy sines sägens teilhafft
werdind syn / wenn sy sich was zün eeren ist /
nichts lassind rüwē. 1. Sam. am 30. cap. Wie
Dauid vom roub den elisten Juda gaaben
schickt / sprach er nemend benedictionem / den
sägen von dem roub der syendē des Herren.
Gene am 33. neht Jacob die gaab so er sinem
Brüder schickt / ouch ein sägen od benedyung.
2. Cor. am 9. nennt Paulus ouch die collectam
die sy züsamen gestürt hattend / benedictionē,
ein sägen.

Vergib diner magdt die überträttung / Dan
vor habēd wir gehört / dz sy die mißthat ires
mañs vff sich genomēn hat. Dan d Herr wirt
minē herren ein sicher oder vest huß machē. Wenn
du min huß nit vmbkeerst / sond erhaltest / so
wirt Gott din huß vnd geschläch ouch nit
vmbkeerē oder vßrüten. So du aber fürfarē /
vñ alles vßrüte wöltist / so wurde dir glich
widerfaren. Dan der Prophet sagt / Wee dir
der du roubest / dan du müst widerumb Be-
rouber wordē. Der Herr sagt / Mit was maß
ir mæssend / mit der selben wirt üch ouch ge-
mæssē werden. Wir habend vil byspil wie
Gott gantzē vöcker vnd besonderbar perso-
nen / die ander on nodt überzogen / inē ir huß
vnd heimē verbrennd / glycher roß gestraafft
habe.

Von dem Nabal

Du magst ouch läsen/ der Herr mache dir ein vest huß. Daß sy nit nun in verkünde/ sin huß werde vest syn/ sond von Gott sömlichs wünsche vnnnd begäre. Es ist im grund ein meinung.

Der da fürt des herren krieg. David hat bisz här in kriegem sich dapffer gehalten / hat wider die syend Gottes die Philister vnd ander gestritten/ vnnnd sy oft überwunden/ sin lyb vnd läben dapffer gwaget für syn volck/ vnd das selbig beschirmt / deshalb rächt gsagt wirt / er sye Gottes kriegsmann. Darumb wäre im übel angstanden / weñ er yetz wider die so des volcks Gottes warend/ hette wölen vßzühen vnd sy erschlahen.

Nur alles
Kriegem ist
vnrächt

Krieg füren ist an im selbs nit vnrächt / so feer das einer Gottes krieg füre/ vff Gottes eer vnd den wolstand sines vatterlands sähe. Es sind billiche vnd vnbilliche krieg. Wenn ein fürst vnnnd Herr niemand kein leid thüt/ sich wol halter/ ein ander aber wil im vß begird züherrschen/ oder anderē vnbegründten vrsachen sin land mit gwoalt nemen/ im an sinem alten härkommen / fryheiten vnd grächtigkeiten abbruch thun / da mag er ja ist desse schuldig/ vnnnd sol/ sin land vnnnd lüt mit der hand schirmen/ diewyl sonst nichts hilfft. Es söllend ouch sine vnderthonē in sölichem faal trüwlich zü im setzen / im trostlich zü zühen/ vnnnd sähen/ daß sy vorhin mit harnest vnnnd gweert

Sie sibendt Predig. 49

gweer gfasst syend /c. Ein vnbillicher krieg ist / da einer wol möchte rüwig syn / aber er vn derstadt vnbilliche ding / mit gwalt zübehaupten / er wil ander lüten das jren wider rächt nemen / oder die sinen selbs zü bösen sachen nötigen : da sol man einem sölchen zü sinem bösen fürnemen keins wägs beholffen syn / sonst wäre einer nit ein kriegsman Gottes. Wenn einer allein daruffsicht / das er etwas überkömme / vnnnd nichts darnach fragt / der habe rächt oder vnächt dem er zü zücht / so kan er ouch nit Gottes kriegsman gnennt werden. Yetz wil ich von denē nichts sagen / die wider jrer fürsten vnnnd herren schwäre verbott / vnnnd jr eigne gewüßne denen zü zühend / die waaren glouben veruolgend / vnnnd sich zü bösen sachen bruchen lassend.

Vnnnd kein böses ist an dir funden alle tag. Du hast dich allwägen eerlich vnnnd wol gehalten / man hat nie von dir ghört / das du in schwäzre laster gefallen / welches ouch frommen lüten / sonderlich in der jugent / etwan bschicht / darumb solt sähen / das du din güten eerlichen namen behaltest / vnnnd nit yetz vnschuldig blüt vergiessist / vnnnd dich besleckist. Wenn einer allwägen ein güte lob gehebt / sol er sähen das ers behalte / dann ein güter nam spricht Solomon / ist besser dann silber vnnnd gold. Nit das einer darumb so er gefallen / fürfaren sölle / sonder der selb sol gedencken /

Von dem Nabal

Du wilt widerumb ein guten namen übero
fomen vnnnd hinder dir lassen / Bin ich glych
ein sündler gsyn / so wil ich ein rüwer ouch
syn. Der böß syend wölte vns gern / für das
er vns ein mal in sal gebracht / überredē / das
wir yemerdar one büß vnnnd besserung fürs
fürend / aber wir söllend vns von vnsern sün
den zü Gott befeeren.

Myter sagt sy / es habe sich einer wider in
erhebt / der in veruolge / vnd im vff sin lyb vñ
läben stelle / aber er werde im nichts mögen
schaden. Sy redt vom Saul der heimlich vñ
offentlich vff in trang / vnnnd in on alle rächts
mässige vsach / wolt töden. Vuch oft wider
in als ein abgesagten syend des küngrichs /
mit starcker macht vßgezogen was. Sy tröst
in aber / er werde nichts wider in mögen vß
richten / Gott werde in schirmen vnd erhal
ten wider allen vffsatz seiner syenden / vnnnd
sprichts mit figürlichen Worten vß / Sin seel
sye im Bündtelin des läbens yngebunden / by
dem Herren sinem Gott. Wenn einer etwas
hat / das er nit gern verlieren wölte / so bindt
er es an / oder züsamen. Wenn einer gält hat /
so macht er es yn / vnnnd tregt es erwan am
lyb / oder hatt sunst gut sorg / zü dem das im
lieb ist: Also haltet oder truckt Gott / spricht
sy / dich zü im / nempt in sinen Gott / desse
hilff vnnnd bystand er vorhin in grossen gfaa
ren oft erfahren hat. Gott haltet alle gläubig
gen

Wie Das
uids seel
im bündtel
lin des lä
bens ynge
bündel gsyn
sye.

Sie sibendt Predig. 50

gen zůsamen/verbind vñnd verstrickt in die
selben. Dañ er hat ein ewige pñndtuß oder
vereinigung mit dem Abrahamen vñ sinem
saamē gmacher. Da durch sinē saamē/nit al-
lein die verstandē werdend/ so lytlich von im
erbozen sind/ sonder alle die so iren glauben
vñnd vertruwen vff den setzend/ vff den in
Abraham gsetzt hat. Dann S. Paulus nendē
die gläubigen geistliche kunder Abrahe: Da-
rumb hat sich Gott ouch mit vns verbunden.
Demnach wirt dise verbindung / in der ges-
chrifft ouch durch die ee vñnd gmahelschafft
angebildet/ wie zwey menschen ein anderē
verbunden / vñnd als vil als ein lyb sind/ also
wil Gott vnser aller gipons vñ gmahel syn.
Er liebet sine gläubigen/vñnd sy in widerum.
Rom. 8. Wār wil vns scheiden von der liebe
Gottes? trübsal? od angst? oder veruolgūg?
oder hunger? oder blöße? oder gfaar? oder
schwärt? ic. Das aber Gott die sinen in groß
crütz vñnd lyden stecke/bschicht/ wie offterzelt
ist/ nit on sondere vrsach. Es ist ein zeichen
siner gnaden gegen den gläubigen / nit sine
nes grimen zorns.

Abigael sagt nicht schlächtlich / dine fyend
wirt Gott stürtzē / sonder die seel diner fyend-
den wirt geschlingget werdē vß dem Boden
der schlingen/wie einer ein stein in die schlin-
gen legt/vñnd den hinuß wirfft/das er ruffet/
also wirt Gott der Herr die gottlosen on alle

Von dem Nabal

arbeit umbkeere / ouch zů letst in abgrund der hellen werffen / da nichts dan hülen vnd zānflaffen syn wirt. Wie es aber dem Saul vnd anderen syende Davids ergangen / also wirt es allen syende der gläubigen / nach langem / wo sy sich nit änderend vnnnd besserend ouch ergon. Vnd ligt nit an dem / daß sy yetz iubilierend / vnd ein groß gspött mit gläubigen lüten trybend / Dann warlich es wirt sich die sach der tagen einist bekeeren / vnnnd inen das lachen thür werden. Der stein ligt etwan ein wyl in der schlingen / so bald aber der wil / der die schlingen hat / so fart er mit vngestümigkeit hinweg / vnnnd ist da kein blyben mer. Proverb. am 10. stadt / Die gottlosen werdeē wie ein windsbrut dahin faren / 2c.

Ferner sagt sy / wenn der Herr alles das güt an im werde erfüllen / das er im verheissen / vnnnd gebieten / das er seines volcks fürer sye / so werde er nit ein vnruwig hertz von deßwägen haben / das er vnschuldig blüt vergossen / vnd sich selber gerochen hab. Dā es wäre im sin läbenlang nit ab sinem hertzen kōmen / wenn er in einem gāhen zorn schuldigs vnnnd vnschuldigs mit ein anderen erwürgt hette. Es wäre im ein anstoß gsyn / Als wenn einem ein stein oder anders im wāg ligt / daran er sich stoßt vnd darüber erfalt. Vil die in irer jūgend allein vmb gälts willen frieger habend / werdend in irem alter
von

Sie sibendt Predig.

51

irer gewüßne anlagt/ daß sy weder rast noch
rüh habend / sonderlich aber beschicht söm-
lichs / wenn sy in jr todtbeth komend. Was
herrlichen dings ist es aber / wenn einer im
selbs wol bewußt ist: was grosser erschroken ^{Ein böse}
licher plag dargägen / wenn in sin hertz ye- ^{gewüßne}
merdar anlagt: Wenn es im wäder tag noch
nacht kein frid noch fröud nicht laßt: Stond
zwen vnd redend mit ein anderen / so bforget
der so vff sich selbs etwas böses weißt / man
sage von im. Er darff einen biderman schier
nit frölich ansähen. Was grossen dings es
mit der gewüßne sye / sieht man by den übel-
thäteren: Die mörder könnend mer teils alle
mord mit iren vmbständen erzellen / die sy ge-
thon habend. Die dieben vergäffend der an-
griffen nit lychtlich / die sy gethon / ob iren
gleich vil sind. Ob aber gleich by manchem
die gewüßne ein zyt lang schlaafft / so erwas-
chet sy doch zületst / vnd ist ein yemergnagen-
der wurm / pyngtet deß menschen hertz / wie
die Poeten von Promethei gyre fabulierend /
der im sin hertz bickt on vnderlaß. Darumb
wir vns billich vor sünden vnd lasterē hüten
sölend / vnd vnser gewüßne nit beschwären.

Zum letzten bittet Abigael / wenn der Herr
im / dem Dauiden / werde güts thun / so solle
oder werde er iren yngedencf syn. Wenn er an
die regierung kome / solle er sy diser erzeugte
gütthät lassen geniessen. Also bittet Joseph /

Von dem Nabal.

Gene. 40. Den schäncken dem er sin trouma
vßlegt/wenn er wider vom König begnadet
werde / so solle er sinen in gutem gedäncken/
welches er aber lang darnach thut.

Wie sich
ein eere
wyb gegen
irem mann
halten soll.

Dise schön vnd lieblich red der wysen vnd
verständigen frauwen Abigael/Begryfft vil-
faltige leerē/ nebend denē die wir vorhin zum
teil gehört/welche wir auch mit der hilff des
Herrē kurtz nach ein anderē hören wöllend.
Dann erstlich wirt vns in diser Abigael ein
exempel eines trüwē redlichē wybs furgstellt.
Ob sy glych nichts güts an irem ewirt hat/
sonder groß crütz vnd lyden / dan er was nit
nun grobs vnd vnuernünfftigs dings/sond-
er auch gottloß/vñ yemerdar voll / noch so thut
sy das iren mit trüwen/sy legt sich von siner
wägen yn/daß sy in bym läben erhalte. Man
hette manche synden/ derē wäre nichts lieber
gsyn/ dan das man in hette zu tod geschlagē/
sy hette radt vnd that dar zu gethon/ damit sy
sinen mit sügen wäre abkommen. Hette allein
gebätten das er iren vñnd den diensten hette
verschonet/ aber sy schrybt ires manns unßradt
iren selbs zu/ dz sy im dester ehe gnad erwer-
be: also sollend die wyber nach/wenn sy glych
nit alles von iren mannen habend/daß sy gern
wöltēd/thun/nit bald ein vnwillē an sy wer-
fen/sy verflagen/od vnderston heimlich vmb
zübringen/sonder die sach Gott beuelhen/vñ
in der gedult vff sin gnädige erlösung war-
ten/gedencken Gott wirdt dir nit mer vßle-

gen dann du tragen magst.

Demnach so wir od die vnseren / anderlüt ^{Wie einer} mit Worten od werckē Beleidiget habend / wie ^{sich halten} Nabal hie den Dauiden vn sine gesandte Bot ^{soll der ein} den / so sollend wir nit fräuenlich darfür long ^{anderen be} nen / sond vnserē fäler Bekēnen / die selbē auch ^{leidiget hat} nit wöllen vernichtē: Wir sollend der gnadē Begären / anzeigē es müsse für ohin nit mer Be schähen / was Beschähen das sye vns leid / zc. wie hie die Abigael thüt. Dan also leert vns auch vnser Herz Jesus / Wen einer ein opffer ^{Matth. 5.} vff dem altar habe / vnd es falle jm yn / das er etwas spans mit sinē Brüder habe / so solle er das opffer ligen lassen / vn sich vorhin mit jm versünen. Gott hat an rechter liebe vn einigheit ein groß wolgefallen. Sonderlich aber sollend wir gegen Gott vnserer sünden Bekandlich syn in vnseren hertzen.

Myter lernend wir by der Abigael exem ^{Zornig lüt} pel / das wir zornig lüt / die sich selbs zu rächē ^{vnd ander} vnderstond / sollind hinder sich halten / nit zu ^{sollend wie} schlagen / vn sy noch arbeitfälliger machē. Wir ^{hindersich} sollend auch andere die im sinn habend / oder ^{halten.} jnen fürnemend etwas böses zusagen od zuthun / hinder sich zühen. Itē die so sich yetz in böse sachen begäben habend / als die sich hind die trunckenheit / hinder den wücher / hinder böse gesellschaft gelassen / die mit viloub / den hüren nachlouffend / vnd mit anderen bösen sachen vmbgond. Glicher gestalt sol man die



Von dem Nabal

so sich in irrige böse meinungen begäbend/
widerum vff den rächten wäg ires heils vn-
derstond zuführen. Dañ wenn vnsers syends
esel irs gadt/ so sind wir nach dem gsatz Got-
tes schuldig / in vff die rächt straff zütryben:
Wenn ein ochs oder esel in ein gruben falt/so
louffend wir zü/im zühelffen: wie vil mer sol-
lend wir radt vnd that darzū geben / das der
mensch nit in yrrthumen vnnnd lasteren zū-
grund gange.

Sagst dann glych/du habist kein ansähen
by denē/die du hinder sich halten soltest/oder
syest jnen nit angnem / so gedencf das Abi-
gael ouch nit wüssen mocht / wie angnem sy-
syn/oder was sy bym Dauidē schaffen wur-
de/der nit nun dem Nabal / sonder den sinen
liberal getrudwt hat. Es beschicht mertheils
das keiner dē anderen ynredē wil/grad ouch
die aller nächsten/einer schürgtz vff den an-
deren/aber was beschicht? Gott strafft dann
als mit ein anderen / welches nit beschehe/
wenn wir ein anderen strieffind.

Was vns
von sündē
abschreckē
sölle.

Welchs aber die fürnämsten stuck syend/
so man einem fürhalten/vnnnd die sonst einen
frommen menschen bewegen söllend das er
zorn nyd vnd haß fallen lasse / vnnnd sich selbs
nit räche an denen so in beleidiget / verstond
wir ouch zum teil vß der red diser Abigael.
Gedencf was der so wider dich geredt oder
gehandlet / für ein person sye / ist er alt / so
schon

Sie sybendr Predig. 53

schon sinem alter/ist er jung so gedencck/wyßheit kompt nit vor jaren/ er weyß nit was er gethon /oder wo hin das langt/das er wider dich geredt. Du wirst allweg an siner person etwas sünden/dz dich hinder sich halten mag. Als das er vnser nächster/vnser Brüder/vnd mit dem blüt Christi erlößt ist. Gedencck ouch wer du syest/ein Christ / ein dapfer eerlicher man/ıc. Item das niemand in Gotts gricht sol gryffen/ der das vnrecht zü siner zyt wol straaffen wirt/das einer der sinen anfechtungen nachgadt/kein glück von Gott hat/das er sin gwüßne übel beschwert. Hienäbēd söl lēd wir ouch andere ding gedencckē/die vns reitzen vnd bewegen mögend / schand vnd laster zü myden: als wz wir im h. Touff Gott verheissen/was grosser ergernuß wir gāben wurdend/ wenn wir vns nit recht hieltend/das wir Gotts gnad vnd sine gaaben wurdend verlieren / vns in zytliche vnd eewige straaffen wāten/ıc.

Insonderheit aber verstond wir vß diser red/wz schwerer grosser sünd sye vnschuldig blüt vergiessen. Dann Abigael kan nitt gnüg sagen/wie übel David handlē wurde/wēn er den Nabal sampt sinem hußgsind erschlüge. Da aber Nabal dem Dauiden/der als vil als künig über Israhel wz/übel zü gredt hat. Demnach ein vnützer böser mensch wz. Wie sündend dann die so übel wider Gott/

Vnschuldig blüt vergiessen ist ein schwere sünd.

Von dem Tödel

Die allein vß nyd/haß/oder vmb deß schndde
gälts willen/wider jr oberkeit ernstlich ver-
bott/zü reyß louffend/from gläubig lüt hel-
fend zü tod schlachen/ die jnen nie nichts zü
leid gethon / sonder jnen gern güts thün
weltind.

Sierwil aber das gemein ist in der wäle/
vnd zü einem gwerb vnd begangenschaffe
worden / das sich einer von einem frömden
herren/der in nichts angadt /laßt dingen vñ
im die lüt hulffe ztod schlachen / muß man vß
Gottes wort / etwas witer vom todschlag re-
den/das jochetlich sich selbs lernid erkennen.
Gen.am 9.cap. sagt ger Herr:Desse blüt d
menschen blüt vergiesset/sölle widerumb ver-
gossen werden/ namlich von einer ordenliche
oberkeit / oder Gott sücht das blüt in ander
wäg. In h.zähen gebotten sagt Gott vßtru-
fenlich/Du solt nie töden/verstand müttwillig
lich/eigens gwalts/vñ vß böser anfächtüg.
Exodi am 20. vnd 21. gebütet er/welcher einē
müttwillig vmbbringe/den sölle man vom al-
tar ryssen vnd in ouch töden. Vnd so einer ein
ochs oder stier habe/ der da skosse/vñ sin herr
über das er gwarnet ist/das er in verhüte/das
mit niemand kein schad beschähe/der ochs od
stier einen töde/so sölle man in versteinigen/
vnd ouch sinen herren oder meister töden/als
den der am todschlag schuldig was. Die h.
propheten schryend ouch häffrig wider den
todschlag

todschlag. Bym Isaiam am 1. cap. sagt Gott
 Er welle sin volck nit erhören/wenn sy gleich
 lang zü im ruffind vnud schryend/ Dann ire
 händ trüffind von vnschuldigen blüt. Gott
 sagt durch den h. propheten Ezech. am 31. Wo
 rumb er sin volck hab in gfencknuß führen las
 sen/vñ spricht/ Ich hab minē zorn über sy vß
 geschüttet/von des blüts wägen/ Das sy vff
 das erdterich vßgeschüttet habend/vñ dz selb
 mit iren bilderen besleckt. Prouer. am 6. cap.
 zelt er vnder die sächs oder sibem stuck die
 Gott hassen/ auch händ die vnschuldigen blüt
 vergiessend. Dann nit alles blüt vergiessen
 zü schälten ist.

Es ist nit einerley blüt vergiessens oder
 todschlags. Es ist einer der wider vnseren
 willen/ oder vngfert beschicht/ ja vßerthalb/
 Dann so vil Gott antrifft/ so beschicht nichts
 on sin vorordnung. Im gsatz gibt d' herr ein
 söllich exempel/ Zween gond mit einander
 in ein wald/ Der ein wil holtz houwen/vñnd
 die ax entgat im/ oder schlupft ab dem halm/
 vñ trifft den anderen/dz er sterben muß/das
 ist on gferd beschähē. So vil sy beed antrifft/
 aber Gott hat den streich gericht. In einem
 söllchen fal/solt einer in die fryheit louffē/
 Der d' Herr 6. im lād Israels geordnet hat/ da
 mit d' theter nit vß dē fründē des vnkommē
 in einer hitz entlybet wurde. Wenn er vnder
 dz thor kã/da die gerichtplätz domals gsin/

Todschlag
 der on ges
 ferd bes
 schicht.

Von dem Tlabal

so solt er den richteren erzellen wie es ergangen/vnd vmb die fryheit bätten. Sise soltend in schirmen wider gwalt. Hernach soltend sy in stellen an das ort / da der todschlag beschähen was/vnd die selben richter dorum lassen vrtailen/ob der todschlag on sin willen beschähen were oder nit/ vnnnd wenn sich desse vnschuld glich fand / so solt er widerumb in die fryheit gan/ vnnnd sich vß der selben statt nit lassen/sunst wo er über das von frunden wäre beträtten worden vnd getödt/so wäre das sin schuld gsyn. Er solt ouch nit widerumb in sin statt keeren / biß der oberist priester mit tod abgieng / so hoch hielt man den todschlag.

In denen todshlegen aber / die glich on eines wüssen vn willen beschähend/ ligt ouch vil an dē / ob einer ein ding hab müssen thun oder nit/item ob er gut sorg gehept oder nit. Ein Apoteccker legt nebend einanderen in einem hüßle/ein artzny / in einem anderē giffte: Hernach verwechslet ers vnd gibt dem der die artzny wil/ das giffte dem anderen/der razen oder müß töden wil/ die artzny/der yßt das giffte vnd stirbt. Ob glich wol das nit mit gferden vom apoteccker beschähen/ vnnnd im leid ist/das es also ergangen/ so ist er dorum nit entschuldiget/ dan er solt besser sorg zum giffte ghept haben. Ein weidman schüßt nach einem gwild/oder vogel/ vnd trifft ein menschen

Sie sibendt Predig. 55

ſchen/Geſchicht es in einem näbel/ ſo iſt es de
ſter ſchwärer / Dañ einer nit wüſſen mag wär
hin vnd wider wandlet. Einer rolet ein ſtein
ein halden ab/ vnd trifft ein menſchen/ das
er ſtirbt / wider ſinen willen / diewyl er aber
das nit hett müſſen thun / ſonder ein müts
willen an im gſyn/ ſo iſt ſin fäler deſter größe
ſer. Noch ſchwärer iſt das / wenn einer ein
ding thut/ das an im ſelbs vnrecht iſt/ vnd
dardurch einen anderen/ doch nit mit willen/
vmbbringt/ als da eine einem etwas züſſen
gibt das er jren hold werde vnd nachlouffe/
es fällt/ vnd tödt in: oder einer bringt einen
in einer vollen wyß vmb/ vnd ſicht in für ei
nen anderen an / oder meint er habe ein thier
vmbgebracht. Dañ die ding ſind an im ſelbs
vnrecht vnd verboten/ einem etwas der ge
ſtalt züſſen gäben/ oder ſich füllen das einer
nit mer weiſt was er thut. Sahar Pittacus
ein wyſer Heyd/ wenn ſich einer verantwo
ret/ er hette es in einer wynſüchte gethon/ o
der es wäre ein güter trunck darby gſyn / in
erſtlich vmb ſin trunckenheit/ demnach vmb
das ſtrieff/ das er vß trunckenheit wider die
gſatz gehandelt hat.

Demnach iſt ein ander geſchlächt deß tod
ſchlags/ da ein Oberkeit one anfächtung die
tödt/ ſo den tod mit jren übelthaaten verſchul
det habend/ oder in einē rächtmäßigen krieg
jre vnderthonen Bewapnen/ das ſy in jrem

Die Ober
keit mag
töden.

Von dem Tabal

namē/wider ire fiend strytrind/ vnd die selbē
vmbbringind/ire fryheiten/grächtigkeiten vñ
altloblich hartomen zū schirmen.

Noortweert

Hie hat hōit ouch die notweert/da einer
einer oberkeit schirm nit anrūffen oder er war
ten k̄a vñ mag/sonder er erweert sich lybs vñ
lābens/in dem geschicht erwan/ das einer dē
anderen/aber nit mit willen vmbbringt. Dañ
bschehe es mit willen vnd vß raachgirige/da
der sonst möchte von im kōmen/so ist er vor
Gott nitentschuldiget.

Wie die
heiden vñ
todschlag
geurteilt.

Wie ein schwer ding es vñ dē todschlag sye
indgend wir ouch vß volgender history ver-
stan. Theodoritus schrybt im 5. Būch der alten
Chrustenlichen kirchen/wie des fromē keisers
Theodosij k̄amer durch langwirige krieg er-
schöpft worden/habe er sinen vnderthonē ne-
bend andē ein nūwe schatzung vßgelegt. Da
syend die von Antiochia gar vnwillig gsyn/
habind der keiseren Placille cerine bildnung
die vß dem merck stünd nidergeworffen vnd
durch die statt gezogen. Als nun der keiser
sōmlich vernomen/sye er ergrimmet/habe si-
ne botten gen Antiochiam abgefertiget dz sy
inen verkünden soltend wie er alle die/so zū
diser vfrürigen handlung rath vnd that gā-
ben/an lyb vnd lāben straffen welte. In dē
sye einer in die statt kōmen der im gebirg ein-
ruch streng lāben fūrt/ aber weder schryben
nach lāsen kondt/ der habe den einen bottē by
sinem

Die sybendt Predig. 56

sinem mantel ergriffen/vnnd in gheissen ab-
stan. Der Gott habe anfangs sinen gelacht/
dañ er kein ansähen hat/ als er aber verstünd
das er ein fromer heliger mensch were/ stünd
er/vnd der ander Gott schnell von pfärden ab/
do sagt er zū jnen / Lieben fründen / zeigend
vnserem herren an/er sye nit nun Feiser/ sond
ouch ein mensch vnd das er die menschen die
Gottes bildnuß sind / nit vertilgge/dann
sunst wurde er Gott übel erzürnen. Er d Fei-
ser/zürne doch von eines eerinē Bilds wägē/
es sye aber ein grosser vnderscheid zwüscher
einē Bild dz wed läbē nach vernunft habe vn
einē dz die ding habe. Man köñne ande eerine
Bild machē/ er aber köñne einem dz läben nit
wider gäbē/ja nit ein herli erschaffen/2c. Dis
zeigtend die Gottē dē Feiser an / by dem es vil
bracht. Es habend ouch die heidē erkenen köñ-
nen/wie vß d history des prophete Jone zū
sähen: die schiffliut woltend den Jonā nit in
dz wasser stürzē / da sy glych vß sinem selbs
mund hortend/dz von sinet wägen dz erschro-
ckenlich wätter yngfallē w3 / dardurch sy zū
grossen schaden komen/bforgtend nichtsdes-
sterweniger/sy wurdend sich verschulden/an-
dē vnschuldige blüt. Cicero schrybe in sinē 1.
Büch Officiorū Pompilius der Römisch hon-
ptmā habe im Persischen frieg/als er in Ma-
cedonia wid dē syend gelägē/ein legiō od re-
gimēt kriegslütē siner glägēheit nach genro-
lauber / vnd welchē ouch Catonis son gsyn/

Wie
schrodr eff
seye ein
mensch odo
den.

Von dem Tabal

Diser habe sich zu anderen Knächten geschlas-
gen. Dann diewyl er ein tyro ein junger vns-
farner kriegsmann (vnsere sagend ein hü-
ruß) was / so hette er gern gesehen / wie es
in kriegen zügienge: wie solches sin vatter
M. Cato ein alter eerlicher herr vernam/
schreib er dem hauptmann zu / so er sinen sun
über das er in geurloubet / in sinem heer dul-
den wölte / so solte er in von nütwe die kriegs
ordinantz lassen schwoeren. Dann diewyl er
in / wie ouch andere / deß ersten eyds erlassen /
so wölte im nit gebüren mit dem syend zü-
stryten. Er schreib ouch an sinen son ein ernst-
lichen brieff / er wäre Bericht worden / wie in
der herr Burgermeister sin hauptmann ge-
urloubet / darumb solle er lügen vnd geden-
cken / das er nichts thätlich wider den syend
anfabe / dann er sye desse nit befügt / Biß er
von nütwem in eyd gefasset werde.

Darumb sähind die wol für sich / so yemers
dar mit anderlütten im hatz ligend / vnnnd on
not blütvergiessend / item die anderlüt wi-
der einandern verhetzend / vff krieg stiftend /
als sonderlich vil jar die yenigen gethon
habend / die insonderheit vff frid
vñ rüw soltend stellen / das
sy nit in grosse straf
fallind.

Von

Sie acht Predig.

57

Von des vertruncknen
Nabals läben vnd
tod/ze.

Die achtest Predig.

Wie David Gott den herren vñ ouch die
Abigael globt vñ jren die schencke abgenomē.

So sprach David zū Abigail: Ge
lobt sye der herr Gott Israels/ d̄ dich
hütt des tags mir entgegē gsant hat
vñ gelobt sye din geberd/ vnd gelobe
syest du/ d̄ du mit hütt erweert hast
d̄ ich nit wider blūt kōmen bin/ vnd
mich mit eigener hand errettet hab.
Waarlich so waar der Gott Israels
läbt/ der mich verhinderet hat d̄ ich
nit übel an dir thet/ werist du mir nit
ylentz begāgnet/ so wäre dem Nabal
vff disen morgen nit einer überbliben
der an die wand brünglet. Also nam
David vō jrer hand w̄z sy gebracht
hat / vnd sprach zū jr: Züch mit fri-
den hinuf in din huf. Siche ich hab
diner stim guolgt vñ din angficht an
genomē/ od̄ dich diner bitt gewärt.

B

Von dem Nabal

In diesen Worten wirt gemeldet/wie sich David gehalten / als Abigael mit ihm fründlich geredt/ vnd im diese schencke überantwortet hat/da fürnämlich zwey Ding werdend angezeigt. Zum ersten das er Gott vñ ouch sy gelobt/ das sy daruor gsyn/ damit er das groß übel nit begienge/ das er im hat für genommen/ demnach wie er jren die gaab abgenommen/vnd sy habe im friden heissen heim zühen.

Gott Israels.

Erstlich lobt David den Gott Israels/ vñ dancket im das er in behütet hat / 2c. Er nennt Gott in verlässnen Worten zum andern maal de Gott Israels/ nit dz er anderer völkere Gott nit ouch sye. Er ist ein Gott der Juden vnd der Heiden / ja aller völkere/ aber darum nennt er in also / das er sich dem volck Israels insonderheit vff vil wyß vnd wäg fürgstelt vnd geoffenbaret hat/ sy vß allen anderen völkere zu sinem eigenthumb angenommen/ ein pündnuß mit inen gemacht / den Messiam verheissen/ sin gsagte gäben/ 2c. Den Gott lobt er/ dz er im die Abigael habe gesandt/ er sagt nit / alles vnglück habe sy hinzü getragen. Er hatts nit darfür dz sy on gferd zü im komen sye.

Demnach lobt er die geberd Abigael/ gustu
(Hebraica vox significat omne illud ex quo quodammodo gustus de homine capitur) das ist/ jr red/wyß vnd geberden / vnd sy liberal/ darumb

Sie acht Predig.

58

rumb dz sy gweert hab/ dz er nit vnschuldig
Blut vergusse/ vnd sich mit seiner hand nit vns-
derstunde zu rache. Er schweert ouch so waar
Gott läbe/ dz in verhinderet/ weñ Abigael nit
angentz zur sach gethan/ vnd zu im komen/
so hette er wed sy nach yemandts and's/ ouch
ein armen hund nit lassen überblyben.

Dauid hat sy nit mit vnwirsche von im
gestossen/ wie vil im Bruch habed/ die niemand
zu red oder verantwörung wellend komen
lassen. Er ist iren ouch nit in die red gefallen/
wie zornig vnd vngstüm lüt thünd/ sond hat
gwartet/ bis sy vscredt. Vnd also sollend wir
ouch thün/ sollend anderlüt reden lassen/ vnd
weñ sy fertig sind / woz vns dan anlagen ist
ouch darthün vnd erzellen. Der Wyß Solo.
sagt im 29. cap. in wysen sprüchē/ hast gesähē
ein schnallen oder gehen menschen in sinen
wortē od sachē? Es ist ein grössere hoffnung
von einem narren zu haben/ dan von disem.
Das ist die meinung/ weñ einer zgech ist sich
sin mund überylen laßt/ oder sunst mit sinen
sachen strütet / so ist sich nit vil güts gegen
im zuersechen / weñ ein thor sömlichs thüt/
so kan man ims den Beste wäg vslegen/ man
sagt/ er ist nit wiser gsyn/ er hat den sachē nit
witer nachtrachtet/ diser aber bungt sich vnd
die sinen oft in groß lyden. Demnach langz-
net er sy nit/ ob er glich sieht das er vnrechē
gethon hette/ wo sy nit gsyn wäre.

Wir sol-
lend nit
gäch sy.

H ij

Von dem Nabal

Amnō ließ
sich mit ab
reden.

Dauid thut nit wie die so jr Böß fürnemen mit gwalt wöllend bhaupten. Ein exempel habend wir 1. Sam. 13. cap. vom Amnon Dauids son/Do er an sin schwöster Thamar fiel/vñ sy zu sinem schantlichen willen n dringen wolt/redt sy ernstlich mit jm/ Dz er seines Bösen fürnemmens abstünde/ vñ sagt: Min Brüd gschänd mich nit. 1. Wen anderlüt mir leid wöltend thun so soletst du mich schirmen vñ min eer Bewaren. Es wäre wider die natur/wen du selbs der vneeren mit mir pflägen weltist. 2. Also thut man nit in Israel. Gott hat vß allen anderē völkere/ Dz volck Israel jm selbs vserkoren vñ sich jm geoffenbaret Das es jm in heligkeit vñ vnschuld diene. Er hat ein schwere straaff druff gsetzt/wen einer ein tochter verfellt/ 20. Exodi 22. Deut. 22 Vff die blutschand hat er gsetzt die straaff lybs vnd läbens. Leuit. 20. cap. 3. Thut nit ein solche thoreit od schalckheit. Gedenk w3 grosser schwerer sünd das wäre wen du din eigne schwöster soltest beschlaaffen/ ich gschwige begwaltigen. 4. Wo wil ich mit meiner schand hin/ich müste min läbenlang ver schmecht vñ ein finger zeig sin/nemäd recht gschaffner wurd nach mir stellē. Wir sagtind der Rhyn wurde es mir nit abwäschē. 5. Du wirst syn wie einer der thoren oder schelcken in Isreal. Du wurdist din guten namen din eer vnd ansähen By mencklichem verlieren.

Da

Sie achtet Predig.

59

Da du des nächstē tags/als d̄ erst geborē an
des vatters statt/an die regierung soltest kö-
men/so wurde dich yederman hassen vnd ver-
achten/vnd vnder ander heiloß lüt zellen. 16.
Lieber red mit dem künig / der wirt mich dir
nie versage n. Villicht hat sy vermeint der vat-
ter/diewil er künig sye/habe gwalt zū dispen-
sieren / wie vff den hütigen tag die Päpst
thünd/so hohe personen/ die ein anderen nit
haben möchtend/zusamē gäbend/one grund
der h. Göttlichen gschrifft/ıc. Oder/sy hat d̄
gsagt / allein das sy von jm kämme.

Dise argument od̄ gründ/hettend by einem
Gottsföchtigen vñ vernünfftigen mensche
vil bracht/ aber diser Amnon/volget keinen
gründen/sonder dem yngäben des vnreinen
geists / vnnnd sinen bösen anfächtungen/für
für vnd notzoget sy.

Wie vil findt man deren lüten nach vff dē
hütigen tag/die mit gwalt fürfarend/wider
ire eigne gwüßne vnd alle trüwe warnungē
so sy inen etwas böses fürgenommen habend?
Soltend sy vmb eines wybs red etwas gäbē
wie hie der künig David/vnd sich lassen ab-
wendig machen/so hettend sy es für ein gros-
se schand. Wen̄ glych die prediger mit allem
ernst vnd güten gründen an sy stond/so wel-
lend sy es nit für güt haben / nach sich wysen
lassen/ja da sy sich sunst wol als bald ließind
schliffen/so wurdend s̄s erst nit thun/ wenn

H ij

Von dem Nabal

Die selben darzü redtind . Sy meinēd sy syēd standhafft vñ dapper / weñ sy mit iren bösen sachen für farend. Dz aber ist nit ein standhafte vñ dapperkeit sonder ein böser Kyb vñ hartnefigkeit. In guten sachen sich nit lassen abwysen/ist loblich. Dz ist ein dapperkeit/ weñ einer sich selbs kan im zaum halten. Prou. 16. sagt d wyß man/ Der sinē geist baschet/ dz ist/sine bösen ansechtungen / d ist herrlicher dan d ein statt eroberet. Welches ouch die beiden kōnend erkennen / wie mit iren gschriftē bewyßlich ist. Vil wenn sy groblich gfelt/so wellend sy jr sünd nit bekennen/ sonder verkleinerend ja schirmēd die selb als ob sy rächte vñ wol ghandlet habind/vnnd wirt aber die sünd nit verzigē / weñ wir sy nit bekēnend.

Ob David
mit sye gfa-
llen gsyn?

Warum fragst/dancket David Gott dem Herrē/dz er in vor dem fal verhütet habe/vñ ist aber gfallen gsyn? Dan wz er nit ein todt schleger in sinē hertze/sicht nit Gott dz hertz an? hat er nit den willen schon dryn gāben? Antwort/Es ist wol waar/es sagt S. Ioan. welcher sinē Brüd hatte/sye ein todtschleger/so vil meer weñ einer keiner anderē meinung vßgadt/dan dz er in töden wil. Also sagt vnser herr Jesus Matth. am 5. cap. welcher sinen nächsten wyb ansāhe / iren in sinem hertzen zū begāren/d sye vor Gott ein eebrächer. Also welcher sinen nächstē begärt vnzebrin gē/ist vor Gott ein todtschleger: doch so ist ein grosser vndercheid zwüscher denen sünden

Die etner im sijn hat/vnd denen die er mit der that volbringt. Es ist einer vor Gott nit entschuldiget / welcher seines nächstten wybs Besgärt/wen er aber jren nachstelet/Brieff od Boten an sy schickt mit güte wortē/gaabē od in anderwäg/dahin vnd stadt zübewegen/dz sy jm in Bösem z willē werde/vñ so sy dz selb gethon/nit vshört / so ist sin sünd dester schwächer. Ein gliche rächnung hat es mit dem todschlag vnd anderen sünden ouch.

Wir sähēd hie dz Gott oft dē mensche dorvor ist/dz sy dz Böß nit volzüchēd/wie sy inē fürgenomen / brucht darzū erwan vsserliche mittel/hie brucht er eines wybs vernünffige red/etwā andere ding. Gen. am 31. cap. wolt Laban sinem tochterman Jacob nachylen/d heimlich mit sinen wyberen vñ künden hab vñ güte/hinwäg zogen w3/vñ jm vil verwyssen/aber Gott warnet in im schlaaff dz er nichts vnfründelichs mit im fürneme /ic. Wie vns Gott gnad gibt / dz wir das güte volbringen mögend/also gibt er vns ouch gnad/das wir vns vor dē Bösen mögind hüten. Sunst wäre es mit vns verlorē. Dañ vß eignē krefften vermögend wir nichts güts zügedenckē/ich gschwigen zethün/so übel sind wir durch die erbsünd verderbt. Es ist kein laster so groß nit / das wir nit dörsünd thun / wenn vns Gott nit darvor behütet. David bekennet hie heyter / Gott sye darvor gesyn / das er nit in das mord gefallen. Darumb so ouch

Gott war
net vns
vor dē fal.

Von dem Tabal

wir gwendt werdend / Das wir vom Bösen
fürnehmen abstonnd / so söllend wir wüssen/
Das es Gottes werck vñ gütthaat ist/ söllend
im deghalb ouch/ wie David/ darumb lob vñ
Dancck sagen / vñnd in Bitten/ Das er vñs vñd
anderlüt für vñnd für vor schand vñd laster
gnädigklich wölle Bewaren.

Was ein
fründliche
red bring.

Demnach so lobet er ouch die Abigael/
Durch die Gott/ als durch sin werckzüg/ ge-
handlet hat / welches wir ouch thun söllend/
so vns Gott durch ein eersame Oberkeit/
vnserer elteren / güte fründ vñd nachpuren/
vnserer wyber oder andere warnen laßt / sy
darumb loben / nit mit jnen Balgen / was
sy diß oder yenes angange/ was sy darnach
fragind womitt wir ombgangind/ wir wer-
dind darumb müssen antwort gäben/ &c.

Zu dem sähend wir ouch/ was ein fründ-
liche red by rächtgeschaffnen lüten vermöge.
Abigael redt den Dauiden an/ haltet im gü-
te gründ für/ dadurch laßt er sich von stunde
an gewinnen / stadt von sinem Bösen vorha-
ben ab. Solomon sagt Prouerb. am 15. Cap.
Ein linde antwort / wendt den grimmigen
zorn ab/ vñd ein wort deß schmerzgens/ erwe-
cket den zorn. Wir sagend/ Ein gut wort/ fin-
det ein güte statt. Darnach am 25. sagt er/ ein
weiche zungen bräche die Bein/ Das ist/ wenn
man einem mit fründlichen Worten begägne/
lasse er vom zorn ab / grad häßtig lüt ergä-
bend

Sie acht Predig. 61

bend sich. Ein Byspil hast Jud. am 8. Cap. Da die Ephraimiter die gar häfftig vnd hitzig warend / mit scharpffen Worten an Gedeon kamend / vnd im verweisend / warumb er sy nit hette lassen wüssen / das er mit den Madianitern wölte stryten / sy wöltnid ouch ir Best gethon haben / da stiller er sy mit sanfft mütigen vnd fründtlichen Worten. Glicher gestalt handelt ouch der Jephthe. In geschichten der heiligen Botten am 19. Cap. läsend wir / wie ein grosser vflouff zu Epheso worden / vnd einer wider den anderen geschriewen / das schier niemandt sin eigen Wort hören mocht / in dem sye ein schryber an die vnrüwig Gemeind kōmen / vnd habe fründtlich zu n sachen gredt vnd gsprochen / Wie gstellend jr üch ? es ist doch niemant wider Dianam die Göttin der Ephesiern / &c. vnd habe so vil zu wāgen bracht / das die vfrür sye gestillet worden. Wie noch zu n zytē in den vfrürigen Gemeinden beschicht / wenn lüt die ein groß ansāhen habend / fründtlich mit inen redend.

Dargegen mag man mit vnfründtlichen scharpffen reden vil böses schaffen. Nabal hat mit sinen bösen Worten / Dauiden vnd sine Kriegslüt gar erzürnt. Der Rechabeam machet mit siner ruhen antwort / das die zāhen stammen vom huß Dauids absielend / vnd niemer mer mochtend zūhin bracht werden.

H v

Von dem Nabal

Bette er sinen alten rädten geuolget/ vnnnd fründtlich sich alles güten gegen den sinen entbotten / so bettend sy kein anderen zum König vfgeworffen/rc.

Wir söllt
vns wöfen
lassen/wen
wir vns
rächt das
gan sind.

Wir habend ouch ein leer / Das weñ vns Gott züerkennen gibt / Das wir vnträcht daran sind/wir dasselbig bekennen söllind/vnd vns fründtlich wöfen lassen/wie David hie/vnd nit in bösen sachen fürfaren/vnd mit gewalt wöllen rächt haben. Dann das ist gläubiger lüten art / daß sy wychend / wie David hernach ouch thet/da er vom propheten Natan umb sin ebruch vnnnd mord gestraafft ward. Also thet der Apostel Thomas/da er sach / daß Christus warlich von todten vferstanden was. Also Petrus zün Galat. 2. Da in Paulus strieff/das er by den Heiden gesssen / mit inen geässen vnnnd getruncken hat/ daran er rächt gethon/wie aber ertlich Juden darzün kamend / verschleickt er sich / thet derglychen als ob er niemen da gsyn wäre/ vnnnd verergert dardurch die gläubigen von Heiden. Er hat die straaff nit übel vergüt/ sagt nit/ich weiß selbs was rächt oder vnträcht ist/was ich thun oder lassen sol/ ich hab geprediget vnnnd zeichen gethon/da du noch ein verfolger der kirchen gsyn bist/ vnd Stephanus hast helffen töden/rc. Die vngläubigen aber wöllend nit gfelt habend/da sy glych jr eigen hertz anklagt/vnnnd überzüget/ so wöllend sy
Dennoch

Sie acht Predig. 62

Dennoch nicht schuldig syn / ja sy schirmend
offne yrrthum vnd laster / ouch mit der hand /
vermeinend es wäre jnen nachtheilig vnd ver-
wyßlich / wenn sy bekennen söltind / sy wä-
rend lätz daran gsyn / vñ hettind in einē oder
im anderen gefelt. Da sy offt nicht loughen
könnend / sonder bekennen müßend / das gros-
ser feler by jnē sye / so wöllend sy nichts best-
minder by dem jren blyben / sagend ettwan sy
habind sich verredt / oder ein glübt gethon /
darumb wölle jnen nit gebüren / hinder sich
zü trätten / haltend deshalb wie S. Paulus
sagt / die waarheit in den luginen / werdend
ye länger ye verrüchter. Ja es ist jnen ouch
leid das sy etwan zü bösem anlaß ghebt / vnd
es nit gethon. Wünschend es wärind jnen et-
wan vil jar ab de halb / das sy so vil mer bü-
bery möchtend vollbringen. So feer ist / das
sy Gott lobind / das er sy hinder sich ghalten /
damit sy das böß nit vollbrechtind.

Lern ouch / wie man vil böß sachen erwee-
ren möchte / wenn man ein ernst bruchte /
vnd den ruggen darhinder thete. Dann die
einig Abigael haltet den Davidē vñ sin gan-
zen heerzüg hinder sich / wie vngestüm vnd
zornig sy warē. Da wir böse ding abstellē /
od darvor syn soltend / das sy nit beschehind /
so sähend wir nun vff anderlüt / sagend / Ach
Gott was solich allein thun ? ich bin nit des
härkommens / bin nit so wol beredt / das ich

Wie man
sich vnlegē
sol böse sa-
chen züweg
hinderen.

Von dem Nabal

Daruo: syn Edne/thuyend es ander. Item die sach ist nit zuerheben. Wenn wir nit treg wärind / so wäre vilen sachen zuthun/ die trunckenheit / der wücher / das huren läben mit gunst zumelden/vnnd anders / wäre noch zu erweeren/ja wenn die ernst erzeigtind/die es billich thun soltend: Insondheit ein yede oberkeit:wenn sy aber selbs mit denen dingen beschafft sind/so gadt es niemen hin. Dife frouw wirt alle die richten/ die nit mit ernst den gemeinen vndergang weerend.

Man ist nit schuldig alle zusagug glübd vnd eyd zühaltten.

Wytter lernend wir/das man nit alle zusagungen/glübd vn eyd/ zu halten schuldig ist. Dauid hatt bym eyd vff sich gnommen/er woltte den Nabal vnd die sinen erschlahen / vnnd was yetz vff der fart/ das ers thun wolt/vnd so vil den Nabal antraff/so hette er die straaff wol verdient / er hat Dauiden der von Gott zum König gsalbet was / vff das höchst geschmächt / aber was vermochtend desse sin wyb/vnd sine armē dienst: es was im ersten antrit gfelt/ das er lychtuertig in einem zorn geschworen hat / da er nun eins Besseren berichtet wirt von einem wyb/da fart er nit für. Darumb weñ wir vß böser anfechtung oder vnbesüñt etwas geschworen hettind/ das wir nit one schwäre sünd leisten mōchtend/so sollend wir den selben eyd nit halten.

Aber zu besserem verstand dises artickels/ an dem vil glägen/müssend wir wüssen/ das zweyer

zweyerley zusagungen glübd vnnnd eyd sind. Etliche sind gut vnd rächt/ die selben sol man trüwlich halten. Als einer verheißt siner eesrouwen trüw vnnnd glouben zühaltten / deßglych das eewyb irem eeman / das söllend sy zü beyden teilen ein anderen leisten. Du verheißt einen vff zil vnnnd tag zübezalen / das thü. In einer schwären francckheit oder anderer gfaar/ thüst Gott ein glübt / so er dir widerumb vfhelffe oder dich erlöse / so wöllest flyssiger zur kirchen vnnnd Göttlichem wort kōmen dann vor/ wöllest andere die in schwärer francckheit ligend/ besüchen / dich vor vnmaßhütē/ ic. Das halt trüwlich. Du schwerst daß dinen herren vnnnd oberen wöllist ghorfam syn in gebürlichen sachen / vil habend über den gemeinen eyd / ire besondere eyd / das halt trüwlich wd du bym eyd verheißest. Vñ kōmpst dir glych übel / du kōmpst desselben zü grossen schaden / so gedencck daß du bym namen Gottes sömlichs verheissen/ vnd dies wyl du das on verlezüg diner gwüßne thün magst / so bist desselben schuldig vor Gott. Sordurch wirst du dem zorn Gottes nit entrüñen/ nach dich mögen entschuldigen/ wenn du sagst/ zwingen eyd sind Gott leid. Dann einer sol fürsich sähen / was er schweere oder zusage. Wenn einer dem der sin fyend/ vnnnd nit siner religiō ist/ etwas bym eyd verheißt/ sol er jm nichts dester weniger halten / wie

Von dem Nabal

ouch die Heiden daruon gredt. Gott strafft
durch den H. Ezechiel den König Zedechiā/
das er den eyd den er dem Nabuchodonosor
geschworen/nit gehalten/ sonder meineyd an
im worden ist. Hüt by tag schryet man/man
sölle keinem kätzer glauben halten. Desß ha-
bend wir ein exempel an König Ludwig in
Vngern d hat ein lydenlichen friden mit dem
Türggischen Keiser angenommen / als aber
durch anstifften des Cardinals Juliani Ce-
sarini / vom Papst gsendt / der selb Brochen
ward / ist er vnnnd sin kriegsuolck / ouch der
Cardinal Cesarinus selbs vom Türggen er-
schlagen.

Demnach beschicht / das wir vß thorbheit/
Blinder ansechtung od vnwüssenheit/ etwas
verheissend/globend oder schweerend / dann
so es einer wüssentlich vnd williglich thüt/
so ist er keins wägs züentschuldigen. Einer
verredt sich er wölle sin läbenlang sich seines
wybs nit mer beladen / verheißt aber (mit
gunst zümelden) siner hüren/ er wölle sy nit
lassen / es müsse sy beyde niemand scheiden/
dann der bitter tod. Das ist ein vngöttliche
verheißung/ vñ wo die ein anderen haltend/
werdend sy mit einanderen ewigklich ver-
dampt werde. Ein anderer verschweert sich/
er wölle in kein Euangelische predig gon/ er
wölle nichts in der heiligen Gschrifft läsen/
das Euangelium den tag den er läbe hassen/
das

Sie acht Predig. 64

Das ist ein vngbürlicher eyd. Der Dritte
schweert in einem zorn / er wölle dem ande-
ren den läbtag abstächen. Vil lassend sich ditz
gen / schwerend wider jr gewüßne / alle die so
der Luterischen oder Caluinischen religion
sind / wie sy nemmend / mit sühr vnnnd dem
schwärdt züuertilcken / wüßend aber daß sy
es nit thun soltend. Vil gond in die Clöster /
hoffend dardurch gnad züerlangen / vnd ire
sünd zübüssen / globend ghorzame / willige
armüt / vnd reinigkeite. Hernach verstond sy
erst / das mit dem Closter läben Gott nit ge-
dient wirdt / diemyl es nit von jm / sonder
von menschen erfunden vnnnd yngesetzt ist.
Sy sähend das / da sy ghorzame dem Ape
globend / sy sich vß der ghorzame Gottes /
jrer herren vnd oberen / ouch etwan jrer eltes-
ren zühind. Sy merckend das es mit der
willigen armüt nichts ist / sonder das man
der armüt zü entrünnen / in die Clöster / als
vil als in die fryheit loufft. Wie es dann ein
gestalt mit jrer reinigkeite habe / erfarend sy an
jnen selbs / vnd sehends an anderen.

In denen vnd derglychen fällen / sind wir
nit gebunden / sonst wäre der eyd ein band
deß yrrthums vnd der Bosheit. Da man as-
ber vß Gdlichem wort weißt / warum vnd
wozū er sol gebrecht werdē. Demnach wur-
dend wir sünd vß sünd huffen / wenn der
eyd vns zü denen dingen bunde / die wider

Von dem Tabal

Gott sind. Es ist an dem züuil/das wir vns
befindt thozlich oder fräuenlich geschworen
habend / wenn wir erst das böß darzü thun
wöltind / wie wurd das so übel ston? Es ist
wäger du lassist es by einer sünd blyben/
Dann daß du ye länger ye wyter hinder die
sprüng kömist. Die heiligen Väter Ambro-
sius/Augustinus/ vnd andere/ disputierend
von dem eydschwür Herodis/der vmb eines
üppigen tanzes willen der Herodias by
dem eyd verhieß/was sy nun Begärē wurde/
das müste jren werden/ouch vff den halben
teil sines künigrychs/ vnd da sy vß anstiffen
der alten huren/jrer müter/das haupt Joan-
nis des töuffers begärt/ ließ er jren das von
stundan bringen/verantwortet sich mit dem/
er hette es müssen thun/ dan er hette geschwo-
ren. Da sagend die heiligen Väter gemeins-
lich / er solte es nit gethon haben. Es wäre
weger gsyn / er hette es einfalt by dem lassen
blyben/das er lychtuertig geschworen/dann
das er über das zum mörder worden sye. S.
Peter sagt Joannis am 13. zü dem Herren/
In die ewigkeit wirst du mir die füß nit wä-
schen/er wirffts wyt / da er aber hört / das er
kein teil mit Christo haben werde/wenn er in
nit wäsche/so ergibt er sich. Vnd ob er glych
kein eyd gethon / hat er es sonst hoch vff sich
genommen. Also wenn wir eines besseren
Bericht werdend/so söllend wir nit im wider-
spil

spylligen / sonder das an die hand nemmen /
das Gott gefellig ist.

Dises alles wirdt nit darumb gemeldet /
das man die lüt wölle lychtuertig machen /
das sy jr eer vnd eyd ring achtind / sonder das
man den Bekümberten gwißninen zühilff
komme. Sonst leerend wir / das man rächtge
schaffne eyd eerlich vnnnd trüwlich mengflis
chem / ouch denen die nit vnfers gloubens /
ja vnseres syend sind / sölle halten. Es ist aber
zü erbarmen / das vil lüt also geardet sind /
das sy die eyd mit denen sy sich zü vngöttli
chen sachen verstrickt habend / vnderstond zü
halten / vnd aber den anderen / die sy zü halten
schuldig / so wenig nachfragend. Man sol
ouch die yenigen die jr vnbesinnte eyd vnnnd
glübd nit haltend / nit meineyd oder glübd
brüchig nemmen / sonder mitlyden mit jnen
haben / wie mit anderen / die grosse mißthaten
begangen habend / vnnnd aber widerumb vfr
stond / sich besserend / vnnnd rüw vnd leid über
jre sünd tragend:

Das ander stuck in disem text ist / wie Da
uid der Abigail ire gab abgenomen / sy habe
gheissen im friden heimgon / vnd gsagt / er ha
be ire gewillfaret in dem das sy an in begärt
habe / vnd sye mit jren wol züfriden. Er hat sy
nit vorhin geschendt / sonder mit eeren heim
geschickt / so hat er sy ouch nit gfangen hin

*Dauid
nimpt die
schäncke*

Von dem Nabal

weg geführt/ vnd dem Nabal entbotten das er sy mit grossem gut löse. Er ist auch nit den nächsten über den wyn/ den sy im geschencke hat/ glouffen / wie vil/ notwendige sachen liegen lassend/ vnnnd sich zum wyn setzend. Er hat auch sinen knechten/ wie hungerig sy waren/ nit gestattet/ das sy das brot vnd fleisch von stundan nemind vnd ässind/ sonder fercktet sy vorhin fründtlich ab/ vnnnd haltet gute ordnung im läger.

Dauid nimpt dise schencke / dann erliche schenckinen nemmen/ nit vnrecht ist/ als wenn sich einer verzert hat/ hungerig vñ mangelbar ist. Wenn aber einer yemandts ein schencke gibt / sy sye dann klein oder groß / das er im zürbösen sachen helffe/ als wenn ein tröler einem richtet/ oder ein argwöniger gsell / einer eeren tochter oder einem eeren wyb/ gaaben schiebend / so sol sich einer oder eine vorhin wol besinnen/ vnd sich vor solchen schädlichen vnd argwönigen gaaben hüten.

Einer genüßt etwã
sines wybs Dises wyb hat hiemit dem Nabal / iren selbsts / vnnnd den iren gemeinlich jr läben ge-
fristet. Wie aber diser Nabal sines frommen
erlichen wybs genossen/ also laßt Gott noch
etwan ein verrüchten mann/ sines frommen
wybs/ etwan das wyb des manns / sy beede
jrer finden geniessen / das nit schwäre vnfall
über sy komend. Das Gott der Herr Gott
lose

Sie acht Predig. 66

lose lüt duldet/vnd mit den nächstē irem vers
dienen nach umbkeert/da habend sy ouch den
gläubigen vmb zūdanken / wie wir sähen
mögend vß dem gespräch das der Herr mit
Abraham hielt / Genesis am achtzähenden
Capitel / ehe er Sodom vnd die überigen
stett verbrandt. Dann er ließ sich hören/wen
zähen fromb mann zū Sodom werind / so
wölte er mit fürgenoinner strääff nach nicht
fürfaren.

Dauid hat dem Nabal vff Abigael fürbite
verzigen. Darumb wenn vns einer Bittet
vmb verzyhung der vns beleidiget hat/
oder durch anderlüt bitten laßt/ so
söllend wir im bald vnd von
hertzen verzyhen vnd
vergäben.

Von dem Nabal
Von des vetruncnen
Nabals läben vnd
tod/zt.

Die mündt Predig.

Wie Abigaet irem Nabal erzelle haber
in was gfaar er gsyn. Wie er vnläng dar
mach gstorben sye/ vnd wie David Gott
gelobt habe.

So aber Abigael zum Nabal
kam / sihe da hat er ein mal in sinem
huß wie eines künigs mal / vnd sin
hertz was frölich in im. Vnd er was
gar trunckē. Sy aber sagt im nichts
weder kleins noch grosses / bis an den
morgen. So es aber tag was / vnd
Nabal den wyn vertouwt hat / sagt
im sin wyb dise wort oder sachen. So
er starb sin hertz in sinem lyb / das er
ward wie ein stein / vnd über zähen
tag schlug in der Herr das er starb.
So David hort das Nabal rodt
was / sprach er: Gelobt sye der Herr
der

Sie nündt Predig. 67

Der min schmach gerochen hat an dem Nabal/ vnd sinen Knächt erhalten hat vor dem übel/ vnd der Herr hat dem Nabal das übel vff sinen Kopff vergolten.

Wie Abigael mit guten gründen den Dauid gebähten vnd erbähten hab/ das er dem Nabal vnd den sinen verschonen wölle / ist in vorgenden Worten erklärt worden: yetz volget wie sich darzwischen Nabal gfüllt/ wie Abigael im mordes allen handel entdeckt / vnd er als er sömlichs ghört / erstunet / in wenig tagen darnach gestorben sye / Darumb Dauid Gott gelobt vnd gepusen.

Als Abigael widerumb heim kam zum Nabal/ da saß er im schlamm / was frölich vnd gar truncken. Es bekümbere in wenig/ das Dauid vff gsyn was/ mit den sinen / vnd in sampt sinem ganzen huß hat wöllen vmbungen. Dann er wußt von keinen dingen überal nichts. Er gedacht auch nit / das die stand siner tods so bald komen wurde. Das ist der gottlosen art/ weñ Gottes gericht inen vor der thür ist/ so sind sy am aller sorglosistē. Die Gotteslosen sind sorglos wenn sie verderben was h. c. 6.

Von dem Nabal

am 17. cap. züger/habēd geäffen/getruncken/
gemañet gewyber/vñ ein grossen wil getris
ben/Biß vff dē tag dā Noe in die Arck gieng/
vnd der sündfluß kam/vnnd sy allertrancēt.
Desselbē glychen gieng es zün zyten Loths/
sy assend/sy trunckend/kaufftend/verkaufft
tend/pflanzend/Buwrend/Biß Loth vß So
doma gieng/vnnd für vnnd schwäbel von
himmel fiel/vnd sy all verbrandt. Daß sy gar
sorgloß gsyn/sich selbs beredt habind/ir wä
sen wurde allwägen also beston/zeigt der
Herr mit denē reden an/sy wyberend/Buw
rend/2c. Dann wenn einer vermeint es sye
pestilentz/krieg/oder andere grosse gfaar vor
handen/so wil er nit wyben/eine wil nit man
nen/hat die schwären löuff zü wort/einer wil
kein eehaftē Buw thün/sonder laßt ein ding
fläben so lang es mag. Wen aber gute zyten
vorhanden sind/vnd man sich keiner bsonder
baren gfaar zübesorgen hat/so denckē man
denen dingen nach. Danielis am 5. cap. liest
vom König Balthassar/wie er ouch ein pan
cket oder köstlich malzyt sinen fürsten vnnd
houpelüten ließ zürüsten/vñ als er truncken
was/hieß er die guldinen vnnd silbernen ge
schirr/die sin großvatter zü Jerusalem vß
dem tempel hat genommen/in das mal bun
gen/rümpft sine Babylonischen Götter/ver
meint nit das möglich wäre/das die Meder
vñ Perser/sin statt Babylon(wen sy glych jar
vnd

Sie mündt Predig. 68

vnd tag daruo: legind) möchtind gewüñen/
 aber in sinem mal (das ohn zwoyffel ettlich
 tag an einanderen wirt gewärt haben) ward
 er erstochen/sampt den sinē. Luce am 12. cap.
 sagt der Herr von einem rychen mann vff
 desse völd es gar wol stünd / der trachtet by
 jm selbs / wie er sine frucht legen wölte (dañ
 er hat nit platz gnüg) ward züradt/ er wölte
 sine schüren / spycher oder Korn schüttinen er-
 wyteren/ vnd sine frucht züsamen legen/ vnd
 zü seiner seel sagen/Liebe seel du hast ein gros
 sen vorradt vff vil jar/iß/trinck/vnnd laß dir
 wol syn. Was sagt aber Gott? Du narr dise
 nacht wirt man din seel von dir fordern/ vñ
 weß wirt syn das du bereitet hast? Diser hat
 sin rächnung gmacht / er wölte noch vil jar
 hie vff erden syn/ vnd gut läben haben/vnnd
 starb der selben nacht. 1. Thess. 5. redt der H.
 Apostel von der zukunfft Christi / vnnd leert
 man solle sich allezyt vff die selbig rüsten/mit
 wachen vnd hätten. Dann wenn sy (die gott-
 losen) werdend sprächen: Es ist frid/es hatt
 kein gfaar / so wirdt das verderben sy schnell
 überfallen / glych wie der schmerzen deß
 schwangeren wybs / vnd sy werdend nit ente-
 fliehen. Das er von dem allgmeinen letzten
 tag sagt/ mag sonst von irem letzten tag oder
 zyt ires tods ouch verstanden werden.

Wohär kompt aber die sorglose vnd sicher
 heit? Vß verachtung Göttliche worts/sy mei



Von dem Nabal

nend Gott achte ires thuns vnd lassens nit/
oder er sye nit so rachsyrig als man von im
sage. Sonst ist ouch ein sicherheit/die vß waa
rem glouben entsprunget / da der mensch in
mitten der trübsalen / mit Gott wol züfriden
ist / welche ein sondere würckung ist des H.
Geists in vns. Rom. 5. cap.

Arbeiteren
sol man zü
essen gebē.

Das aber Nabal ein herrlich mal zügrüß
stet hat sinen wercklütten / ist zum teil zü lo
ben / wie ouch daoben gemeldet / dann es sol
sich einer an fromme getrüwe dienst/taglödner/
handwerckslüt die er brucht/spys vñ tranck
nit lassen rüwen. Wo man arbeitet / da muß
man geassen haben / vñnd stadt übel wenn ei
ner ein ding ehe verderben laßt / dann er es
fürhin gäbe / oder so man sonst hebig gegen
arbeitsamen lütten ist. Wenn man die böß
ard an einer frouwen / oder einē herren weißt
so verzückt ein yerlichs was es fan / vñnd ar
beitet dester vntrüwlicher.

So wäre das ouch nit züschälten / wenn er
glych mit sinen güten fründen / nachpuren/
oder anderen / ein güten müte gehebt / vñnd sy
zü gast hette gebätten. Dann söldche fröuden
mal die glöubigen offte gehalten / vñnd was
eerlicher zimlicher fröuden sind / gunnet vns
Gott der Herr wol. Aber das ist züschälten /
weñ man ein ding überrichtet. Als diser hat
ein mal lassen zürüsten / das wenn es ein Kün
nig hette söllen halten / oder er einen hette söll
len

Ein König
lich maal.

Sie mündt Predig. 69

len empfahen/so were es kostlich gnüg gsyn.
Wenn man ein pracht in sömlichen dingen
tribt/vñ ein überfluß/so ist es nit zloben. Ein
yeder sol gedencken woz sinem stand welle ge
le gebüren. Ein Burger oder landtman/soles
nit einem fryherren/graffen/gschwigen einē
grösseren herren / wellen zü oder vor thun.
Sonderlich ist das an im geschälten / Das er
sich vollen wyngs gesoffen hat/vnd on zwyfel
sine gest ouch gfült. Dan es fröuwet trunctē
lüt nit / weñ nit ander auch mit inen voll vnd
truncken sind. Da gadt es an ein nöten vnd
triben/als wenn ein fürman sine roß tribt/so
er mit dem wagen in einem maaß bestecht ist/
vnd nit ab statt komē mag. Wir söllend ouch
wenn wir wol läbend/der armen nit vergäfs
sen. Disen Nabal hat an sich selbs vnd sine
zächgsellen nichts gertüwen/kein vnkostē hat
in beduret sin pracht züerzeigen/aber do er
den hungerigen etwas mitteilen sol / da thüt
er als ob er von hußlassen müsse. Wie nach vi
ler rycher lüten bruch ist / die in einem maal
zyt oder sünst vil vnnützlich durhin rich
tend/vñ wenn sy den armen ja grad jrē wyb
vnd kinden / die bloß noturft gäben söllend/
so flagend sy sich übel/vnd sind vnwillig/ge
denckend nit dz sy vil mehr wyngs vñ anders
zum überfluß verbruchend dan grad zur no
turft/gedencken ouch an die trüw warnung
vnfers herren nit / Luce am zwölfften cap

Von dem Nabal

lügend vnd hütend ſich / dz ſüwere hertzen nit
bſchwert werdind / mit freſſery vnnnd trun-
ckenheit /c.

Die Abigael als ein wyß vnd verſtendig
wyb / zeigt irem Nabal wed' kleins nach grof-
ſes deren Dingen an / die ſich verloffen hattē
Des ſelben tags / dann ſy ſach wol daß er gar
verwarloſſet / vñ deßhalb yetzemaal nichts
fruchtbarlichſ mit im vßzerichten was. Erſt
am morgen des folgenden tags do im der
royn vß dem kopff kam / hat ſy im fürghalten
diſe wort oder ſachen. Man ſagt / weñ einer
mit einem truncken rede / ſo rede er mit einē
der nit daheimen ſye. Item / einem truncknē
man / vñ einem gladnen wagen ſölle man ab-
wäg gan. Cleostratus wie bym Stobeo ſtaet
do in einer ſtriēff ſiner trunckenheit halben /
vnd fragt ob er ſich nit ſchampter antwortet /
Schempſt du dich nit dz du einen truncken
warnest oder mit im redeſt? Hette Abigael
vil wellen mit im reden do er voll wz / ſo hette
er nit gloßet / er hette es ouch nit verſtandē /
oder wäre iren mit ſchönder antwort begäg-
net / wie des Dauiden Botten. Zu dem hette
ers von iren nit wellen lyden diewil ander by
im warend / welche wie ſich wol züuerſähen
ouch werdend voll gſyn ſyn / darumb hettind
ire reden wenig mögen verſachen. Der Herr
leert im h. Euangelio man ſölle die Berlin nit
für die ſüw ſchüttē. Es wäre ſchad gſyn / weñ
W

sy vil guter worten hette vergäbens söllē vor
denen truncken sūwen bruchen.

Es sol ein wyb irem man sine mengel un-
dersagen/vñ in warnen/das er jm selbs vor
schaden sye/aber es ligt vil an dem/das sy der
personen/des orts/der zyt vnd anderer umb-
stenden flyssig geware. Dan es wil ein man
nit/das anderlüt hörend/was sinem wyb gā-
gen jm angliēgen sye. So ist es ouch nit zū al-
ler zyten kumlich/es wāre bald die sach nach
böser worden. Als wenn ein man surst vn-
dulzig/zornig/oder wie hie der Nabal trun-
cken ist. So sol ouch von wyberē ein b'schei-
denheit/in dem dz sy iren mannē fürhaltend
gebrucht werden. Du hörst nit dz dise eeren
frouw/den man gebalget/mit verbissnē woz-
ten an jm gstandē vñ in gefiltzet/vñ über jm
gschwore habe/sond sy hat jm fründlich vñ
einfalt erzellt / was vor handen gewāsen/wie
Gott für jm gewachet / wie es so wenig gfelt/
er wāre vnnersächliche vñ lyb vñ läben kō-
men/wo nit durch ordenliche mittel söllichs
wāre abgstelt worden.

Wie Nabal von sinem wyb ghört dz jm dz
vnglück vor der thür gewāsen/hat er irē woz-
ten gloubt. Dan sy jm nie lüg für gāben hat/
sunst hette er irē nit gloubt. Wz ist beschāhē?
Ein hertz ist vō stūdā in jm erstorbē/er ist nit
anderst gsyn dan wie ein stein / über 10. tag
darnach hat in d Herr gschlagē vñ er ist gste-
bē. Im 2. büch d Chronie 13. ca. wirt vō künig

Ein wyb
sol irē man
ein ding
fründlich
undersagē.

Von dem Nabal.

Der herr
hat de Na-
bal geschla-
gen.

Zeroboam/ Der ein fürname vrsach was der zertrennung des ruchs vnd abgöttery so die zähen stämen tribend/ ouch gmeldet der herr habe in geschlagen vnd er sye gstorben: was todts er gstorben wirt nit vstrickt: es laßt sich aber ansähen mit der ard zreden/ welle der h. geist anzeigen er sye nit eines gemeinen sonder eines erschrockenlichen todts gstorben. Wie dann Gott die tyrannen meerteils zu einem exēpel seines zorns macht. Habind aber glich diser Zeroboam vnd Nabal sanfte end gehept/ so ist doch gwüß/ das wo sy nit rüw vnd leid über ire sünd ghept habend/ vnd ire hoffnung in fünffrigen Messiam gsetzt / sy ewiglich verloren sind. Dann vnser herr Jesus sagt Ioan am 3. ca. selbs / Wār in son Gottes gloubt der wirt nit gericht/ wer aber nit gloubt d ist schon gericht: dan er gloubt nit in den namē des eingebornē sons Gottes. Vnd bschließt das selb cap. mit denen worten: Wār in den son gloubt/ der hat das ewig läben: wār aber in den son nit gloubt der wirt das läben nit haben / sonder der zorn Gottes blibt ob im

So bald Abigael dem Nabal erzelt/ wie es gangen / hatt er nichts mee können/ ist erstunet/ hatt vernunfft vnd verstand (desse er vor nit vil hat) gar verloren. Siexyles den Gottlosen lüten nach irem sinn gadt/ so sind sy sorgloß: Wenn man von gfaaren sagt die vorhanden

vorhanden/trübend sy jr gspött / vnd verach-
tend alle warnung/so bald aber die gfaar vn-
uersächlich kompt / sind sy nichts wärt/es
empfält jnen das hertz gar. Des hast ouch
ein exempel im künig Balhasar/d was hins-
der dem weyn gar fräch/ verachtet den waare
Gott Israels / aber so bald er die hand sach
die gigen dem lüchter hinüber an die wand
etliche wort schreyb / do erschraef er so übel/
das er anfieng schlotteren/ vnd fun vff im
selbs mocht stan. Also sind die Gottlosen
nach vor der gfaar fräch / in d gfaar aber gar
erschroffen vnd fleinmütig.

Dies exempel erinneret vns nit nun/ das
die Gottlosen ouch sterbē müssen/ vñ meer
teils vil ee dan sy selbs vermeinend (wiewol
sy sich nit anderst gstellend dan als ob sy die
wält ewig wellind plagē) sonder leert ouch
das wir die besserung vnsers läbens nit ver-
zückind/ dann sonst gwonend wir des bösen
das wir nit meer darvon lassen könnend / od
es nit meer für böß vnd vnrecht habend: oder
wir werdend überylt in sünden / wie hie der
Nabal. Dann du hörst hie von keiner büß
vñ besserung nichts. Er ist von stundan gsyn
wie ein stein/hat nichts von jm selbs gewüßt.
Doch ist er erst über zähen tag darnach gestor-
ben/villicht hat in Gott darumb nach so lang
läben lassen/das niemand gedächte/ der Da-
uid od Abigael hettēd in heimlich vmbrache.

Die besse-
rung sollēd
wir bald zu
handē nām-
men.



Von dem Nabal

Da aber kein wyb/sy müsse gleich lyden was sy welle/durch ein söllich verbotten mittel jrē selbs zu helfen vnderstan sol.

Es beschicht vil / das ouch gläubige lüt vom güt gschlagen/ etliche tag an ein anderē ligend wie ein bloch/ kein vernunft nach verstand habend/kein zeichen überall könnend gāben / aber die selben habend vorhin wenn sy vfgestanden/nidergangē/ vñ sunst sich Gott befolhen. Mit denen aber die vorhin Gott nichts nachgefraget/ ja dē buch für jrē Gott ghept habend/ist es gar gfaarlich. Dann da ist kein anruffen Gottes / kein erkantnuß der sünden/nach waarer rüwen.

Das end Nabals glicher sich mit sinem läben/ er ist ein stock oder stürckel gsyn / yetz wirt er eins meal wie ein stein / weyßt gar nichts von keinen dingen/vñ fart also dahin. Was nützt in yetz sin groß güt? sin ansāhen vñ and's daruff die ungläubig wält vil setzt?

Das Gott disen Nabal geschlagen tröstet alle gläubigē. Dan wie er desse frāfel vñ hoch müß bald gestürzt hat/also kan vnd mag er sine fiend nach baschgen /er wirt ouch den sinen nit mee vfflegen dann sy tragē mögend. Dargegen erschreckt es alle tyrānen/ die sich wider from gläubig lüt legend. Dan vntersāhenlich werdend sy dahin gnomen werdē. In geschichten der h. Apostlen am 12. cap. list man vom Herode/do dz volck schrey / Dz ist ein stim Gottes/vñ nit eines mensche/ do sye

Sie nündt Predig.

72

er vom engel des Herrē von stundan geschla-
gen worden/darum̄ dz er die eer Gott nit gā-
ben hat.

Insonderheit aber sähend wir hie als in
einem spiegel/wz füllery vñ trunckenheit zū
letst für ein lon gābe. Des Nabals ding wz
nichts anders / dan sich selbs vñ anderlüt zū
füllen/darum̄ starb er vnuerfähenlich dahin.
Er hette villicht alters halb nach vil jar mē-
gen läben. Sagst/es sye jm nit von völle/son-
der vß schrecken widerfaren. Diser schrecken
aber ist vß dem komen/dz er gedacht/wie we-
nig es gfelt/sin truncken läben / wär jm übel
vßgeschlagen. Alle artzet stimend in dem über
ein/dz vß d trunckenheit vil schädlicher fran-
ckheiten erwachsend. So leert die tägliche er-
farung wz trunckenheit bringe. Jetz wil ich
nit von denen erschrockenlichen fällen sagen/
die sich mit truncknen lüten zūtragend/ wie
ellendenflich sy etwan ztod fallind/etwan res-
dend od thünd in einer wynfuchte/dz sy vmb
jr läben komend/od fahend mit einem ander-
re einhader an/dz sy todt vff dē platz blibēd.
Darum̄ hūte sich ein yeder vor trunckenheit/
vñ so er sich vergangen/so thūe er sich d selbē
widerumb ab/vñ myde allen bösen anlaß.

Wie trinke
kenheit
bleibt loue:

Wz Nabal für ein lychgāg vñ begrebtuß
ghept/wirt nit gmāldet/es ist aber wol zūuer
mütē/ diewyl er rych gsyn vñ ein gūter läb-
gsell/so werde es stattlich zūgāgē sin. Aber
thūe mā denē wz mā welle so ist es so vil irer

Nabals
lochgang.

Von dem Nabal

seelē heil antrifft vmb sunst vnd vergäbens:
Diewil einem Gott der herr das läben gibt/
sol er sich rächt in handel schicken/hie bhalten
oder verlürt man das läben / wie der h. Cy-
prianus wider Demetriann rächt redt. Wir
ergerend vns oft an der Gottloßen thün vñ
lassen überredend vns selbs / jr ding werde
allwäg ein bestand haben / aber sy werdend
dahin genomen/ erwan in jrer blüenden ju-
gend/etwā schlecht sy Gott wol nit vō stund
an/sy werdend aber das zyl das er inē gsteckt
hat/nit überschryten. Dorum sollend wir in
aller veruolgung dester Sultiger vnd williz-
ger sin.

David lob-
bet Gott.

Wie hat sich aber David ghalten / da er
ghört das Nabal vom Herren ist getödt wor-
den? Er hatt Gott globt/das er sin schmach
am Nabal grochen hat. Wie er den Dauiden
gschmecht/ist da oben angezeigt. Demnach das
Gott in/den Dauiden/vor dem bösen enthal-
ten habe. Das er namlich den Nabal/ sampt
sinem hußgsind nit erwürget hat/wie sin an-
schlag was. Nabal was yetz todt vñ wäre ü-
bel zü erbarmen gsyn/ weñ die vnschuldigen
mit im hertind müssen lyden.

Die gläubigen fröuwend sich/wenn sy dz
böß nie volbringend / danckend Gott/wenn
er inen etwas in wäg stelt. Die Gottlosen as-
ber/verflüchend die so inen weerend vnd dar-
vor sind / das sy das böß nit thün mögend.
Wär

Wär jnen hury vnd ebruch/ den wücher/ dz
 kriegen vmb gälts willen/vnnd anders der
 gleichen/vß Göttlichem wort weert/den wela
 lend sy tod haben. Es ist ouch ein fürnemme
 vrsach vmb deren willen die wällt das heilig
 Euangelium hasset vnd nit lyden wil/das sy
 bsorget/sy müsse das böß myden/nach darff
 sy die predig des Euangeliums anderlitten
 erleiden/mit dem das sy für gibt/es weere gü
 te werck vnd pflange alles böß / da sich aber
 das widerspyl findt.

Er sagt ouch / der Herr habe dem Nabal
 das übel vß sinen kopf vergulden/ das ist er
 habe in gstraafft von des wägen/ das er sich
 so übel jägen jm / vnnd ouch in ander wäg
 gehalten.

Summa Dauid hat sich gefrduret / das
 jm Gott disen sinen fiend abgenommen/vnnd
 in gstraafft hat. Ist aber das nit wider die lie
 be? Sagen die wyß man in sprüchwörter
 ren am 24. cap. Wir sollend vns nit frduwen
 wenn vnser fiend falt/ das nit Gott von jm
 lasse/vnd vns straffe? Der Herr sagt selbs
 Matth 5. Liebend üwere fiend/wünschend
 güts denen die üch verflüchend. Thünd güts
 denen die üch hassend. Bittend für die/so üch
 beleidigend/vnd üch veruolgend. Vß das jr
 kinder syend üwers vatters der in himlen
 ist. Dann er laßt sin Sonnen vßgan über die
 bösen vnd güten / vnd sendt den rāgen über

Ob einer
 sich fräus
 wen solle
 wenn sin fi
 end vmb
 kompt

⚔

Von dem Nabal

Die gerächten vnd vngerächten. Dann weiß jr die liebend die üch liebend / was werdend jr für ein lon habē? Thünd dasselbig nit auch die Publicanen? vnd so jr allein üwere Brüder fründtlich empfabend/was thünd jr sonderlichsz thünd nit die Publicanen oder Zoller auch also? Darumb sollend jr volkōmen syn/glych wie üwer Vatter der in himlen ist/vollkōmen ist. Anders derglychen wirdt anderschwo erzelt. Sargegen sagt Dauid im 58. Psalmen: Der grächt wirdt sich frōuwen wenn er solche raach (die er den Gottlosen vnder der gstalt eins gebätts verkündt hat) sicht/ vnd wirt sine füß wäschen in des Gottlosen Blut / Proverb. 11. Die fromen frolosckend/wenn die Gottlosen vmbkōmend. Soläsend wir Exodi am 15. Cap. Das wie Gott den künig Pharao/vnd die Egyptier im rote Meer extranckt/die Hebreer ire lobgsang gesungen/vnnd ire reyen gehalten habind. Daruf gib ich disen einfalten Bericht: Die Diener Gottes frōuwend sich nit vß fleischlicher ansächtung/als nyd/hassz/fyendschafft/sonder vmb der eer Gottes willen. Dann mer glich Gottes grächtigkeit in solchen fällen prykt/vñ sicht das er die regierung noch nit von handen gäben / das er noch so gwalzig ist/als vor alten zyten: vmb jren selbs vñ anderer gläubigen willen / dann durch solche

Das exempel werdend sy in waarem glauben/
gedult vnd allem gütten nit wenig g. sterckt.
Sy wäschend ire füß/ wie Dauid gesagt/ im
Blut der Gottlosen/ das ist/ Wenn sy sähend
wie Gott die fräßer strafft/ so lernend sy by
irem erschrockenlichen exempel iren ansich-
tungen widerstou. Dann in der heiligen ges-
chafft werdend durch die füß / die ansich-
tungen der menschen verstanden. Es wirdt
ouch inen lufft/ das sy vnder dem crütz nit
gar erligend/ wenn die veruolger hingenom-
men werdend / oder mit irer eignen not zü-
schaffen habend: vmb der Gottlosen wil-
len/ dann sy durch die strafft miltet/ oder
etwan gar bekeert werdend. Tödt sy dann
Gott ee sy mee lydens den gläubigen züstet
sind / so ist ouch ire strafft dester ringer in
der verdammuß.

Leer ouch vß disen werten/ wie Gott die
straffe / die im die sinen beleidigend / oder
sunst in frässery/ trunckenheit/ gyt / vnd an-
deren offnen lasteren läbend. Es stadt nit
einfalt / er sye gestorben / sonder Gott habe
in geschlagen / das er gestorben. Er heite
natürlich züreden oder alters halben wollän-
ger mögē läben/ aber der H. Dauid sagt im
fünff vnd fünffzigsten Psalmen/ Die blüt-
gigen vnd falschen / werdind ire tag nit off
das halb bringen. Welchs nit allein nach der
Gottlosen meinung sol verstandē weidē. die

Die Goit-
losen für-
herend inē
ir läbens

Von dem Nabal

inen selbs ynbildend/wie lang sy nach läben/
was sy als vor irem todt vßrichten wellind/
an welcher irer rächnung inē vil abgadr: son
der das sy inen selbs das läben fürzerend/
wie an eebrächeren / Friegslüten/ gytigen zü
sähen/ıc. Einem eebrächer gibt etwan ein vn
züchtig schantlich wyb etwas zü ässen/das er
von iren nit lasse/sonder in üppiger liebe gā
gen iren standhafft blybe / rüstet es aber nit
rächte zü/oder es gradt nit rächte/das ligt dem
ellenden menschen im magen/ er hept an vß
zeeren/hat kein güte stund mehr/vnd müß zü
letst daran sterben. Etwan list er von den hü
ren schndde frackheiten vff/ als mit züchten
zü reden die bösen Blateren / die läme vnd an
dere plagen / die in zum tod fürderend. Es
werdend ouch die eebrächer etwan vßgeträt
ten vnd in schanden vñ lasteren vmbgebracht.
So last sy ouch Gott etwan in andere sünd
fallē/darum sy ir läbē verwürckend. Kriegs
lüt die allein vmb gälts willē wider irer her
ren vnd oberen schwere verbott / in frömdē
land zü reyß louffend/werdend offr ellenden
lich vmbgebracht/erfrürend/vnnd sterbend
hungers. So sy anheimsch belibend möch
tend sy natürlich zü reden nach vil jar vnnd
tag läben. Die gytigen frässend sich selbs/
Brächend inen den natürlichē schlaaff/lassend
inē selbs kein rüw/das sy ouch offr ee zyt ster
bend. Glys mag von anderen lasterhaffren
lütren

Sie zähend Predig. 75

lütten gesagt werden. Es bricht vilen auch
Gott an irem läben ab/ vmb siner gläubigen
willen/ die sy plagend/ vnnnd gägen denen sy
vnbill Bruchend. Dem trüwen Gott übergib
alle rachs/ der wirt allen sachen recht thün.

Von des vertruncknen
Nabals läben vnnnd

rod/2c.

Die zähend Predig.

Wie David nach der Abigael gewor-
ben/vnd sy im die ee zü gesagt vnd verspro-
chen habe.

Vnd David sandt hin vnnnd ließ
mit Abigael reden das er sy zum wyb
neme. Vnd do die diener Davids zü
Abigael kamend gen Carmel/ red-
tend sy mit iren vnnnd sprachend: Da-
uid hat vns zü dir gsandt / dz er dich
zum wyb neme. Sy stünd vff vnnnd
neigt sich mit irem angesicht zur er-
den vnnnd sprach: S. he hie ist din
magt / das sy diene den knechten mi-

in 177

K ij

Von dem Nabat

nes herren vnd ire füß wäsche. Vnd
Abigael ylet / vnd macht sich vff
vnd reit vff einem esel vnd fünff
mägt die by iren füßen warend / vnd
zoch den botten Sauids nach / vnd
ward sin wyb. Auch nam Sauid
Achinoam von Israel / vnd warend
beede sine wyber. Saul aber gab
Michol sin tochter Sauids wyb
dem Phalti dem son Laie von Gal-
lim.

In disen worten wirt erzelt / wie Da-
uid vmb des Nabals wittfrouw die
Abigael gworben / vnd wie sy in zu der
ee vnd eeren genomen habe. So vil die
werbung antrifft / so statt er habe sine botten
an sy gschickt / iren willen zuerkundigen. Ob
das glych vff des Nabals tod beschähen / od
etwas zyt darnach / vnd aber vmb der histo-
ry willen / hiehar gsetzt werd / mag man nit
grundtlich wüssen / doch laßt sich ansähen / er
habe ein zyt lāg verzogē / ee er an sy geschickt.
Dann Sauid vnd Abigael werdend nit an-
ders gerhon haben / dann das den eeren ges-
zumpt. Es wäre aber Sauiden übel angstan-
den wenn er vñ sy gworbē hette / ee der vorig
man /

man/wie man sagt rächt erkaltet wäre. Desß
 glychen jren ouch / wenn sy von stundan ein
 anderen man genomen hette. Was eerbarer
 lüten sind/habend nach hüt by tag nit vil vff
 denen wyberen/ die jnen so nor lassend sin an
 dere mannen zü nämen/ das sy kum warten
 mögend / Bis ire abgestorbenen man also zre-
 den rächt vergraben / sy komend erwan mit
 anderen mannen dahar / da sy von vougens
 schwanger sind/ da sy zum wenigisten ware-
 ten soltend bis die kind an die wällt kemund.

Es wirt sunst in der h. gschrifft kein zyt
 Bestimpt/wie lang einer im wittling/oder ei-
 ne im wittwen staat bliben sölle/ ee sy sich wi-
 derum in den h.eestand begäbind. Der künig
 Numa hat ein ordnung zü Rom gmacht/ dz
 ein wyb nit lenger vñ jren man sölte leid tra-
 gen/dann zähē monat/vnder welcher zyt sy
 keinen man nemmen solt / wie Alexander ab
 Alexandria schribt lib.3 capite 7. Hernach
 wie in Digestis statt solt eine ein gantz jar leid
 vñ jren man tragen vñd sich nit enderen/oz-
 der man hielt es für vneerlich/2c.

Etlich der alten habend fürgeben/ es sye
 vnrecht wenn einer dem sin wyb gstorben/
 ein andere/od' eine derē der manigestorbē/ein
 anderen näme/aber sy habend zvil daran ge-
 thō. Dañ sy one grund d' h. gschrifft sömliches
 gehalten vñ geleert habēd. Dise Abigael wirt
 von jrer Gottsforcht vñd fromkeit gerümpft/

Secunda
 nuptia.



Von dem Tabal

Die hat nach absterbend jres mans/ ein ande-
ren genommen/also andere ouch. Dañ die re-
gel des h. Apostels blibt/ welcher eins wybs
oder welche eins mans notwendig ist/ das sy
zur ee gryffen mögind. Aber man hat vor sy-
ten etliche ding zū sünd gemacht/ die Gott nit
verbotten/etliche für gute werck gehalten/ die
wider Gottes wort gsyn sind.

Das aber David nit selbs mündlich mit
jren gredt/ mag vß der ursach beschähen syn/
das er wellen er faren/ ob sy ein güten willen
zū jm habe oder nit/ daran in der ee nit wenig
glägen ist. Dañ es thut selten gut/ weñ man
lüt zū samen zwingt/ die kein hertz nach liebe
zū samen habend. Das aber hatter durch Bot-
ten das mögē erfahren. Dañ wäre er selbs zū
jren komen/ so hette sy jm vß forcht vñ scham
nit können abschlahen/ sy do:fft das mit sine
Dieneren reden/ vnd jnen anzeigen/ wie sy ge-
sinnet wäre. Der fürsten botten versagt man
vil/ dz mā den fürsten weñ sy selbs persōnlich
zügegen wärind/ nit do:ffte abschlahen.

Wie man
die ee solle
beziehen.

Hie lernend wir/ wie man die ee beziehen
solle/namlich eerlich lüt an eine oder jre ver-
wanten schicken / vnd einer vffrecht vnd
redlich zur ee vñ eeren begären. David facht
es nit mit dem byschlaaf an/ sond thut sin eer-
liche werbung: also soles nach zügen/ dann
vil vnrads daruß volget/ weñ mā mit dē by-
schaff die sach anhept. Hernach findt sich etz
wan

Sie zähend Predig. 77

wan dz zwey so nach verwädt sind/dz sy ein anderē nit haben mögend:od es hatt einer od eine sich gegen einer oder einem anderen versprochen: oder der hat wol gsagt/er wölle an einer ein Biderbmann syn/sy zü turchen vnd strassen führen/hernach vnderstadt er jrē mit loughnen züentrinnen / denen vnd anderen gsaaren / mag man wol vor syn / wenn man die sach ordenlich zü handen nimpt. Sonderlich aber söllend jung lüt nit on vorwissen vatter vñ müter/ irer vögten vnd gefründten zur ee gryffen. Dann da Gott sagt / du solt vatter vnd müter in eeren haben / so begryffe er ouch darunder / daß sy in sölchen fälen die iren fragen söllind/was jnen hernach begegnet / dörfend sy dester baß zü den iren kommen/ sonst sagend sy/selbs gethon / selbs haben/ es beschicht dir äben rächt. Es haltend ouch die mannen ire wyber oft dester schönder/ sagend / magst du es nit lyden/ so gang zü dinem vatter oder diner müter vnd zeig jnen an wie ich mit dir handle.

Wir habēd ouch ein herrlich exempel / wie Gott die sinen oft/ouch hie in zyt/vß grosser nodt crütz vnd lyden erlöse / vnd sy ires leids ergetze. Dise Abigael hat ein schwär crütz gehebt/ dann sy vnd jr eewirt warend niene einer gattung. Er was gar ein Gottloser grober vnbescheidner man/yemer dar voll/trancck darzū wie man sagt / löwen wyn / dann so

Von dem Nabal

Bald er voll/ was niemandt vor jm sicher / er wolts als tod haben / zum wenigsten mit dem mul. Wie gern sy hett wöllen / kondt sy in nit Besseren. Nach Befilcht sy Gott die sach/ Duldet sin wüste wyß/ loufft nit von jm/ thüt das jren trüwlich/ überhebt sich nit jrer schöme / sagt nit / er ist minen nie wärdt worden. Das vergilt jren yetz d Herr/ daß sy den Dauiden überkumpt/ ja künigin wirt in Israel.

**Trost für
die wyber.**

Es sind noch vff den hüttigē tag vil Naballes/ die sich oft füllend/ vnd weñ sy voll sind/ so ist niemand vor jnē sicher/ sy wöllends als tod haben/ jagend zün zyten wyb vñ kind mit Blossen schwerdt im huß hertum. Dise habēd ettwan wyber die sich nichts dester weniger eerlich vñ wol an jnen haltend/ so sy glych weder lieb noch radt von jnē habend/ hoffend yemer dar die Besserung. Dise wirt Gott der Herr ouch zū siner zyt erlösen. Vnd ob glych ein eerenwyb ettwan vnwillig wire so jr man täglich voll ist/ vñ jren sampt den finden hunger laßt / sy ouch kein liebe jres manns gegen jren spüren kan/ &c. So gedäncke sy allwäg dise sye jr crütz / lyden / vnd trucke sy sich so lang als sy yenen möge / gedäncke ouch Darneben / ein yede muß etwas haben. Wie mancher muß von des waarē gloubens wägen/ in einer bösen schwärē gfäncknuß liegen / da er weder Son noch Mon sicht? wie mancher wirt vff ein galeen verkoufft? also
hat

Sie zähend Predig. 78

hat Gott manche eeren frouw ouch gebundē/
aber er kan vñ mag sy wol zū siner zyt ledigē.
Möchte glych einē vff die eescheidūg tringē/
so ist es nit allwäg güt/sonderlich wenn eelüt
vil kind By ein anderē habend. Eine sye gedul
tig/sage nit ich sich wol das es alles hindurch
müß/darum wil ich mich ouch daryn schickē/
das mir etwz liebs beschāhe/vñ ich etwas er
getzlichkeit hab. SOND gedāncke diewyles
dinem eewirt übel anstadt/ das er sich so übel
halter/yemerdar voll ist/ sin Ze bricht / vñnd
nach allem müwillen läbr/so wil ich von des
gebotts des Herrē wāgen/min ampt vßrich
ten/ vñnd mich vor allem bösen hüten/ so wirt
mich Gott zū siner zyt erlösen/ es sye dann
durch den tod/ oder das ich (wie mit manchē
eerlichem wyb beschāhē) hernach ein eerliche
mann überkome der mir gütsthüt vñnd lieb
hat. Dan wirt glych nit ein yede die vil lyden
müß/ein künigin / so kan doch Gott in ander
wäg sy ouch hie in zyt jres leids ergetzen.

In das gegēteil/ ist ouch mancher eerlicher
man / der hat ein böß wyb die wed huß habē
kan noch wil/ vñ erst über das vnfrom an jm
ist / er weißts kan es aber nit nach form des
rächten kundlich machen/ der lyde sich ouch/
bis es besser wirt. Dan wie Gott den Nabal
gstraafft/also wirt er zū rächter zyt ein sölchs
falsches schandliches wyb ouch straaßen/ vñnd
sich wie Abigael erlösen.

Von dem Tabal

Die Füß
wäschen.

Daruff volget wie sich Abigail gegen den
Kotten Davids habe gehalten. Sy hat sich
gneigt gegen der erden mit irem angesicht/ vñ
sich also demütiget / dem Daviden als irem
herren gebürliche eer angethon. Demnach
hate sy iren güten willen gegen im angezeigt/
vñnd sich erbotten/ sy wölle willig syn/ auch
sinen Knächten die füß zuwäschen. Erkendte
hiemit daß sy zu kleinfüg sye/ das er an sy schi-
cken sölle / sy wölle nit nun sin wyb / sonder
Dienstmagt/ vñ im nit weniger ghorfam syn/
Dann ein Dienstmagdt irer frouwen/ od irem
herren/ sy wölle sich auch der aller geringsten
diensten nicht beschämen / noch beschwären.
Dann einem die füß wäschen / ist ein werck
das einer kum einer magdt od einem Knächte
im huß darff zumühen. Der H. Paulus sagt/
1. Timoth. 5. cap. Von denen Wittwen welche
man vñneimen vñd vß gemeinen güteren der
Kirchen erhalten sölle/ das sy den armen die-
nind vñd pflägend: so sy der heiligen/ das ist/
der gläubigē füß gewäschen/ ist so vil gesagt/
wenn sy arbeitsam gsyn/ vñnd gläubigen lü-
ten trüwlich gedienet habind. Im H. Euan-
gelio Joan. am 13. stadt von vnserem Herren
Christo/ wie er den abscheid mit sinen jünge-
ren gmacher/ vñnd die letze mit jnen geässen/
habe er jnen ire füß gewäschen / vñd hernach
sy glicert / daß sy auch ein anderen söllind die
füß wäschen/ hat nit ein Ceremoniam wöllen
ynsetzen

Sie zähend Predig. 79

ynsetzen/ Das man jārlich zwölff armen oder
rychen/die füß wāschen solle / vnd meinen es
sye alles darmit vßgericht/sonder hat wöllen
züerston geben / Daß sy ein anderen in der
liebe dienen sollind/sich irer gaben vñ stands
nit überheben/sonder demütig syn. Welches
insonderheit von den dieneren deß worts er-
forderet wirt. Dañ wenn die selben eergytig
vnd hochfärtig sind/so sol es nichts / wie wir
sähend / Dann sölichen jr eigne eer jnen mer
angelāgen ist/weder Gottes vnd der kirchen
eer. Wie mancher ist vff den hütigen tag der
wol wüßte was rācht wāre / aber er wil nit
geachtet syn das er gefält habe/wil den gunst
den er by fürnemmen personen hat nit ver-
lieren/ ouch nit vmb sin besoldung kommen.
Aber einer solt allwāg gedencfen/was Chri-
stus vmb vnserwillen gethon/ vnd wie es so
vmb ein kurtz zylin zūthün ist / Da wir Gott
dem Herren müßend vnser thūns vnd las-
sens rechen schafft geben.

Daruff ist Abigail ylents vff gsyn sampe
füñff mägten/ vnd zum David kommen/die
Le vollends zūbeschliessen / vñ im eeliche by-
wohnung zū leisten. Sy zücht den Dauiden
nit lang vff/sonder gibt im angends ein güte
fründliche antwort. Sy sagt nit/wenñ du vor-
hin mit dinem schwāher dem Saul versün-
d bist / oder wenn du dich zū rüwen setzest / so
wil ich zur sach reden lassen / yetz wil ich nit

Von dem Nabal

im ellend mit dir umbhin ziehen/ vnd mich in
gfaar lybs vñ läbens begäben: SOND gloubt
der verheissung Gottes / so er dem Scuiden
gethon / sagt im die Ke zu. Weist das er in
sinem ellend des trosts vnd zusprachen am
Basten bedorfft. Es frduwt einen wol/wenn
man in nit lang vff ein antwort warten laßt/
sonder bald ein fründliche willfarige ant-
wort gibt. Darumb gibt sy bald antwort/vñ
schlecht disen schick nit vß. Demnach wenn
zwey ein anderen vfrecht vnd redlich zur hei-
ligen Ke genömen/ ist gut/das sy die selv of-
fentlichen besterigind (wie yetz by den Chri-
stenlichen kirchen im Bruch ist) mit dem fir-
gang/ vnd ein anderen eeliche bywonung lei-
stind. Sonst seyert offit der böß syend sine sa-
me darzwüschet/ das sy hernach vnfründlich
in der Ke mit einanderen läbend.

So ist ouch zübedenckē/das sy fünff mägt
mit iren genömen. Dann frome eerenwyber
nit allein reisen söllend / sonder ire eerlichen
geseerten haben/ sonst möchtend sy in schwe-
ren verdacht vnd argwon kommen.

Alle eerliche wyber söllend by diser Abis-
gael lernen / wie sy sich gegen iren mannen
söllind halten/ sy nit verachten/ von des was-
gen das sy / die wyber/ erwan schön/rych/ od
von fürnemen lüten erboren sind. Dann dise
Abigael was schön von gstolt/ vnd mit herr-
lichen tugenden gezieret / noch hat sy dem
Nabal

Sie zäbend Predig. 80

Nabal gütts gethon / in fründlich gehalten /
getz entbüt sy sich ouch dem Dauiden gehor-
sam zü syn / vnd sich keines wercks zübeschä-
men / Das ein eerliche frouw im huß züthün
schuldig ist / ja entbütet sich / sy wölle ouch si-
nen Knächte die fuß wäschen / ic. Manche wil
ouch die dienst / ohn welche ein mann nit huß
haben kan / weder wüssen noch leiben.

Sy hat es ou zweyfel nit nun by dē blossen
worten lassen blyben / sond hernach ir erbietē
mit d̄ that erstattet. Wen ein wyb nit hußhal-
ten wil / jres manns nichts achtet in ouch niene
Duldē wil / so wirt er vßfünd / verthüt was er
hat / Kompt hinder böse gsellshaft wirdt zü
nichte / Das beyde / Der man vñ Das wyb / kein
güte stund mer by einanderen habend / vñ zü-
letst zü grosser armüt Kommend. Saran Das
wyb nit die Kleinist vrsach ist. Doch sol ein
man einē wyb ouch nit zūvil zūmütten / sy nit
für ein südel haltē / sonderlich so er eer vñ güt
von jren hat / ob sy sich glych zü allen sinen
diensten entbütet. Darum sagend ettlich es
habe Gott / als er dem Adam ein wyb erschaf-
fen / siner rippen eins genommen / vñnd sy
daruß gestaltet / er habe sy nit von füßen ges-
nommen / daß sy der mann nit verschupffe /
vñnd für ein füßsüdel hielte. Paulus schrybe
zü den Epheseren am 5. capitel / Die mann sol-
lind jre wyber lieben / wie Christus die Kir-
chen geliebet / vnd sich selber für sy geben hat.

Von dem Tialal

Item als ire eigne lyb/2c. 1. Pet. 3. Ir männer
wonend den wyberen bey mit vernunfft/vnd
gäbend dem wybischen/als dem schwächeren
gshirr sin eer / als die ouch mitterben sind
der gnad des läbens / vff das üwer gebärt
nit verhinderet werde/2c.

Die ardt züreden die hie vom heiligē Geist
gebraucht wirt / die mägt syend by den füßen
Abigail gsyn / stadt von den dieneren vnd
trabanten Davids ouch / vnd zeigt an/sy has
bind vff sy gewartet/vnd jnen gedienet in al
ler vnderthēigkeit / Dann was der knächten
vnd mäkten ampt sye / wirt in der schrift vil
anzeigt. Der H. Paulus schrybt in seiner Epi
stel zü den Ephes. am 5. cap. Ir knächte sind
gehorsam üweren lyblichē herren / mit forcht
vnd mit zitteren / in einfaligkeit üwers her
zens / als Christo : nit mit ougendienen als
die den mensche gfallen wöllend / sonder als
die knächte Christi: Das jr thügind den willen
Gottes von hertzen / mit gütwilligkeit als
die dem Herren dienend/2c. 2. Coloss. am 3.
cap. schrybt er ouch vff dise meinüg. Zün Tit.
2. cap. Die knächte verman daß sy iren herren
vnderthänig syend / in allen dingen gfällig:
nit widerbäffzen / nit entragind / sonder alle
güte trüw erzeigind. 1. Pet. 2. Vermandt er
die knächte daß sy nit nun iren herrē die frünt
lich syend gehorsameleistind / sonder ouch des
nen die ruch vnd harw syend. Das man von
den

Sie zählend Predig. 81

Den Knächten gesagt / wirdt vnd sol auch von
den dienstmägden vßgelegt vnd verstanden
werden.

Warumb hatt aber Dauid noch mer wy-
ber genommen. Im anderen büch Samuels
am dritten vnd fünfften Capitel / vnd im ers-
ten büch der Königen am dritten Capitel /
so er doch vorhin die Michal hatt / wußt er
nit das in Gott zum König gesalbet / vnd im
fünfften büch Moses am sibenzählenden Ca- Deut. 17.
pitel / den Königen verbotten / daß sy nit vil
wyber söland nemmen / Etlich verstand dis-
ses gsagt Gottes / das er nicht gar vil sölle
nemmen / wie der Solomon gethon / vnd die
Türggischen Keiser noch im Bruch habend.
Dann es stande auch / er sölle nit vil pfärde
halte / da nit die meinung sye / das er allein ein
pfärde zwey oder drii am Baren sölle halten.
Andere verstand es von frömbden vnd vß-
lendischen wyberen : die wyl dise vsach dar-
zü gsetzt wirdt / das sin hertz nit abgewende
werde. Aber das ist der einfalt verstand dis-
ses gebotts / er sölle nit mer dann ein wyb
haben. Dann hatt ein König vil wyber / so
müßt er grossen vnsäglichen Kosten mit inen
haben / inen frouwenzimmer zu erhalten / kleis-
der / Kleinot vnd anders zügäben / welches nit
on grosse beschwärdt des gemeinen armen
mans beschähen mocht. Demnach wurdend

Don dem Nabal

Die Künig von des rychs sachen / Durch vile
Der wyberen abgezogen / Da sy iren frommen
vnderthonen soltend losen / müstend sy iren
wyberen losen / &c. Darumb hat Dauid vn-
recht gethon / Das er mer Dann ein wyb ge-
nommen : er habe Dann ein sondere erlaub-
nuß von Gott gehebt. Welches villicht syn
mag / Dann du findest sonst nit / Das der Pro-
phet Nathan / der im andere sine sünden für-
gehalten / in des stuck's halben gestraafft ha-
be / sonder sagt / Gott habe sy im gegäben /
namlich die vil wyber. Darumb es ein grosse
sünd was / Das er Vrie der nun ein wyb hat /
Die selb überfürt.

Sin erste hußfrouw die Michal / leistet
Diser zyt im kein Bywonung / Dann der Kün-
ig Saul hat sy einem anderen Phalti oder
Phaltiel genant / dem son Lais von Gallim
(ist ein nammen einer statt) vermächlet. An-
fangs gab er sy Dauiden keiner anderen mei-
nung Dann das er ein hoffnung hat / Durch
das mittel wolt er in vmbbringen / Dann sin
tochter wurde im dem Saul darzu beholf-
fen syn. Michal aber liebet den Dauiden /
vnd halff im darvon / als der Saul in nachts
vfnemen wolt / Dann sy ließ in an einem
seil zur Beyen vß. Er gab sy einem anderen /
frylich das es Dauiden ein groß crütz wäre /
Diewyl er im sonst kein leid fonde zügestat-
ten.

Sie zählend Predig. 82

ren. Demnach wußt er wol/ das man im von
Deßwägen übel redt/ das er sin eignen tochter
ermann so ernstlich veruelget/ Deßhalb nam
er im sin tochter by deren er keine kind hatt/
das die fruntschafft vßwäre. In diesem allen
aber thet Saul vnrecht. Dann er hat sin tochter
dem verheissen der den Goliath bestün-
de/ vñnd ließ Dauiden vff dem wohn als
wölte er im sin eltere tochter Merab geben.
So aber die zyt kam das er sy nehmen solt/
gab er sy einem anderen/ der hieß Adriel/ wie
im achtzählenden Capitel gemaldet wirdt.
Hernach gab er im die iunger / welche Da-
uid als vil als erkoufft hatt mit hundert vor-
hüten der Philisteren/ im ersten Buch Sa-
muels am achtzählenden Capitel: Dann an
statt d morgengaab solt er so vil vorhüt dem
Saul darzellen. Vermeint er wurde sich wa-
gen/ vñd von Philisteren erschlagen werden.
Sy beyde Dauid vñ Michal/ hattend ein gü-
ten willen zusamē/ da solt Saul das/ so Gott
zusamen gfügt/ nit gescheiden haben.

Es sündet ouch Michal in dem/ das sy ein
anderen nam. Phelti thet ouch vnrecht/ denn
Michal was nit rechtlich vom Dauiden ge-
scheiden. Hette iren Dauid ein scheidbrieff
geben/ so hette er sy nach dem gatz nit wider
mögen nemen. Sagt/ Sy habends müssen
thun oder Böfers gläben/ das ist nit gnüg.

Von dem Nabal

actor.
Matth. 10.
Luc. 14.
Exod. 1.
Daniel.

Dann einer ehe sin lyb vnnnd läben sol verlies-
ren/dann das er sich zwingen lasse zu vnges-
lichen dingen/ mit der Le sol man nit schims-
pfen. Vor der wält habend sy ein güte ents-
schuldigung gehebt/aber vor Gott nit / wels-
chem man mer gehorsamen sol / dann allen
menschen. Unser Herr Christus sagt Mat-
thai am zähenden Capitel / Wår vatter vnnnd
müter mer liebet dann mich/ der ist minen nit
wärt. Vnd wår sün vnd töchteren mer liebet
dann mich / der ist minen nit wärt. Luce am
vierzähenden Capitel erkläret er sich noch baß.
Wie man sich halten solle so mans vns gebü-
ret das wider Gott ist/ leert das exempel der
hebamē in Egypten/der gellen Daniels/1c.
Sy solt ins ellend dem mann nachzogen syn.
Im anderen büch Samuels am dritten Ca-
pitel / Schickt David zum Isboseth sinem
schwager/vnd hieß im die Michal wider zü-
stellen / welches er ouch thät / dann er wußt
das es billich was/oder besorget böfers/1c.

Polygamia So vil aber Polygamiam in gemein an-
trifft / ob namlich einer vil wyber mit einan-
deren haben solle oder möge / wirt vil dar-
von disputiert / die erst ynsetzung der Leist
richtig darwider. Dann Gott der die H. Le
selbs yngesetzt/vnnnd die ersten eemenschen/
vnsere vatter vnd müter Adam vnnnd Euan
zusamen geben/hatt g sagt: Der mann wirdt
vatter

Sie zähend Predig. 83

vatter vnd müter verlassen / vnnnd sinem wyb
anhangen. Sy zwey werdend ein fleisch / das
ist / als vil als ein lyb syn. Er hat dem Adā-
men nit zwey oder drii wyber sonder eine ge-
ben. In diser ordnung habend die heiligen
alten vätter / Seth / Enos vnd andere geläbt /
ein yeder hat sin eelich wyb vnnnd kinder ge-
hebt. Der erst der zwey wyber genommen /
ist Lamech gsyn der todtschleger / welcher
vom Cain dem mörder sin hartommen ge- *Gen. 4.*
hebt / im ersten buch Moses am vierdten ca-
pitel. Nach dem sündfluß liest das der heil-
ig vatter Abraham zu seiner Sara / die Agar *Gen. 16.*
genommen / nit vß mütwillen vnnnd lichtfer-
tigkeit / sond' das er ein groß verlangen hat /
nach kinderen / dann im Gott verheissen / das
von im der gebenedyete saamen solte komen.
Jacob nam zwo schwösteren / dann er betros- *Gen. 29.*
gen was von sinem schwäher dem Laban.
Dises ist vor dem gsatz Moses beschähen.
Also liest vom Helana / das er Peninnam
vnnnd Annam zümaal gehebt / welche hüret
Gott nit geschulten / sonder gesägnat hat.
So was im gsatz Gottes nit vß truckenlich
verbotten / das keiner mehr dan ein wyb nā-
men solte. So vil aber dise exempel antrifft /
so volget nit / Ist dises den alten vätteren
rächt gsyn / so ist es ouch vns rächt vnnnd zü-
gelassen vß den hüttigen tag. Dann vil ding

Von dem Nabal

in der heiligen geschicht von den heiligen
väteren stund/ die wir inen nit sollend nach-
thun. Gott hat inen vß gewißen vrsachen/et-
liche ding nachgelassen vnd erlobt/die vns
verbotten sind. Wir sollend by der ersten yn-
satzung blyben. Es sind yetz andere zyten/
dann do zūmaal gsyn sind. Die heiligen vāte-
ter habend nit vmb fleischlichs wollusts wil-
len vil wyber genommen/sonder die not hat
sy darzū triben. S. Augustinus sagt an ei-
nem ort/es sye dorumb beschāhen/ das sy die
die wāllt meeretind. Du lifest wie das Jū-
disch volck vß der Babylonischen gfencknuß
widerumb gen Jerusalem vnd in das Jū-
disch land kōmen/das inen ettlich ouch vß den
Priesteren vnd Leuiten/ire alten wyber die
mit inen vß Babylon kōmen / verachtet vnd
von inen gstoffen/vnd hüpsche junge genom-
men habind / aber Esdras wolt das nit ge-
statten / schied die nūwen von inen / sagt sy
sollend die vorigen behalten. Malachie am
anderen Capitel/ werffend sy das für/ Ist nit
einer gsyn / der Gottes geist gehept der es
ouch gethon hat 2 Redtend vff den Abrahā-
men. Aber der Propbet gibt antwort / der
selb habe es nit vß Bosheit gethon / sonder
habe Gottes samē gesūcht. Matthei am
nūnzāhenden Capitel leert vnser Herr Chris-
tus wie anfänglich die Le sye yngesetzt/
vnd

*Augustinus
de polyga-
mia*

*Malach.
2*

*Matth
19*

Sie zähend Predig. 84

vnd zwüschen man vnd wyb solle bezogen werden. By der ersten ordnung sol es fürhin belyben. Siderhär habend ouch die Christenlichen Keiser ordnung geben / das ein mann mit mer dann ein wyb haben solle / darby soltend wir es einfalt lassen blyben / vnd nit widerumb die ding so ordenlich abgethon / vnderston ynzuführen.

*imperata
est prohibuit
sicut poly-
gamiam.*

Wiewol aber Gott vß gewüssen vrsachen den alten nachgelassen / das ein mann mer dann ein wyb nemmen möchte / so hat er doch nit wollen / das ein wyb mer dann ein mann haben solte. Dann es wäre zwysffelhaft gsyn / welchem die kind bettind sollen geben werden / demnach wärind die eerb- güter verwächset worden / vnd sonst wäre vil vnordnung daruß geuolget.

AB

Etlich legend dise hystory vom David vnd Nabal allegoricè oder durch einen geistlichen verstand vß. David vnd sine kriegslüt wurdend vertriben vnd ernstlich veruolget: also werdend die so Christo mit waarem glouben anhangend / vnd inn für iren künig haltend / nachhüt by tag vß irem vaterland von dem vnd den iren veriagt / müßsend hunger lyden. David schickt sine botten zu Nabal ein stür von im zu begären / dise wünschend im güts: Christus schickt sine

Allegoria.

L iij

Von dem Nabal

Gotten zu der wält/die den lasteren ergäben/
vnnnd deßhalb torecht ist / wie Nabal/er em-
bit sich vil güts vnnnd begärt von jren / das
sy im frucht gäbe. Nabal gibt Davids Bots-
ten nichts/sonder fergget sy mit bösen woz-
ren ab/schmächet vnnnd schendt sy. Also gadt
es ouch den gsandten Gottes / man nennt sy
nirw gläubig/kätzer / abgeschnittne glyder/
rebelln/kelchdieb. Gibt jnen nichts/sonder
nimpt jnen an vilen orten das jren/stellt jnen
über das heimlichen vnd offentlich vff jr lyb
vnnnd läben. David wirt erzürnt/strieff aber
den Nabal nit/ließ in der fürbit Abigael ge-
messen. Unser herr Chustus strafft ouch
nit von stundan/schonet der wält von wägen
gläubiger lüten fürbitt/die sy hie in zyt für sy
thünd/wo sich die selben nit so ernstlich ynleg-
tund/so gienge die torecht wält bald zgrund.
Nach langem todt Gott den Nabal / vnnnd
ward Abigael erlöset / vnnnd Daviden ver-
mächet. Also wirt die kilchen vß dem zwang
der wält erlöset/vnnnd Chusto zügeführt. Gott
todt den Nabal nit mit vsserlichen waaffen/
sonder durch sinen geist. Also werdend alle
die so den Daviden/ das ist/ vnseren herren
Christum verachtend / von jm vnuersächlis-
chen überfallen werden.

Allegoria.

Wiewol aber die Allegoria etwan jren
platz habend/dann durch vil historyen vnser
Herr

herr Christus ist fürgebildet worden / wie
der heilig Apostel Paulus zun Corinthen
am zähenden Capitel maldet / als durch die
historiam von der eerinen schlangen in der
wüste / durch Joseph der von sinen Brüdes
ren verkoufft ward / durch Sauten der vom
Saul ist veruolget worden / vnd ander mehr /
so söllend wir doch ein maaß in den selben
halten vnd allwägen den verstand dem Büch
staben nach / ouch vor vns haben / vnd
den selben zu vnserer leer vnd zu
vnserem trost brauchen.

End.

Der 14. Psalmen
Sauls

Der Nabal od̄ torecht spricht
in sinem hertzen: Es ist kein
Gott. Sy sind verderbet/vñ
nämend inen greüliche ding für. Es
ist keiner der güts thue.

Der Herr hat vom himel herab
geschouwet vff der menschen Kinder/
dz er sehe ob doch yemants vständig
wäre vnd Gott nachfragete:

So warend sy all mit einanderen
abgeträtten / darzu all mit einande-
ren verböseret/da w; keiner der güts
thäte/ja nit einer.

Wil dan̄ der übelheteren keiner
das mercken / die min volck wie das
brot frässend / aber den Herren ruf-
fend sy nit an?

Senn werdend sy übel erschrickē/
dann Gott ist by der gerächten ge-
schlacht.

Je


Ir verachtend des armen rath/
dorumb das Gott sin hoffnung ist.


Wår wirt dem Israel vß Zion
das heil gâben? So der Herr die ge-
fenccknuß sines volcks wirt widerbrin-
gen. Jacob wirt frolocken/ vnd
Israel wirdt sich
frôuwen.





Faint, illegible text, likely bleed-through from the reverse side of the page. The text is arranged in several lines and is difficult to decipher due to its lightness and the texture of the paper.











heraus
Cap. 7. Siehe darzu man einen Doren
seine arm/und lobet Gott
in Tempel bracht/ nam es Simeon auff
2. Sa die Eltern das findt
is paffen

ap. 2. Siehe von nun an we

Lucas.

wer verloschet mit
Cap. 9. Er wurt für die
Dun/ kein sie gefundt
ap. 6. nd labete vil Siedhen mit

Marcus.

ap. 1.
28. Und reuffte sie in nar
77. Sie graber theren sich ar
at vergebet von herten

schide meines Daters im Himmel
angel im Himmel/ sehen allzeit das
So dich deine handt argert / so
Moses und Elias erschinen in



Inches 1 2 3 4 5 6 7 8
Centimetres 1 2 3 4 5 6 7 8 9 10 11 12 13 14 15 16 17 18 19

Farbkarte #13

B.I.G.

Blue Cyan Green Yellow Red Magenta White 3/Color Black



er=
läben
gen/vß
büchs
auater
is
t war
lichen
find:
nwn
alten
tesse
Stoffel
111.

